



BIBLIOTECA NAZ.  
Vittorio Emanuele III

XVI

C

30

NAPOLI







CAROLI SEBASTIANI  
BERARDI

IN R. TAURINENSI ATHENÆO

JURIS ECCLESIASTICI ANTECESSORIS

A C

De rebus ad Canonum Scientiam pertinentibus  
CONSULTORIS REGII

INSTITUTIONES  
JURIS ECCLESIASTICI.

OPUS POSTHUMUM  
IN DUAS PARTES TRIBUTUM.

*PARS II.*



AUGUSTÆ TAURINORUM.

Typis Ignatii Cafassi, & Antonii Buffani.

Exant apud GEORGIUM DOMINICUM MARIAM MORANUM  
Bibliopolam prope Turrin Civitatis.



(iii.)  
INDEX  
TITULORUM PARTIS II.



LIBER I.

De personis Ecclesiam componen-  
tibus . . . . . pag. 1.

Titulus I. <i>Generalis personarum tributio.</i>	ibid.
Titulus II. <i>De Pontifice Maximo .</i>	16.
Titulus III. <i>De Patriarchis .</i>	18.
Titulus IV. <i>De Primatibus, Archiepiscopis, vel Metropolitanis .</i>	21.
Titulus V. <i>De Episcopis .</i>	26.
Titulus VI. <i>De Prælatiſ Episcopo inferioribus.</i>	39.
Titulus VII. <i>De Parochis .</i>	45.
Titulus VIII. <i>De Clericis omnibus, prout ex Ordine distinguuntur.</i>	49.
Titulus IX. <i>De Clericis, prout ex officio, seu beneficiis distinguuntur.</i>	55.
Titulus X. <i>De Monachis .</i>	59.
Titulus XI. <i>De Sanctimonialibus .</i>	66.
Titulus XII. <i>De Vicariis Pontificis Maximi in Urbe .</i>	69.

Titulus

(IV.)

Titulus XIII. <i>De Vicariis Pontificis Maximi extra Urbem.</i>	pag. 71.
Titulus XIV. <i>De Vicariis Episcoporum.</i>	74.
Titulus XV. <i>De Vicariis Parochorum.</i>	77.
Titulus XVI. <i>De Coadjutoribus.</i>	79.
Titulus XVII. <i>De Religiosis Principibus, vel Optimatibus, ac Proce- ribus Reipublicæ; Defensoribus, Ad- vocatis, &amp; Patronis Ecclesiarum.</i>	81.
Titulus XVIII. <i>De Laicis generalem Ec- clesiæ communionem habentibus.</i>	86.

LIBER II.

De Conventibus, & Collegiis in Ecclesia.	88.
Titulus I. <i>De forma Ecclesiæ.</i>	ibid.
Titulus II. <i>De Conciliis Generalibus.</i>	95.
Titulus III. <i>De Conciliis Nationalibus, Provincialibus, &amp; Diœcesanis.</i>	104.
Titulus IV. <i>De Collegio Cardinalium, &amp; de Congregationibus Urbis Ro- manæ.</i>	109.
Titulus V. <i>De Capitulis Cathedralium Ecclesiarum.</i>	114.

Titulus

Titulus VI. <i>De Capitulis Collegiatarum Ecclesiarum .</i>	pag. 118.
Titulus VII. <i>De Seminariis , Academiis , &amp; Scholis .</i>	121.
Titulus VIII. <i>De Monachorum , ceterorumque Regularium , ac Sanctimonialium Collegiis .</i>	124.
Titulus IX. <i>De Sodalitiis , seu Confraternitatibus Laicorum .</i>	128.
Titulus X. <i>De Locis religiosis ad similitudinem Collegiorum erectis .</i>	130.

### LIBER III.

De ecclesiastica jurisdictione.	133.
Titulus I. <i>Quid sit ecclesiastica jurisdictionis .</i>	ibid.
Titulus II. <i>De ecclesiastico foro sive interno , sive externo .</i>	136.
Titulus III. <i>Quomodo jurisdictionis ecclesiastica adquiratur , &amp; quando .</i>	138.
Titulus IV. <i>De Judicibus in Ecclesia .</i>	140.
Titulus V. <i>De forma judiciorum ordinaria .</i>	143.
Titulus VI. <i>De sententia , &amp; re judicata .</i>	152.

(VI.)

Titulus VII. *De appellationibus, querelis, & devolutionibus.* pag. 134.

LIBER IV.

De rebus Ecclesiæ. 160.

Titulus I. *De rerum divisione in Ecclesia.* ibid.

Titulus II. *De rebus Divinis, ac primum de Sacramentis generatim.* 166.

Titulus III. *De Sacramentis Baptismi, & Confirmationis.* 172.

Titulus IV. *De Sacramento Eucharistiæ.* 177.

Titulus V. *De Sacramentis Pœnitentiæ, & Olei Infirmorum.* 180.

Titulus VI. *De Sacramento Ordinis.* 189.

Titulus VII. *De Conjugio, & Conjugii Sacramento.* 193.

Titulus VIII. *De rebus Sacris.* 210.

Titulus IX. *De rerum Divinarum, ac Sacrarum adminiculis.* 216.

Titulus X. *De Beneficiis ecclesiasticis.* 222.

Titulus XI. *De rebus piis, quæ sunt a Divinis, & Sacris distinctæ.* 237.

Titulus XII. *De rebus religiosis.* 240.

Titulus

Titulus XIII. *De juribus quibusdam singularibus in rebus Divinis, Sacris, piis, ac religiosis.* pag. 247.

### LIBER V.

De criminibus, & modis, quibus rei criminum in Ecclesia coërcentur.

259.

Titulus I. *Quid, & quotuplex sit crimen, & quomodo in judicium deferatur.*

ibid.

Titulus II. *De forma, & ordine judiciorum criminalium.*

264.

Titulus III. *De criminibus directo contra Deum admissis.*

278.

Titulus IV. *De criminibus admissis contra res Deo sacras.*

282.

Titulus V. *De criminibus singularibus Clericorum.*

288.

Titulus VI. *De ceteris criminibus unicuique communibus.*

291.

Titulus VII. *De modis, quibus rei criminum in Ecclesia coërcentur, & primum generatim.*

298.

Titulus

(VIII.)

Titulus VIII. <i>De pœnitiis, quibus rei criminum expiantur.</i>	304.
Titulus IX. <i>De censuris, quibus rei criminum coërcentur.</i>	308.
Titulus X. <i>De pœnis, quibus rei cri- minum puniuntur.</i>	317.
<i>Conclusio.</i>	329.







## PARS II.

S U M M A

# JURIS ECCLESIASTICI DOGMATA.

## LIBER PRIMUS

DE PERSONIS ECCLESIAM COMPONENTIBUS.

### TITULUS I.

GENERALIS PERSONARUM TRIBUTIO.

#### I.



UNT in Ecclesia, uti in omni societate, officia, munera, jura, atque onera. Hæc autem vel communia omnibus sunt, vel specialia quorundam. Quæ specialia quorundam sunt, causam præbent tributioni personarum.

*Instit. Pars II.*

A

II.

Ecclesia Christi Divinas accepit leges certo testimonio palam proponendas, atque explicandas. Quandoque etiam accepit extra ordinem Divina mandata singularia simili ratione edita, vel edenda. Sive leges generales, sive mandata singularia, sæpe, ac sæpius indigent certorum virorum scientia, qui cum illas memori studio didicerint, ac calluerint, rum easdem factis, prout incidunt, applicent, & , si opus sit, interpretentur. Præter hæc sunt in Ecclesia ministeria sacra, per quæ sanctum ineffabile inter Deum, & homines commercium exercetur, Divinaque dona justificationis, & gratiæ hominibus communicantur. Ut Divina virtus etiam sensibilibus signis eluceat, quandoque Deus per pios homines præter naturæ ordinem miracula edit. Insuper in multiplici personarum genere, & numero firmiores infirmioribus præsidium, patrociniumque suppeditant, imo & omnes, quicumque sint, se se mutuis operis adjuvant, atque confirmant: digniores ad certum munus adlecti inferioribus jura & dictant, & reddunt causa stabiliendæ, curandæque publicæ politiæ. Denique ut Divinæ, ecclesiasticæque leges certis formulis conceptæ populis omnibus longe lateque diffusis compertæ fiant,

fiant, varia linguarum genera necessaria sunt; quemadmodum & ut unitas variarum gentium, imo & plurium sæculorum magis magisque servetur, opus est interpretatione sermonum, quibus aut usi veteres fuere, aut alienigenæ utuntur. Sunt hæc singula officia, juxta quæ auspicatus est Apostolus Paullus in epist. 1. ad Corinth. cap. 12. partitionem exactissimam personarum, quibus Ecclesia constat, his verbis: *Quosdam quidem posuit Deus in Ecclesia primum Apostolos, secundo Prophetas, tertio Doctores, deinde virtutes, exinde gratias curationum, opitulationes, gubernationes, genera linguarum, interpretationes sermonum. Numquid omnes Apostoli? numquid omnes Prophetæ? numquid omnes Doctores? numquid omnes virtutes? numquid omnes gratiam habent curationum? numquid omnes linguis loquuntur? numquid omnes interpretantur? Tributio isthæc personarum eximia est, atque Apostolo digna, juxta quam nemo unquam debeat alienum officium sibi vindicare, nisi Divina voluntate multa uni commissa officia demonstrantur. Tantum illud unicuique superest Paulo eodem mandante exequendum præceptum. *Æmulamini charismata meliora.**

Similis ferme tributio conspiciebatur in vetere Synagoga Judæorum. Multi in ea

fuerunt a Deo missi palam edituri Divina mandata, uti Moses, Esdras, aliique, quorum ministerium dici quodammodo apostolicum potuisset. Multi Prophetæ, ex eo præfertim, quod tum opus esset vaticinio grandium Divinarum rerum futurarum. Multi quoque legis Doctores, sacramentorum, ac sacramentalium Administri in Aaronica, & Levitica Tribu. Non deerant, qui præsidium, operamve conferrent. Miracula passim perpetrata. Quandoque etiam linguarum periti interpretes adhibebantur, ut ut horum officium non adeo necessarium videretur, propterea quod Judaica lex singularis esset, edita ad usum unius populi, non gentium universalium.

Itaque *Apostoli* Divinam legem, five Evangelium, quod a Christo ipso didicerunt, populis annunciarunt. Et quando hæc annunciatio perpetua esse debebat, in hoc officio successores habuerunt, quales sunt Episcopi, & qui Episcoporum adjutores sunt Presbyteri. *Prophetæ* Divina oracula pandere identidem visi sunt, ceu singularia quædam Divina mandata. Horum nulla successio est, cum extra ordinem selecti a Divino Spiritu fuerint, & seligantur etiam sine sexus discrimine; eam ob rem in cap. 21. Actorum commemoravit S.

S. Lucas quatuor Philippi Diaconi filias vir-  
 gines prophetantes. Dixeris jure optimo,  
 Prophetas identidem extra ordinem a Deo  
 excitari. *Doctorem* officium tamdiu in Ec-  
 clesia fuit, est, eritque, quamdiu necessa-  
 rium est, ut sint, qui jura calleant, & prout  
 res incidit, exponant. Quando vero officium  
 hoc ex ingenio, ex anteaëtis studiis, atque  
 ex quæsitâ prudentia pendet, non certo ali-  
 cui personarum generi, sive conditioni man-  
 datum unquam est, sed iis, quos ii chara-  
 cteres exornaverunt. *Virtutes*, quarum no-  
 mine ego intelligo operationes Divinorum  
 mysteriorum, quæ fiunt per Sacramenta, &  
 Sacramentalia, ex vi suscepti sacri ordinis  
 pendent. Divinus in certis ministris in or-  
 dinatione impressus character signum est,  
 quo Deus rata habet quæcumque administri  
 Divino nomine operantur. Munus sane per-  
 petuum est, eodem jure, quo perpetuo Sa-  
 cramenta sunt in Ecclesia administranda,  
*Gratia curationum* ad censetur miraculis, quo-  
 rum editione Deus identidem palam testatur,  
 se Ecclesiæ suæ adesse speciali ratione, &  
 hoc ministerium extra ordinem excitatur,  
 nullo habito personarum discrimine: Deus  
 ipse personarum delectum sibi reservavit.  
*Opitulationes* ab illis in Ecclesia expectantur,

qui potentiores in Ecclesia sunt, ac possunt Ecclesiam ipsam patrocinio, tutela, defensione, operaque fovere, ac tueri. Inter istos eminent religiosi Principes, magistratus, dignitatesque universæ, optimates, procures, illique omnes, quos posterior ætas Ecclesiarum patronos, aut advocatos nominavit. Horum omnium officium perpetuum in Ecclesia est ea significatione, ut perpetuo esse debeant, qui parati sint ad tuendam Ecclesiam, prout opus fuerit, non ita, ut perpetuo officium illud exerceatur. *Gubernationum* munus ordinarium est; cura enim sacræ politiæ fere quotidiana esse debet: quomodo vero tribuenda sit, id totum Ecclesiæ placitis datum est, imo & sæpe moribus populorum; quamobrem variam in hac re diversis temporibus, & provinciis disciplinam fuisse conspiciamus. Quod de Doctoribus dictum est, id ipsum dicere oportet de *generibus linguarum, & interpretationibus sermonum*. Debent perpetuo esse in Ecclesia, qui his officiis fungantur; id tamen artis, & peritiæ est opus.

Ad summa tria capita referri possunt singula hæc officia: alii enim, ut ira loquar, plantant, ac ferunt, cujuscumque sunt Apostoli, Prophetæ, Doctores: alii irrigant, cujuscumque  
di

di sunt virtutes, gubernationes: alii denique dirigunt, muniunt, ac foveant, cujusmodi sunt gratiæ curationum, opitulationes, genera linguarum, & interpretationes sermonum.

Quamquam hujus generis officia distincta per se sint, quandoque tamen unum alteri aut necessario cohæret, aut cohærere belle potest, aut etiam cohærere maxime decet. Apostolorum personas insignivit Deus gratia Prophetiæ, gratia cœlestis doctrinæ, gratia curationum, generibus linguarum, & perceptione sermonum. Successoribus Apostolorum necessario competunt & virtutum, & gubernationum officia: ut etiam Doctores sint, canonibus jubetur; ut generibus linguarum, & interpretatione sermonum polleant, consilium datur. Prophetæ concitantur ex quocumque genere Divino afflatu; non semper tamen aut Apostolicum munus gerunt, aut Doctores sunt, aut virtutum characteribus præditi, aut aliis prærogativis donati. Doctores non ordinatio, sed doctrina, ac prudentia facit. Ubicumque & doctrina, & prudentia est, ibi Doctorum munus belle constituitur. Virtutes sequuntur perpetuo sacre ordinationis characterem pro modo singulorum, itaut in ordine Episcopali singulæ jungantur, in ceteris inferioribus di-

vidantur. Gratia curationum Divinum munus est, & ex quocumque genere seligi a Deo possunt, imo & consueverunt, qui mirabilia præstent. Opitulationes sequuntur potestatem: in quocumque genere potestas sit, in eo locum habere opitulatio potest. Gubernatio Pontificiæ ordinationi cohæret, ita tamen, ut Doctorum consilio indigeat, imo & duce prudentia exerceatur; eamque ob rem vicissitudinibus subjacet pro adjunctorum varietate; quod in causa est, ut gubernationes quandoque adscriptæ sint illis, qui Episcopalem characterem non habent. Genera linguarum, & interpretationes sermonum in quocumque etiam genere inveniuntur penes eos, qui arte, & peritia polleant.

### III.

Vulgatissima æque ac celeberrima est partitio personarum Ecclesiam componentium, inter clericos, & laicos. Clerici dicuntur, quos sacra ordinatio distinguit, ceteri laici nominantur. Clericorum etiam nomine donati sunt, qui nomen suum ita Ecclesiæ dederunt, ut probationis causa in tyrocinium admissi sint Episcoporum auctoritate, & facto, spe concepta brevi futurum, ut ordinentur. Initiantur isti, cum tonsentur, & incipiunt ecclesiasticis inferioribus ministeriis assue-



assuescere. Inter clericos, & laicos medium quendam locum tenent monachi, qui olim, utur ordinibus ecclesiasticis insigniti non essent, adhuc tamen a laicorum cœtu secernebantur ob assiduam Divinarum rerum meditationem, cui uni vacui ceteris curis dediti erant. Quodammodo etiam dici poterant, esse in probatione clericatus instar eorum, qui hodie prima tonsura initiantur. Quippe frequentissime contingebat, ut Episcopi ad clerum promoverent illos, qui vitam monasticam diu cum laude transgissent. Huic consuetudini morem gerens S. Hieronymus sic Rusticum quendam monachum alloquebatur in can. 26. cau. 16. qu. 1. *Sic vive in monasterio, ut clericus esse merearis: multo tempore disce, quæ postmodum doceas.*

Hodie monachi in clero connumerantur, postquam & ipsi clericalibus ordinibus insigniti sunt.

Potiore jure clericis ad censentur regulares illi, qui clericalem vitam cum monastica ex sui institutione junxerunt.

#### IV.

Clericorum tot numerantur gradus, quot ordines. Quæ singulis ordinibus competant, discretæ singularum ordinationum formulæ aperte demonstrant. In Episcopatu gradus omnes

omnes cumulantur : Presbyteri constituti sunt  
 ceu adjutores Episcoporum : Diaconi in Presbyterorum æque ac Episcoporum ministerium dati : Subdiaconi ideo constituti , ut amplissimam , & laboriosam Diaconorum curam levarent : Acolythi , Exorcistæ , Lectores , Ostiarii , ut minora Ecclesiæ officia gererent . Posterioribus olim adnumerabantur etiam Cantores , Psalmistæ , quandoque etiam Notarii , nisi dixeris , Notarios electos fuisse inter Diaconos , aut Subdiaconos , sicut & Œconomi , sive Curatores bonorum temporalium ad Ecclesias pertinentium .

Veteres numero plures ordinationum clericalium formulas recensuit Gratianus in dist. 23. can. 7. 8. 11. 15. 16. 17. 18. 19. & 20.

#### V.

Neque laicorum omnium una est ratio , idemque singulorum modus sine discrimine . Ut enim omitтам memorare aut illos , qui adhuc in catechumenatu consistunt , aut illos , qui catechumenatum emensi necdum Sacramentum Confirmationis susceperunt , aut illos , qui in statione pœnitentium consistunt ; dixero , tot esse laicorum gradus , quot sunt officia conditioni etiam laicorum competentia . Generatim electiones sacrorum administrorum

strorum olim non cleri modo consilio, sed & consensu laicorum omnium fiebant. Interveniebant etiam laici, ubi ea negotia agerentur, quorum executio omnium sine discrimine intererat; quo spectat sententia Nicolai I. in can. 4. dist. 96. Quæ ex superius commemorata Apostoli Pauli doctrina ad opitulationes pertinent, indicant singularia in Ecclesia jura Principum religiosorum, qui & Ecclesiæ, & ecclesiasticorum canonum tutores, ac vindices sunt. Idem dixeris de magistratibus, de proceribus, de optimatibus, qui omnes dignitate sua inter laicos etiam in Ecclesia præcellunt. Sua quoque singularia jura a communibus apprimè distincta habent advocati, & patroni Ecclesiarum, sua unicuique pro virili parte adtributa, ac canonibus confirmata.

## VI.

Est alia personarum tributio, quæ non ex Sacramentorum, ac Sacramentalium ministerio repetitur, idest ex virtutibus, quæ inefabile commercium inter Deum, & homines, juxta memoratam Apostoli Pauli doctrinam constituunt; sed repetitur ex gubernatione Ecclesiæ, qualem a virtutibus Paulus idem distinxit, pertinetque ad regimen societatis Sacrorum publicum, quale inter homines constitui

constitui debuit. In hac rerum specie a ministeriis ordinum distinguuntur jurisdictiones, & officia quaecumque ecclesiastica, quamquam sæpe numero ordinibus ipsis aut jurisdictiones, aut officia vel cohæreant, vel cohærere necessario debeant. Hanc ob rem alii in Ecclesia dicuntur jurisdictionem, alii officium habere: alii & jurisdictione, & officio carent. Ex istis qui jurisdictione, & officio carent, alii nihilominus jurisdictiones, aut officia adjuvant aut potestate, aut consilio; alii & potestatis, & consilii sunt prorsus expertes.

Jurisdictionis nomine hoc in loco intelligitur facultas decernendi, jura constituendi, formam regiminis inducendi, moderandi res sacras, judicandi, & poenarum canonicarum indictione curandi executionem illius, quod rite deliberatum, constitutum, decretum, judicatumque fuerit.

Nomine officii intelligitur certum munus alicui competens, singulare, sine ulla jurisdictione, seu publica decernendi, coercendique potestate.

Potestate adjuvant jurisdictiones, aut officia, quotquot idonei sunt, ut præsidio, patrocinioque suo & jurisdictiones, & officia tueantur, quo libere suum munus exequi possint.

Con-

Consilio & jurisdictiones, & officia  
adjuvant, quotquot doctrina, prudentiaque  
præstant.

## VII.

Jurisdictionem præter Pontificem Maximum habent Episcopi universi, pro modo administrationis unicuique commissæ post divisionem Dioceseon, ac Provinciarum. In vicem ipsi ita se respiciunt, ut unus alteri subsit: Divino jure omnibus præest Pontifex Maximus: ecclesiastico jure ita ordinata res est ad amplitudinem cleri totius accuratius dirigendam, ut Patriarchæ Primatibus, Primates Archiepiscopis, Archiepiscopi Episcopis immineant. Cum Sedes Episcopalis vacat, jurisdictionem Episcopalem diocesanam clerus olim exercuit, nunc ad Capitulum Cathedralis Ecclesiæ contractam. Sub Episcopis certi Prælati quandoque constituti sunt Episcoporum eorundem auctoritate, qui jurisdictionem exercerent suis tamen finibus circumscriptam, in certum clericorum genus. Certum est, jurisdictionem hanc Episcopis ingenitam potuisse aliis mandari, & singularibus titulis adquiri.

Sic in collegiis clericorum constituti sunt Præpositi, Decani, Abbates, vel Priores, inter Presbyteros Archipresbyteri, inter  
Diaconos

Diaconos Archidiaconi, inter Notarios Primicerii. His adjici possunt Prælati regulares. Hodie tamen Episcopi, & quidem jamdiu maluerunt uti opera illorum, quos modo Vicarios Generales, modo Officiales vocant.

### VIII.

Sunt in officio, & quidem sine jurisdictione, quotquot in clero constituti singulare munus gerendum susceperunt.

Sic in Ecclesiis conventualibus instituta sunt officia Theologorum, Scholasticorum, Pœnitentiariorum, Cantorum, & similia: in Ecclesiis simplicibus officia Parochorum, & alia.

### IX.

Et prisca canones, & vetera Patrum monumenta perpetuo tradiderunt, ab Ecclesia spem magnam collocari in patrocinio religiosorum Principum. Isti propterea jure ac merito dicuntur potestate Ecclesiam adjuvare. Ad ipsos prope accedunt cujusque rei publicæ Optimates, & Procures. In Ecclesiis minoribus patrocinium quoque suum exhibent Advocati Ecclesiarum, ac Patroni.

### X.

Consilium præbent Doctores, & pro modo rei, de qua agendum sit, disciplinarum periti: Et quando cautum sacris canonibus est,

est, ut nonnisi viri docti, ac prudentes in clericorum cœtu, præsertim in Cathedrali Ecclesia apud Episcopum, adscribantur; verus fuit Ecclesiæ consuetudo, qua clerici omnes in id opus eligerentur, aut saltem canonici Cathedralis Ecclesiæ ab Episcopi, cui in promptu esse possunt, consiliis essent.

Hæc plane consilia totius cleri adhuc hodie in Episcopalibus Synodis in usu sunt, aut esse debent; quemadmodum extra Synodos in usu sunt, atque esse debent consilia canonicorum. Gratulandum semper erit Ecclesiis, quoties tales clerici, aut saltem canonici Cathedralis Ecclesiæ seligantur, quales esse valeant præbendo consilio pares.

## XI.

Itaque ut partitionem illam personarum, quæ hodie in Ecclesia certo discrimine conspiciuntur, paucis colligam, dixero, hunc esse ordinem. Videlicet primo recensetur Pontifex Maximus; inde Patriarchæ, Primates, Archiepiscopi, Episcopi, Prælati inferiores, Parochi, ceteri Clerici, Monachi, aut Regulares; Vicarii Papæ, Vicarii Episcoporum, Vicarii Parochorum. Hi omnes clerum constituunt: Extra clerum sunt in primis religiosi Principes, deinde Proceres, Optimates, Patroni, & Advocati Ecclesiarum; laici denique universi.

De

De his personis singillatim in hoc libro agitur. Quæ vero personæ Collegium constituunt, in secundo libro indicabuntur.

## TITULUS II.

### DE PONTIFICE MAXIMO.

#### I.

**C**URAM Ecclesiæ suæ, & ecclesiastici regiminis universi commisit Christus Dominus electis Apostolis; Apostolorum autem constituit Principem S. Petrum. Sicut ergo Apostolorum dignitas, potestas, & officium debuit esse perpetuum in successores veluti per gradus transferendum; ita perpetuus debuit esse Petri Principatus, adeo ut in persona Petri datus censi debeat Petri ejusdem successoribus universis.

Hæc prima fuit Ecclesiæ forma a Christo ipso præstituta, ideoque perennis, atque immutabilis. Ita docent sacræ literæ, quibus constans traditio suffragatur.

#### II.

Postquam Petrus diu Antiochenam Sedem tenuisset, transtulit se Romam, Romanoque Episcopatu erecto, ibi Pontificatum Maximum gessit, ejusdemque Maximi Pontificatus reliquit successores. Ergo Romanus Episcopus  
Petri



Petri successor est, ideoque Divino jure Primatum in Ecclesia tenet.

### III.

Principatus hujus potestas duobus summis capitibus constat. Primum caput est ea gerere, quæ universam Ecclesiam uti universam spectant. Alterum caput est Antistitum universorum supplere defectus, vel excessus corrigere.

Primum caput facile eruitur ex formulis evangelicis, quibus Christus allocutus est Petrum. Postquam enim ipse Apostolis omnibus quæcumque solvendi æque ac ligandi facultatem concessisset, singulari sermone conversus ad Petrum, quæcumque ligandi, solvendi que quasi novam facultatem concessit. Etsi vero expressæ istæ formulæ deficerent; ipsa natura regiminis postulat, ut quæ societatem universam respiciunt, a Principe pendeant. Profecto certa sunt negotia in quacumque republica, quæ si non a Principe gerantur, irrita conatu ab aliis fient. Quid enim, si publica celebranda comitia sint? nonne ab eo indicenda, qui Princeps est, & universos advocare, & cogere ad conventum possit? Multa alia esse possunt hujus generis exempla.

Alterum caput perspicue ex Evangelio ipso deducitur. Christus enim Petrum alloquens, ei mandavit, *ut aliquando conversus confirmaret fratres suos*. Quid aliud est *aliquando confirmare fratres*, quam si excefferint, cohibere, aut si defecerint, eorundem oscitantiae presto esse? Hinc profluunt devolutiones, appellationes, & alia hujus generis.

### TITULUS III.

#### DE PATRIARCHIS.

##### I.

VETUS fuit consuetudo, qua singulari nomine, imo & potestate insignirentur illi Episcopi, qui eam Sedem tenerent, quam S. Petrus Apostolorum Princeps olim tenuisset. Tres autem fuere Episcopales Petri Sedes; primum Antiochena, quam dimisit, ut Romam pergeret, deinde Alexandrina, quam tenuit ministerio S. Marci, tandem Romana, in qua obiit, Pontificatu Maximo in ævum decorata. Tres istas Sedes ad honorem Petri Patriarchales dixerunt, & eos, qui eas tenerent, Patriarchas.

##### II.

Non honor solum concessus est Patriarchis, sed jurisdictio etiam singularis. Nam cum  
tributæ

tributæ inter Episcopos diœceses fuerint , constitutique varii Episcoporum gradus , cautum fuit , ut singulis Patriarchis late diffusa administratio quædam concederetur , ut non Episcopis modo , sed & Archiepiscopis , ac Primatibus præessent , ipsi autem neminem , quam Pontificem Maximum superiorem agnoscerent.

In hac constitutione singularis potestatis non jus Divinum intercessit , sed jus positivum ecclesiasticum . Utilitas publica suavit , ut inter Episcopos quidam seligerentur , atque isti in majori gradu collocarentur , ita consentientibus universis Episcopis , ac Pontifice Maximo . Quippe Episcoporum intererat consentire : qui alias inter se pares potestate fuissent , uno demto Pontifice Maximo : intererat etiam Pontificis Maximi consentire ; Patriarchica enim potestas erat derivatio quædam potestatis Pontificatus Maximi , cui uni Episcopi omnes sine discrimine suberant inspecta Christi institutione .

Inde fluit non aliam majorem potestatem Patriarchis competere , quam quæ aut expressa canonum definitione , aut diuturna probata consuetudine demonstratur .

## III.

Succeſſione temporum cum Conſtantinopolitana urbs appellaretur nova Roma, & revera eſſet Sedes Imperialis, Epifcopi ejuſdem urbis certas quoque prærogativas, ſaltem Patriarchales, affectare cœperunt. Res bene ceſſit, obtinueruntque, ut & ipſi diviſis finibus, Patriarchatus honorem, poteſtatemque haberent. Honor urbis Hieroſolymitanæ, in qua noſtræ redemptionis myſteria completa ſunt, viſus quoque fuit poſtulare, ut ejus urbis Antiſtes Patriarcharum juribus gauderet. Iſtæ duæ Patriarchales Sedes habitæ ſunt tales ex privilegio, non juxta veteris diſciplinæ formam, quæ ideo Patriarchales Sedes in Romana, Alexandrina, & Antiochena Eccleſia erexit, quod iſtas Eccleſias S. Petrus Apoſtolorum Princeps adminiſtraviſſet.

Hic ordo inter plures Parriarchas tandem receptus eſt, ut primus locus daretur Romano, ſecundus Conſtantinopolitano, tertius Alexandrino, quartus Antiocheno, quintus Hieroſolymitano.

Quidam alii Epifcopi, præſertim majorum civitatum, aliquando Patriarcharum nomine ſub Longobardorum regimine donati ſunt. Sed hæc appellatio fuit impropria.

*TIT.*

21

## TITULUS IV.

### DE PRIMATIBUS, ARCHIEPISCOPIS, VEL METROPOLITANIS.

#### I.

**I**N tributione dignitatum Episcopaliū, postquam diœceses inter Episcopos divisæ sunt, sequebantur veteres civilem imperii formam. Postulabat Ecclesiarum utilitas, ut unus Episcopus alteri præesset in provincia, vel natione. Censuerunt, ut is inter Episcopos nationis, vel provinciæ Princeps haberetur, qui Episcopus esset illius civitatis, quæ juxta formam imperii Metropolis & ceterarum caput existeret. Itaque ubi in natione certus esset Episcoporum Princeps designandus, designabatur Episcopus civitatis in natione majoris, ac Primas appellabatur: ubi in provincia certus esset Episcoporum Princeps designandus, designabatur Episcopus civitatis in provincia majoris, ac Metropolitanus, vel Archiepiscopus nominabatur.

Singularis fuit forma Africanæ Ecclesiæ; quamquam enim ibidem Primatum gereret nationis Episcopus Carthaginensis, ceu urbis in Africa majoris; is tamen erat singularum provinciarum Episcopus Princeps, qui in provincia senior esset inter compro-

vinciales; eamque ob rem nec Metropolitanus, nec Archiepiscopus dicebatur, sed *Sanctus Senex*.

Et quidem ea forma designandi Metropolitanus ex urbis Metropolis qualitate prioribus Ecclesiæ sæculis servata est. Successione temporum constitutis, firmatisque ecclesiasticis dignitatibus, consultum fuit, ut qui semel Metropolitanus, seu Archiepiscopus extitisset, talis perpetuo esset, nec Metropolitica, seu Archiepiscopalis dignitas vicissitudinibus subjaceret. Duplex hujus rei definienda fuit causa: prima fuit, ut coërceretur quorundam Episcoporum ambitus, qui, ut Archiepiscopalem dignitatem haberent, totis viribus conabantur, ut ab Imperatoribus impetrarent, urbem, cui præerant, Metropolim creari. Altera fuit, ne ad frequentem civilium jurium mutationem, jura Metropolitica Ecclesiarum huc illuc sæpe transferrentur.

Episcopi provinciales Archiepiscopo, seu Metropolitæ suberant: Archiepiscopi, seu Metropolitæ suberant Primati, quemadmodum Primates Patriarchæ, & Patriarchæ omnes Pontifici Maximo. Qui suberant, Suffraganei dicti sunt.

## I I.

Et caussa, & modus, qua Primatialis, qua Archiepiscopalis, seu Metropolitica potestatis, idem fuit, qui potestatis Patriarchalis. Cum Divino jure omnes Episcopi essent potestate pares, uno demto Pontifice Maximo; ut unus Episcopus alteri subjiceretur, utque unus alteri præesset, opus fuit & Pontificis Maximi, & Episcoporum consensione; Pontificis Maximi, cujus intererat, potestatem suam aliis Antistitibus in parte communem fieri; Episcoporum, quorum intererat, alteri Episcopo præter Pontificem Maximum subjici. Hanc consensionem facile elicit, & expressit publica Ecclesiarum utilitas emergens ex regimine nationum, & provinciarum hoc elegantissimo ordine constituto. Hinc ea potestas ex consensione dimanans eatenus extenditur, quatenus publica utilitas postulet.

Hinc proficiscitur, & Primatum, & Archiepiscoporum, seu Metropolitanorum potestatem, ac dignitatem ex jure positivo ecclesiastico utut antiquissimo originem habuisse; proindeque in hac re derogationibus, & coërcitionibus locum fieri posse.

## I I I.

Seu Primatialis, seu Metropolitica potestas est quædam veluti derivatio æquabilis pote-

statis Pontificis Maximi ita , ut æquabiliter Primas in Ecclesias nationis , Metropolitanus in Ecclesias provinciæ potestatem exerceat , quemadmodum Pontifex Maximus in Ecclesias universas . Hinc concludi potest ad duo summa capita exigi & Primatiales , & Metropolitanas potestatem . Primum caput est , ut Primas gerat negotia , quæ Ecclesias nationis spectant universas uti universas ; Archiepiscopus , seu Metropolitanus gerat negotia , quæ Ecclesias provinciæ spectant universas uti universas : alterum caput est , ut Primas , item ut Metropolitanus , seu Archiepiscopus suppleat defectus , corrigatque excessus suffraganeorum Antistitum . His enim characteribus distinguitur Pontificis Maximi auctoritas , quemadmodum notandum fuit superius tit. 2. num. 3. Ad primum caput refertur potestas convocandi Episcopos nationis ad nationale Concilium , quæ Primati , & convocandi Episcopos provinciæ ad provinciale Concilium , quæ Metropolitano , seu Archiepiscopo competit . Ad alterum caput spectant jura appellationum , & devolutionum .

Dixi , potestatem Primatum , & Metropolitanorum esse derivationem potestatis Pontificis Maximi *æquabilem* , non *æqualem* , ut indicarem , non adeo late in natione , aut  
pro-



provincia patere. Eatenus extenditur, quatenus vel expressa constitutione canonum, vel probatis moribus receptum est, vel etiam concessum singularibus Pontificum Maximorum privilegiis. Hæc eadem forma respectu Patriarcharum constituta est, uti superius notavi tit. 3. num. 1.

#### IV.

Ut exterioribus etiam symbolis demonstraretur dignitas Archiepiscopalis, & alia Archiepiscopali major, ceu e Pontificatu Maximo derivata; ornamenta ipsa Pontificis Maximi concessa quoque sunt Archiepiscopis, ceterisque majoribus Prælati. Primum ornamentum fuit, ut incedere possent præeunte cruce intra fines administrationis sibi adsignatæ. Alterum fuit, ut intra eosdem fines pallio decorati incederent. Et quidem pallium non omnibus indiscriminatim ab initio concessum est, sed quibusdam tantum, qui illud enixe peterent, & meritis insignibus commendarentur. Successione temporum petere pallium Archiepiscopi quicumque, eisque majores Prælati debuerunt, ita quidem, ut quousque non peterent, a pluribus Episcopalibus muneribus abstinere cogerentur.

## TITULUS V. DE EPISCOPIS.

### I.

**C**UM intellexeris quorum locum in Ecclesia teneant, sive in quorum locum successerint Episcopi, tum intelliges, qui, qualesque Episcopi sint. Paucis rem demonstrat perennis traditio, juxta quam scimus, Episcopos esse successores Apostolorum.

Eleganter Augustinus ita scribebat in Psalmum 44. *Patres missi sunt Apostoli: pro Apostolis filii nati sunt tibi, constituti sunt Episcopi. Hodie enim Episcopi, qui sunt per totum mundum, unde nati sunt? Ipsa Ecclesia Patres illos appellat, ipsa illos genuit, ipsa illos constituit in Sedibus Patrum. Non ergo te putes desertam, quia non vides Petrum, quia non vides Paullum, quia non vides illos, per quos nata es: De prole tua tibi crevit paternitas: pro patribus nati sunt tibi filii.*

### II.

Tria complectitur hæc Apostolica successio: primum est missio: alterum operatio Divinarum virtutum; postremum est regimen, & gubernatio populi christiani. Missio tendit ad prædicationem Evangelii, sive Divinæ doctrinæ & fidei, & morum. Operatio Divinarum

vinarum virtutum exercetur per ministeria Sacramentorum, ac Sacramentalium. Regimen, & gubernatio populi christiani consistit in disciplinæ cultu, & sacra politia. Missio Christi vicarios, operatio Divinarum virtutum Christi ministros, regimen, & gubernatio populi christiani ecclesiasticæ reipublicæ curatores, moderatores, ac duces Episcopos facit. Missio, quæ Vicarios Christi facit, tota Divina est, tota pendet, & modum accipit ex generali Christi mandato. Operatio Divinarum virtutum, quæ facit ministros Christi tota Divina est, & modum accipit ex Divino caractere, qui in ordinatione imprimitur. Regimen, & gubernatio populi christiani, quæ facit ecclesiasticæ reipublicæ curatores, moderatores, ac duces, multa habet juris Divini, quædam etiam cum jure humano etiam gentium communia. Commune gentibus universis est, ut certi sint in societate sacrorum administri, qui populum dirigant, item ut qui dirigunt, prudentia, æquitate singula moderentur; denique ut modus regiminis rationum humanarum vicissitudinibus congruat. Ex jure Divino repetendum est, ut hoc regimen fuerit Divina auctoritate confirmatum, item ut fuerit certo personarum generi commissum, nimirum Apostolis, & iis, qui

qui Apostolis essent rite successuri. Hanc ob rem hoc regimen electionibus rite factis, & ex generali disciplina confirmatis adquiri potest, in modo adquirendi, in modo exercendi, in modo amittendi, suas habet vicissitudines. Cum omnia rite recteque facta fuerint, Divino jure regimen exercet, qui ad regimen exercendum electus est.

Qui vicariatu Christi funguntur, tales esse nequeunt, nisi Christi mandatum acceperint. Hoc mandatum generale fuit a Christo datum in Evangelio, sive cum Apostolis dixit: *Sicut misit me Pater, ita ego mitto vos*; seu cum dixit: *ite in mundum universum, prædicate Evangelium omni creaturæ*. Missio præcipue refertur ad prædicationem Divinæ doctrinæ. Cum enim doctrina Christi Divina sit, non ab alio promulgari potest, nisi ab eo, qui eam a Christo acceperit, & mandatum prædicationis habuerit, juxta illud Apostoli Pauli: *quomodo prædicabunt, nisi mittantur*? Ergo Apostoli, & Apostolorum successores in id semper conferre debuerunt operam suam, ut non aliam, quam eam, quam à Christo accepissent, doctrinam prædicarent. Equidem Apostoli ipsi in hoc munere errare minime potuerunt, præterquamquod enim singulari Divino afflatu pollerent, ipsimet  
ore

oretenus a Christo ipso Divinam doctrinam acceperant. Viri apostolici, qui scilicet Apostolos ipsos, quibus successerunt, institutores habuerunt, fuerunt & ipsi testes illorum, quæ viderant, aut audierant. Quo tempora ab apostolica ætate remotiora successerunt, eo sedulius debuit esse studium Episcoporum, quo non aliud, quam quod traditum est, populus doceatur. Studium plane hodie laboriosum, eamque ob rem nihil magis Episcopo dignum est, quam ut ipse & Divinas literas, & Patrum traditiones calleat, quando prædicationis munus præcipuum est inter Episcopalia officia, & ad Divinam ipsam missionis causam pertinet. Si Divinarum literarum, & traditionum studia negligat, atque ad alias doctrinas sese Episcopus convertat, nec tanquam a Deo missus, nec tanquam Christi Vicarius eloquetur. Non repugnat autem, Episcopos hanc ipsam missionem aliis communem facere, dummodo semper officium hoc exequantur, qui ab Episcopis mandatum acceperint. Consuevit Ecclesia hoc officium majoribus tantum Clericis ceu gravissimum mandare, nimirum Presbyteris, & Diaconis, semper tamen extra ordinem, & cum Episcopus aut impediatur, aut præsto non sit.

Operatio Divinarum virtutum, quæ facit Christi ministros in Sacramentis conficiendis, ac conferendis, præcipue Episcoporum est, qui propterea characteris, sive Ordinis sacri plenitudinem habere dicuntur. Ex Sacramentis, quæ ad Sacerdotum ministeria pertinent, nullum est, quod Episcopalem potestatem declinet; quamquam multa sint etiam Presbyteris concessa, quædam etiam Diaconis. Ex eo tamen, quod duorum Sacramentorum collatio, videlicet Ordinis, & Confirmationis Episcopis reservetur, perspicue liquet, Episcopatus Ordinem non a Diaconatu modo, sed & a Presbyteratu esse distinctum. Ut in Ordine Episcopali omnia sacra mysteria, omnesque Divinæ virtutes comprehendi credantur, consecratio Episcoporum ita concepta semper fuit, ut cum Episcopus consecratur, tum dicatur consecratus Spiritu Sancto donari, quod idem est, ac Divina omnia charismata recipere.

Regimen, & gubernatio populi christiani eodem jure conceditur Episcopis, quo gentes omnes idem regimen in præfectis sacrorum agnoscunt. Eam ob rem in Episcopis constituendis admittuntur electiones, suffragia, confirmationes, institutiones: ubi Episcopus jurisdictionem habuerit, hæc ipsa jurisdictione

risdictio ex moribus, ex consuetudinibus, ex privilegiis, ex præscriptionibus modum capit: in jurisdictione exercenda opportuna sunt virorum prudentum consilia, aliaque hujus generis, quæ origine inspecta inventa sunt humanæ prudentiæ, ac sapientiæ, Divina etiam providentia illustratæ, ac confirmatæ.

### III.

Ampla hæc Episcoporum potestas suis finibus coërcetur in conspectu potestatis Pontificis Maximi, cui illi Divino jure subsunt. Et quando superius dictum est tit. 2. num. 3. Pontificatum Maximum consistere in duobus summis capitibus, quorum primum est, ea gerere, quæ spectant Ecclesiam universam ut universam; alterum supplere defectus, & corrigere excessus inferiorum Antistitum; Episcopi omnes obsequi omnino, & obtemperare debebunt Pontifici Maximo in iis, quæ Ecclesiam universam ut universam spectant; item pati debebunt, ut cum exceßerint, tum a Pontifice Maximo corrigantur; cum defecerint, tum Pontifex Maximus quod agendum ab ipsis fuisset, exerceat. Æquabiliter Episcopi obnoxii sunt Archiepiscopo, seu Metropolitano; quod si Archiepiscopi, seu Metropolitani sint, obnoxii sunt Primati; si Primates sint, obnoxii sunt Patriarchæ; cum digni-

dignitates istæ majores ipsam Pontificis Maximi in multis causis, & pro virili parte derivatam exerant potestatem, quemadmodum superius dictum est tit. 4. num. 2. & 3.

Ut exempla tradam, Episcopi omnes advocati a Pontifice Maximo ad generale Concilium convenire tenebuntur; sicut & Suffraganei provinciæ ad provinciale Concilium ab Archiepiscopo indictum; item ad nationale, quod Patriarcha, vel Primas indixerit. Item Episcopi inferiores pati tenentur, ut ad superiores fiant devolutiones, atque a sententiis appellationes interponantur.

#### IV.

Ampla quoque Episcoporum potestas certis finibus coercita fuit ex utilitate publica in conspectu ceterorum Episcoporum. Utut Divino jure nulli Apostolis, Apostolorumque successoribus præstituti fuerint locorum fines; opportunum tamen duxerunt viri apostolici, ut ad locorum partitionem deveniretur. Dicta fuit hæc divisio diœceseon, qua factum est, ut certa loca singulis Episcopis concederentur, intra quæ potestatem exercerent, extra quæ minime profilirent. Sic consulebatur utilitati singulorum populorum, quos regere certus Episcopus commode posset. Sic etiam confusionis occasio auferebatur,

ne



ne plures essent, qui in solidum, & æquali jure unum eundemque populum regerent.

In hac diœceseon tributione factum est, ut non in quibuscumque oppidis, aut vicis Episcopi constituerentur, sed in urbibus, aut oppidis frequentioribus, ubi Ecclesia major constitueretur, quam cathedra Episcopi dixerunt. Singulis Episcopis Sacerdotes, Diaconi, aliique Clerici in adjutorium dati, sive in urbe, sive extra urbem, quorum officio utilitati fidelis populi peropportune consuleretur, ita tamen semper, ut summum diœcesis regimen, & plena administratio penes Episcopum esset, omnesque Clerici Episcopo suo obsequerentur, quemadmodum & obsequeretur populus universus. Hinc visitationes Episcopales, cura Synodorum diœcesanarum, delectus ministrorum, cura dispensationis bonorum temporalium, & similia bene multa.

#### V.

Summa Episcopalis auctoritatis in eo sita est, quod possit Episcopus in sua administratione ea omnia gerere, quæ nec Primatui Pontificis Maximi, nec majorum Antistitum supra se positorum prærogativis officiant; nec aliorum Episcoporum administrationi diœcesanæ detrimentum ingerant, aut diminutio-

nem adferant. Hac significatione passim dici solet, Episcopos habere intentionem fundaram in jure communi, quibus scilicet ea omnia liceant, quæ aliis reservata non deprehendantur.

## VI.

Quicumque ad Episcopatus honorem promoventur, de quocumque Episcopatu agatur, etiam de Maximo Pontificatu, hoc ordine dignitatem obtinent. Primum fit electio, vel actus non absimilis, qui electioni æquipolleat; succedit confirmatio: ubi quis confirmatus est, consecratur: consecratione facta nihil aliud superest, quam in possessionem inductio.

Electio fit diremptione suffragiorum, confirmatio fit decreto illorum, qui præsident, quo decreto constet & suffragia rite facta fuisse, & electum esse dignum, atque idoneum. Consecratio est collatio Ordinis Episcopalis. Inductio in possessionem est actualis occupatio dignitatis, & jurium Episcopalium.

Electio, confirmatio, & inductio in possessionem sunt actus, quorum forma ex jure gentium derivata est, & origine inspecta dici potest juris humani. Consecratio tota est juris Divini. Inde autem fit, ut electio, confirmatio, & missio in possessionem,  
jura

jura etiam universa electionis, & electorum, confirmationis, & confirmatorum, denique captæ, vel capiendæ possessionis modi, & effectus regantur variis moribus nationum, ac subjiciantur certis definitionibus canonum pro adjunctorum varietate dissimilibus; consecratio autem tota regatur jure Divino, eodem modo, quo collatio ceterorum Sacramentorum.

Primum electionis exemplar agnatum est post Christi adscensum ad cœlos in electione S. Matthiæ. Illud exhibet S. Lucas in Actis. Convenit ad electionem tota multitudo, & cum fors super Matthiam cecidisset, Apostoli manum imponentes, eum Episcopum consecraverunt. Divitis provinciis, & diœcesibus, abiit in ordinariam disciplinam, ut clerus, & populus diœcesanus electionem sui Episcopi facerent. Electione facta, totius Provinciæ Episcopi cum Metropolitano ad electionis confirmationem procedebant, & confirmatione secuta, confirmatum ordinabant. Paullatim exclusus est populus ob turbas, quæ idem concitabantur. Jura populi soli Optimates, ac Proceres exercuerunt. Potissima habita est Principum ratio. Jura etiam totius cleri sensim coërcita fuerunt ad solos clericos cathedrali

Ecclesiæ adscriptos, quos Canonicos vocant. Hæc disciplina dicitur adhuc hodie jus commune Decretalium. Fiebat suffragiorum disremtio: is quem major, & sanior pars elegisset, pro electo habebatur, nisi specialiter certis in casibus cautum esset, ut duas ex tribus partibus concurrere oporteret, ceu in electione Pontificis Maximi, in qua speciale illud receptum est, ut Cardinales vice Capituli cathedralis Ecclesiæ fungantur. Quandoque electio facta fuit per compromissum, videlicet mandato ab eligentibus præbito, ut is, quem certi selecti viri vel omnes, vel major eorundem pars elegissent, pro electo haberetur. Si quidam designaretur, qui dignus quidem esset moribus, & scientia, non tamen esset undecumque idoneus ob certa canonum impedimenta, hæc non electio, sed postulatio dicta est; postulationis autem nomen significat libellum supplicem, quo eligentes rogant superiorem, ut ab impedimento dispenset electum, ejusque electionem facta dispensatione confirmet. Hæc communis juris disciplina recentioribus sæculis immutata pluribus in provinciis est, ob inductas varias reservationes, & ob inita inter Apostolicam Sedem, & religiosos Principes concordata.

Con-

Confirmatio electionis, aut postulationis admissio ex juris communis disciplina a proximo superiore petebatur, nimirum ab Archiepiscopo si de Episcopo, a Primate si de Archiepiscopo, aliquando etiam a provinciali Concilio petebatur. Idem dixeris de Primate respectu Patriarchæ, & de Patriarcha respectu Pontificis Maximi. In Ecclesiâ Romana, quæ maxima omnium, & Princeps est, electio confirmatione non indiguit. Electio ipsa confirmationis locum tenet. Passim in consensu plurium Antistitum merita electi, vel postulati discutiebantur, confirmabatur electio, postulatio adittebatur.

Consecratio fiebat a Metropolitano, si de Episcopo ageretur, & quidem in confesso Suffraganeorum; quod si de Metropolitano ipso consecrando ageretur, senior ex comprovincialibus in confesso ceterorum Archiepiscopum ordinabat, ut plurimum ex Primatis, vel Patriarchæ mandato. Vestigium hujus disciplinæ adhuc hodie dignoscitur in eo, quod tres Episcopi ad consecrationem Episcopalem conveniunt.

Consecratus Episcopus certiores reddebat Episcopos plures consecrationis suæ, ut plurimum ipsum etiam Pontificem Maximum, præsertim si de majore Episcopo, ceu

Primate, aut Patriarcha ageretur. Mittebat suam fidei orthodoxæ professionem, certaque officii sui testimonia exhibebat. In diocesim adveniens, populo toti se gratiosum muneris exercitatione gerebat.

Ex consecratione eam facultatem Episcopus consequitur, quæ pendet ex Ordine Episcopali. Cetera, quæ ad regimen Ecclesiæ spectant, & jurisdictionis esse dicuntur, ex jure Decretalium pendunt ex electione confirmata.

#### VII.

Quandoque Episcopi de una in aliam Ecclesiam transferuntur: equidem olim translationes istæ canonibus improbabantur, & pene æquiparabantur reordinationi, vel rebaptizationi, can. 107. de consecrat. dist. 4. Ambitus nonnullorum Episcoporum ad majores Ecclesias anhelantium severiori interdicto causam dedit. Ubi dispensandum a censura canonum esset, voluit Innocentius III., auctoritatem Pontificis Maximi desiderari in cap. 2. de translat. Episc., qualiscumque tandem in hoc rescripto ratio adjecta fuerit. Ubi translatio fit, Episcopus postulatur, confirmatio, sive admissio postulationis accedit. Admissa postulatione, cum Episcopus nova consecratione non indigeat, nihil aliud superest, quam in possessionem immissio.

#### VIII.

## VIII.

Munus Episcopale perpetuum est: proinde nec sine causa Ecclesia potest Episcopum dimittere, nec sine causa potest Episcopus Ecclesiam abdicare. Ubi iusta causa intercedat, superioris iudicium est, qui dimissionem, aut renunciationem adprobet.

## TITULUS VI.

DE PRÆLATIS EPISCOPO  
INFERIORIBUS.

## I.

**P**RÆLATIS infra Episcopos constituendis causam dederunt privilegia, pactiones legitima auctoritate comprobata, præscriptiones, consuetudines, mandata, & alia hujus generis singularia jura.

Agitur in hac re non de potestate Ordinis Episcopalis, sed de ea, quæ dicitur potestas jurisdictionis, distincta plane a muneribus Ordinis. Porro jurisdictio sacrorum, utut jure Divino confirmata in personis Episcoporum, longe tamen antiquior est Divinis positivis institutionibus; atque ita Divino jure relicta fuit, ut vicissitudinibus subjaceret, atque ex moribus, placitisque probabilibus modum accipere valeret.

## II.

Privilegia in primis certos singulares Prælatos constituerunt. Quid enim, si Pontifex Maximus certo generi fidelium Prælatum quendam causa sacri regiminis præposuerit, ad quem salvis juribus Ordinis Episcopalis, regimen in ceteris pertineret? Quid si Episcopus ipse quemquam simili privilegio in diœcesi sua donavisset?

Privilegia hujus generis deprehenduntur in monasteriis, & in Ecclesiis pluribus conventualibus.

## III.

Pactiones quoque legitima auctoritate confirmatæ Prælatos constituerunt. Quid enim, si quis conventualem Ecclesiam dote adsignata erexisset, ea lege, ut in ea Prælatus non Episcopus designaretur cum certa jurisdictione; & legem hanc ratam habuissent Episcopi, aut Pontifex Maximus? Quid si inter certum clericum, & Episcopum controversia suborta de certis jurisdictionis capitibus vel exercendis, vel non exercendis, transactione fuisset composita ita, ut clerico eidem certæ jurisdictionis species concederentur?

## IV.

Præscriptiones, ac consuetudines, dummodo justæ, legitimæque eandem vim habent

ac



ac privilegia , & pacta , aut saltem in rebus antiquis docent , verisimile esse , olim vel pactum , vel privilegium intercessisse . Idcirco his titulis rite utuntur , qui certam sibi vindicant jurisdictionem .

### V.

Cum Episcopi ea , quæ jurisdictionis sunt , mandare alteri etiam non Episcopo possint , identidem conspiciuntur Prælati , qui ex mandato jurisdictionem explicant .

Hujus generis olim fuerunt in cathedralibus Ecclesiis Archipresbyteri , Archidiaconi , Primicerii , atque his similes : hodie sunt Officiales Episcoporum , Vicarii Generales , aut Foranei .

### VI.

Quando hi omnes , hisque similes tituli , singulares sunt , nemo ex inferioribus Prælati non aliam , neque majorem potestatem explicare potest , nisi eam , quam singulari titulo se adquisivisse demonstrat . Imo & ii tituli singulares , quicumque allegentur , angustam interpretationem patiuntur , ita ut non facile de una ad aliam speciem , ne prætextu quidem similitudinis , extendantur .

Sic dici solet , in regimine Ecclesiæ Episcopos habere intensionem in jure communi fundatam ; quod idem est , ac dicere ,  
nunquam

nunquam a Prælatō inferiori Episcopum excludi, nunquam Prælatum interiorem cum Episcopo etiam concurrere posse, nisi Prælatus inferior perspicuis argumentis doceat, se facultatem nactum fuisse aut Episcopum excludendi, aut cum Episcopo concurrendi.

## VII.

Prælatorum inferiorum, quocumque nomine appellentur, duo genera sunt; alii enim dicuntur *nullius diœcesis*, alii sunt in diœcesi Episcopi constituti. Qui nullius diœcesis sunt Episcopi potestati ordinario jure, & generaliter minime subjacent. Qui in diœcesi constituti sunt, modo singulari privilegio ab Episcopi potestate exempti fuerunt, alterique majori Prælatō, ceu Pontifici Maximo immediate subiecti, modo omnino subjiciuntur potestati Episcoporum.

*Nullius diœcesis* dicuntur Prælati, quod certis loca separata omnino fuerunt a diœcesi Episcopali, habenturque potius tanquam diœcesi Episcopali contermina; in his autem præpositus est Prælatus non Episcopus præditus ordinaria jurisdictione sacrorum. Habenda quidem fuit ratio finitimi Episcopi, ubi de iis ageretur, quæ sint Ordinis Episcopalis, qualis est ordinatio Clericorum, & similia. In ceteris, quæ ad jurisdictionem pertinent,

ampla

ampla est horum Prælatorum facultas, nisi etiam quandoque coërcita aut legibus, aut mandatis fuerit, ceu cum ex. gr. quidam Prælati etiam nullius nequeunt Synodum celebrare, & tenentur ad cuiusdam finitimi Episcopi Synodum convenire. Hinc Prælati *nullius* duplici in specie sunt, quorum alii proprie *nullius* appellantur, proptereaquod universa jurisdictionis munera tuto exercere valeant; alii improprie tales sint, proptereaquod non in iis modo, quæ Ordinis, sed & in quibusdam, quæ jurisdictionis sunt, a certo Episcopo pendeant.

In eos, qui sunt in diœcesi, nec exemptionis privilegium habent, Episcopus libere jurisdictionem exercet, tantum pati debet, ut quas jurisdictionis species adquisiverunt, eas illi exercent, dummodo sine fraude.

Qui exempti ab Episcopali jurisdictione sunt, & libere potestatem suam explicant singularibus titulis adquisitam, & rite potestatem Episcopalem evadunt, nisi qua in parte utilitas publica Ecclesiarum suavit, ut certa sollicitudo Episcopis reservaretur, aut pristina jurisdictio restitueretur. Ut plurimum exempti esse solent Prælati Regularium, & Monachorum. In hac re horum privilegia sollertissime inquirenda, ne facile de una in  
aliam

aliam speciem extendantur; item investigandum, prout controversiæ incidunt, an novis constitutionibus bono publico Ecclesiæ editis certus modus privilegiis adjectus fuerit.

### VIII.

Quamquam in certis Prælatorum inferiorum generibus certus clericalis Ordo requireretur, ac requiratur, qui primigeniæ institutioni respondeat, quemadmodum contingit in Archipresbyteris, qui Ordine presbyterali, in Archidiaconis, qui Ordine diaconali insigniti esse debuerunt; multos tamen Prælatos non Ordo distinxit, sed sola dignitas, solumque munus & in sede collocavit, & jurisdictione donavit. Eam ob rem non semper consecrantur, sed electione designantur, cumque electio confirmata fuerit, tum dignitatem obtinuisse videntur. Aliquando ab Episcopis ipsi instituuntur, aliquando etiam ab Episcopo iis benedicuntur, statim quibusdam cœremoniariis precibus.

Non aliter res se se habere olim poterat in Prælatiis monasteriorum, quo tempore monachi, imo nec ipsi monachorum præfecti clericali Ordine insigniti non erant. His nihilominus jurisdictio concedebatur. Satis erat, si diu fuissent in monasterio probati, & secuta vestium mutatione, ac tonsione professi.

fessi. Cum vestium mutatio, ac capillorum tonsio olim monachorum propria, in clerum traducta fuerit, receptumque, ut clero adscriptus diceretur, quicumque fuisset Episcopali munere prima, uti vocant, tonsura initiatus, recipi quoque debuit, ut non repugnaret, vel illos ipsos, qui clericali tonsura clero adscripti essent Episcopi auctoritate, ad Prælaturas evehi posse, ubi aliud non obsteret, concessa etiam ecclesiastica jurisdictione, ne minor ratio haberetur clericæ, quam monasticæ tonsuræ.

## TITULUS VII.

### DE PAROCHIS.

#### I.

CUM primum Episcopi singulis urbibus dati sunt, atque in adjutorium Episcoporum in civitatenſi Ecclesia ministri plures, præſertim Presbyteri, designati; consueverunt Episcopi Presbyteros adjutores suos mittere extra ordinem in oppida, pagos, & vicos diœcesanos, ut fidem docerent, regulas morum traderent, Sacramenta fidelibus administrarent, ita tamen, ut expleto officio, ad cathedralem Ecclesiam, cui adscripti fuerant, reverterentur.

Sacer-

Sacerdotes isti eam ob rem appellabantur a Græcis *Periodeutæ*, idest Circuito-  
res, seu Circumcursatores.

## II.

Nonnisi serius, idest sub finem sæculi Ecclesiæ quarti, vel sub initium quinti, missi fuerunt ab Episcopis in pagos, oppida, & vicos Sacerdotes, qui in iis perpetuo mererent, & ordinario jure sacra facerent, exemplo veterum, qui extra ordinem mittebantur. Tum erectæ fuerunt Ecclesiæ, seu templa publica; certi quoque singulis Presbyteris assignati fines, ne unus alterum in officio turbaret. Hæc forma fuit, & origo Parochorum, & Parochialium Ecclesiarum.

## III.

Tota ergo Parochorum potestas, universa officia modum suum accipiunt ex mandatis veteribus Episcoporum. Quid olim mandatum fuerit, Ecclesiarum longa, & non interrupta consuetudo demonstrat. Certe jurisdictio sacrorum, & regimen in quacumque Parochiali Ecclesia Episcopo reservata fuit: ab iis, quæ Ordinis Episcopalis sunt, Parochi abstinere omnino debent. Horum proprium est, populum intra fines Parochiæ constitutum pascere verbo Dei, & Sacramentis munire. Siqui in Parochorum adjutorium Episcopali auctoritate

rate Ecclesiis Parochialibus adscripti sunt clerici, horum munera, & officia universa Episcopus dirigit, ac tribuet, prout magis expedire judicaverit.

#### IV.

Apud veteres Corepiscoporum mentio fit. Horum munus non erat a Parochorum munere distinctum. Græca est appellatio, qua significabatur, eos esse villarum, seu rurium Episcopos, idest vigiles administratores. Quandoque isti fuerunt Episcopali Ordine insigniti, & consensu diocesani Episcopi ea, quæ sunt Episcopalis Ordinis, exercebant, quod potissimum usu veniebat, ubi quidam Episcopi a suis Sedibus inique ejecti, in aliorum Antistitum diocesim se recipiebant. Boni Antistites profugis Episcopis certum populum regendum committebant, amplioribus datis facultatibus, quam si regimen Presbyteris committeretur. Firmata Ecclesiarum pace, infrequens esse coepit, Episcopos in hoc officium adsumi. Canones Sardicenis Concilii, quibus decretum est, ut tantum singulis in urbibus singuli Episcopi constituerentur, occasionem præbuerunt, ut in villulis, & pagis nullus amplius constitueretur, qui Episcopali Ordine insignitus esset.

Cum

Cum hoc Corepiscoporum genere non est confundendum genus aliud Corepiscoporum, quod emerfit sæculo Ecclesiæ nono, viris probis, & sacris canonibus improbatum. Quidam Episcopi de honoribus, juribus, & proventibus Episcopalibus sibi maxime complacabant: Episcopalia officia, & munera penitus negligebant. Ne cathedrales Ecclesiæ Pastoralibus officiis destituerentur, curabant, ut Vicarius quidam Episcopus ordinaretur. Hunc Corepiscopum appellabant. Lues hæc fuit in Ecclesia teterrima, vix ferreis sæculis emerfit, statim damnata.

## V.

Itaque Parochi sunt adjutores Episcoporum & quidem in ea Episcopalis sollicitudinis parte, quæ gravissima censeretur, qualis est cura animarum. Quod ipsi adjutores Episcoporum sint, semper verum fuit ordinariam Parochorum institutionem ad Episcoporum officium pertinere. Quod gravissimam Episcopalis officii partem exequantur, mandatum semper fuit, ut ad id munus viri optimi, & undecumque pares designarentur. Ut res ex voto constantissime cederet, in Concilio Tridentino definiendum fuit, ut concursus fere indiceretur, & discussis examinatorum in Synodo designatorum suffragiis, optimus quisque feligeretur. *TIT.*



*TITULUS VIII.*  
 DE CLERICIS OMNIBUS,  
*Prout ex Ordine distinguuntur.*

I.

**O**RDO clericalis a Christo institutus, veluti Sacramentum illud, a quo pendeant Divina mysteria, & Divinarum virtutum operationes, suos habet distinctos gradus, ex quibus universis constat tota ecclesiastica hierarchia, & in unum eximium, ac præstans corpus coalescit. Ordinis hujus veluti apex, & cumulus in Episcopatu est; sed per Episcopatum derivatur in varias classes. Perennis Ecclesiarum traditio in Tridentino Concilio denique comprobata, ac confirmata docet, sacram hierarchiam constare ex Episcopis, Presbyteris, & Ministris.

II.

Qui, qualesque Episcopi sint, principia superius jacta demonstrant. Divinam Presbyterorum institutionem & sacræ literæ, & perennis traditio docet, ipsa etiam exhibet per se potestas presbyteralis, quæ Divinas virtutes in Sacramentis operatur, & quæ proinde non potest esse nisi Divina. Ministros in institutione, ac designatione Diaconorum apo-

*Instit. Pars II.*                      D                      stolica

stolica agnitos in prima Ecclesiæ christianæ origine, tradidit S. Lucas in Actis. Ubi in Ecclesias elegantior quædam forma induci potuit, amplior facta fuit ministeriorum tributio. Hanc ob rem isti hodie numerantur Ordinis gradus: nimirum Episcopatus, Presbyteratus, Diaconatus, Subdiaconatus, Acolythatus, Exorcistatus, Lectoratus, & Ostiarius.

Quandoque in quibusdam Ecclesiis alii gradus recepti sunt, veluti Cantorum, & Psalmistarum; sed hodie hi gradus vix agnoscuntur, proptereaquod Cantorum, & Psalmistarum officium redditum commune sine discrimine fuit universis.

Quatuor priores Ordines, Episcopatus, Presbyteratus, Diaconatus, & Subdiaconatus majores dicti sunt, & sacri; quatuor posteriores dicti sunt minores, & non adeo sacri; ex quo factum est, ut venia facilis concederetur recedendi ab officio illis, qui in minoribus Ordinibus constituti essent. Serius, & nonnisi a sæculo decimotertio Subdiaconatus relatus est inter majores, & sacros, præsertim ex eo, quod jamdiu Subdiaconis lex servandæ continentiae immineret.

Interfuit semper viros idoneos, & dignos pro modo uniuscujusque gradus ad eos gradus

gradus adsumi. Certæ in id leges editæ sunt, quibus aut certa impedimenta statuerentur, quæ obicem ordinationi facerent, aut qualitates designarentur, quæ dignum, & idoneum commendarent. Qui idonei non essent, aut quomodocumque impediti, recentiore ætate dicti sunt *irregulares*; impedimentum autem ipsum dictum fuit *irregularitas*, quasi contra regulas, sive canones.

Debuerunt quoque ordinandi diu probari in Ecclesia. Hinc cautum, ut nemo ad Ordines quoscumque promoveretur, nisi etiam mutatione habitus clerico dignam morum integritatem profiteretur, & quidem apud Episcopum, a quo etiam statò solenni ritu & tonderetur, & vestes clericales acciperet. Hæc clerici inauguratio dicitur *prima tonsura*, & dispositio quædam est ad suscipiendos Ordines. Interea qui in hoc veluti tyrocinio est, sacram jam militiam induisse creditur, clericorum numero ad censetur, & clericorum juribus æque ac privilegiis gaudet, quoties omnia rite facta fuerint, & sine fraude.

### III.

Ordinatio clericorum, quicumque illi sint, jure ordinario ad diocesenum Episcopum pertinet. In hoc exequendo munere sollicitus esse Episcopus debet, ut tot ministros eligat,

non plures, non pauciores, quot Ecclesiarum necessitas, vel utilitas ordinari postulet. Ubi enim pauciores sint, non facile utilitati publicæ consulitur: ubi plures otiosis clericis, proindeque improbis Ecclesia gravabitur. Intererit quoque inquirere in redditus Ecclesiarum, ut non plures ordinentur, quam redditibus Ecclesiarum sustentari valeant. Si Ecclesiæ pauperes sint, & pluribus ministris indigeant, tunc ordinandi facile erunt, qui se exhibeant, data fide, ut ipsi vel omnino suis stipendiis militent, vel de suo suppleant, quod stipendiis ecclesiasticis deest. Hanc hodie vocant ordinationem titulo patrimonii factam. Semper vero quicumque clerici ordinantur, certis Ecclesiis adscribendi sunt, in quibus sacrum munus exercent.

#### IV.

Singularia, quæ unicuique gradui competunt, officia non aliunde clarius, quam ex formula ordinationisprehenduntur. Ordinationis formulas recentiores exhibent hodierna Pontificalia. Cum his formulis etiam consonant veteres relatæ a Gratiano in dist. 23. can. 7. 8. 11. 15. 16. 17. 18. & 19. Paucis dixero, Ostiariis custodiam Ecclesiæ committi; Lectoribus sacras lectiones in Ecclesia mandari; Exorcistas juberi, ut exorcismis cate-

catechumenos, five energumenos præparent; Acolythis cûram luminarium, & vini ad missarum sacrificia dari; Subdiaconos manum adjutricem porrigere debere Diaconis in ministerio; Diaconos in subsidium advocari Presbyterorum, ut ad sacram mensam administrent, jussu Presbyteri Eucharistiam dispensent, atque etiam, ubi opus, solenniter baptizent; Presbyteri præter solenne Baptisma, etiam Eucharistiam conficiunt, Sacramentum Pœnitentiæ administrant, infirmos ungunt, & nuptiis benedicunt. Episcopi denique omnia Divina mysteria conficiunt, proprio jure baptizatos confirmant, & Ordines conferunt.

Multa de his Ordinis gradibus scholastici disputant; nimirum an singuli Sacramenta sint, an singuli distinctum imprimant characterem, & similia. Sine fructu tempus, & laborem infumunt de his disputantes. Certum illud est, singulos hosce gradus hierarchiam constituere. In hierarchiæ constitutione Sacramentum Ordinis a Christo institutum agnosci; Sacramentum Ordinis characterem imprimere, nec repeti amplius posse semel factam collationem. Cum hæc animo teneantur, tum satis erit studiis utilibus factum,

Olim qui ad unum gradum promovebatur, non ideo censebatur advocatus ad superiores: tantum, ubi superior Ordine eligendus erat, quandoque ex inferioribus Ordinibus eligebatur, is nimirum, qui magis dignus, & idoneus videretur. Nemo conquerebatur, quod diu, quod etiam perpetuo in Ordine inferiore semel suscepto ministraret. Contentus munere suo, quisque officium exequabatur. Ita res sese habebat, quemadmodum hodie sese habet, ubi Episcopus eligendus sit. Inter Presbyteros Episcopus eligitur; non ideo tamen quis Presbyter ordinatur, ut Episcopatum deinde obtineat. Hodie in Ordinibus Episcopatu inferioribus alia invaluit disciplina. Qui in inferioribus gradibus ordinatur, eo consilio ordinatur, ut, nisi aliud obsit, ad superiores gradus ascendat, donec in Sacerdotio conquiescat. Prima occasio hujus disciplinæ orta est ex eo, quod canonibus, non adeo tamen antiquis, cautum fuerit neminem provehi ad gradus superiores, nisi fuerit in Ecclesia in inferioribus apprimè exercitatus, atque probatus, quod factum initio fuit, ne imperiti, & rerum clericalium ignari statim ad summum Pontificatum prosilirent. Altera occasio fuit, quod officia minorum Ordinum non  
adeo

adeo reservata certis clericis temporum lapsu fuerint, sed aliis reddita communia, quandoque etiam sine discrimine, cum de minoribus Ordinibus ageretur.

## TITULUS IX.

### DE CLERICIS,

*Prout ex officiis, seu beneficiis distinguuntur.*

#### I.

**A**DAUCTA populi christiani multitudo, adauctus numerus Ecclesiarum in causa olim fuit, ut Episcopi sub Pontifice Maximo constituti, ceteroquin Ordine pares, officiis, & beneficiis distinguerentur. Inde constituti Archiepiscopi, seu Metropolitani, Primates, Patriarchæ. Idipsum contigit in clericis universis sub Episcopo Ecclesiæ ministrantibus. Quos Ordo pares fecerat, officia, & beneficia distinxerunt. Non amplius heic memoro singularia officia Parochorum, utpote de quibus jam sermonem institui. Tantum dicam Parochis Sacerdotes omnes pares esse Ordine, quædam tamen fuisse sacerdotalia munera Parochis reservata. Extra parochiales Ecclesias certa quoque munera demandata sunt certis clericorum personis, quasi

non tam Ordini, quam designationi muneris cohærent.

## II.

In Ecclesiis cathedralibus cum plures designati fuissent Sacerdotes, qui in sacris ministeriis operam darent in Episcopi adjutorium, utile visum fuit, illis præficere Sacerdotem unum, quem Archipresbyterum nominaverunt. Eadem ratione Diaconis præfectus est unus sub nomine Archidiaconi, Notarii unus sub nomine Primicerii, scholæ Cantorum unus, vel plures investis nominibus Cantorum, Præcentorum, Succentorum. Cum juniores clerici essent in disciplinis, sacrisque literis erudiendi constituti sunt Præceptores, quos modo Magistros, modo Theologos, modo generali nomine Scholasticos appellaverunt. Erat in cathedralibus singulis seligendus Sacerdos, ad cujus specialem curam spectaret animarum curam habere in plebe. Hunc Plebanum nuncupaverunt. Quandoque expediebat, ut vita Episcoporum undecumque spectabilis esset, atque ab omni suspitione aliena. Comites dabantur Episcopo, qui de ejus moribus quotidianum testimonium ferre possent. Comites istos, ac testes una cum Episcopo habitantes, dicti fuere Syncelli apud Græcos, Cum clerici cathedralis



dralis Ecclesiæ in communem vitam coiverunt, designandi fuerunt, qui collegio præessent. Hos dixerunt Abbates, Priores, Præpositos, Decanos. Cura ecclesiastici peculii alicui erat demandanda, ne Episcopus temporalibus curis a sacris majoribus officiis distraheretur. Idcirco constituti Œconomi, Curatores, Syndici. Supplices libelli Episcopo cum offerendi fuissent, edendaque responsa, tum huic muneri præfectus est Cancellarius. Ut peculium, & suppellectilia sacra ad Divinum cultum destinata custodirentur, designata sunt officia Thesaurariorum, Custodum, Sacristarum. Ut ad tribunal Pœnitentiæ accedentibus præsto Sacerdos esset, Pœnitentiarius constitutus est. Singulis præstitutum fuit, ut eo Ordine quisque insigniretur, qui officio congrueret.

### III.

Quod in cathedralibus Ecclesiis triburione facta statutum fuerat, facile traductum est ad Ecclesias quascumque conventuales, modo in totum, modo quadam in parte, prout loci qualitas, & Ecclesiæ dignitas postularet.

### IV.

Hinc prodiit partitio dignitatum, personatum, officiorum, & canonicatum simplicium. Dignitates dictæ sunt illa officia, quibus

quibus certa concessa est in quasdam personas jurisdictio. Ubi tantum prærogativa loci, & sedis sine jurisditione data est, ibi dictus est personatus: si absque jurisditione, & absque prærogativa loci, & sedis speciale quoddam munus mandatum sit, officium appellatum est. Ceteri, qui sine jurisditione, sine prærogativa loci, & sedis, & in communi officio constituti sunt, ii Canonorum nomen habuerunt, quasi consignatorum in canone, sive matricula Ecclesiæ.

Multa hujus generis ad cathedrales, & conventuales Ecclesias traducta sunt ex disciplina monasteriorum, in quibus Monachi ex officio, non ex Ordine distinguebantur.

#### V.

In Ecclesiis non conventualibus totidem fere officia constituta sunt, quorū beneficia erecta. Singulares foundationum tabulæ officia quæque, & beneficia distinguunt. Optandum semper est, ut nemo ex clericis sine certo officio sit. Utinam nunquam existerint, qui nomine officii clericalis venire scripserint unius, ut vocant, Breviarii recitationem. Certe omnium clericorum officium generale est, Episcopos, & animarum rectores consilio, atque opera pro virili parte adjuvare, quamquam recentioribus sæculis præcipuas consilii partes sibi

sibi vindicaverint Capitula Ecclesiarum cathedralium, quæ ideo dicuntur unum quodammodo corpus cum Episcopo constituere.

# VI.

Officiorum clericalium tributio ex Episcoporum auctoritate facta olim fuit. Hæc potestas perpetua fuisse dignoscitur. Est enim portio gravis ecclesiastici regiminis, quæ Apostolorum successoribus maxime congruit. Inde fuit ejectionem beneficiorum, atque institutionem beneficiariorum Episcopis ordinario jure competere.

## TITULUS X.

### DE MONACHIS.

#### I.

**N**OMEN Monachorum græcum est, & significat eos, qui in recessu, & solitudine degunt, intenti in contemplationem rerum Divinarum. Horum origo est antiquissima; consueverunt enim christiani primis Ecclesiæ sæculis, ubi præsertim ab ethnicis vexarentur, latebras quærere, ibidemque rerum cœlestium studio vacare, spretis curis temporalibus, nisi de iis ageretur, qui clero adscripti laboriosam vitam in urbibus, locisque frequentibus ducebant inter prædicationes,

nes, atque doctrinas, aut nisi de iis ageretur, qui parati erant ad martyrium, & vexationes patientissime tolerandas.

## II.

Ut de iis fileam, qui vitæ monasticæ prætextu fraudes, & improbitatem simulabant, triplex fuit Monachorum genus. Alii soli in sylvis merebant, arbitrio suo, & voluntati penitus indulgentes; isti dicebantur Eremitæ, idest loca erema incolentes. Alii adscitis focis communem vitam ducebant, sese committentes regimini unius sub nomine Abbatis, sive Patris, aut Præpositi. Hi dicebantur Cœnobitæ, quasi in Cœnobio viventes. Alii denique diu in Cœnobio probati, perfectioris vitæ ineundæ causa, petita, obrentaque ab Abbate, seu Præposito facultate in erema loca sese recipiebant, & solitudinem profitebantur: hi dicebantur Anachoritæ.

Multos ex his Monachis aluit Ægyptus vetustis Ecclesiæ sæculis; qua in provincia multi sanctitate, & virtutibus omnigenis conspicui floruerunt.

## III.

Non tunc unitas, aut similitudo vestium, non eadem regula, non certa, & conceptis formulis edita professio Monachum faciebat. Pro veste erat habitus utcumque, dummodo  
ad

ad modestiam, compositus. Pro regula erat Præpositi consilium, aut cum Præpositus de-  
esset, honestas ipsa, & sanctimonia vitæ,  
contemplatio assidua rerum Divinarum, &  
in bonis operibus jugis exercitatio. Vicem  
professionis tenebat maturum propositum, a  
quo cum quis recederet, non de apostasia,  
sed de culpabili inconstantia redargueretur.  
Nullus inter ipsos erat clericus, nisi forte  
Episcopi arbitrio quidam ordinaretur ad hie-  
rarchicam monasterii curam. Si quis Sacer-  
dorio dignus esset, potius ad Ecclesias advo-  
cabatur. Cum Sacramentis opus Monachi  
haberent, aut certis diebus ad Ecclesiam con-  
veniebant, aut ab Episcopo missione sacro-  
rum administratorum recreabantur. Studiis Di-  
vinarum literarum sæpe vacabant. Utinam  
nunquam privata scientia inflati simplicium  
fidem turbavissent, quod evenisse quarto Ec-  
clesiæ sæculo historia ecclesiastica docet.

#### IV.

Primus in Occidente formam certam Mo-  
nachis dedit S. Benedictus sæculo Ecclesiæ  
sexto. Certam regulam ipse composuit, quam-  
quam monasterio, cui ipse præerat, singula-  
rem. Benedictum alii secuti sunt; tum vero  
& habitus similitudo, & ejusdem regulæ pro-  
fessio, & in monastica vita perpetuo consi-  
stendi

stendi firmum propositum Monachos faciebat. Hinc inducta ante professionem tyrocinia, certæ datæ Abbatibus, sive monasteriorum Præfectis potestates. Studia Divinarum literarum, contemplatio cœlestium rerum vitam monasticam distinguebant; corpus vigiliis, & labore manuum exercebatur. Sic Monachi omnes facile in vitam cœnobiticam coa-luerunt.

## V.

Interea Monachi erant laici; attamen cum vita illorum esset a sæcularibus curis omnino aliena, & secreta, voluit Justinianus Imperator, ut in singularem curam, ac sollicitudinem Episcoporum & Monachi, & monasteria reciperentur. Relicta Abbatibus, & monasteriorum Præfectis ea potestate, quæ similis esset paternæ in regenda familia, quidquid jurisdictionis erat, publicique regiminis, id totum in Episcopos collatum est.

## VI.

Visi sibi sunt Episcopi eandem ipsam valere se in Monachos, & monasteria explicare potestatem, qualem in clericos, & Ecclesias explicabant. Erectis ad monasteria Ecclesiis, non solum constituebant in illis Sacerdotes sacra peracturos, sed etiam Episcopi ipsi ad illas sacra solennia indicebant certis festis

stis diebus, & iccirco frequentia populi quies, & solitudo Monachorum in eremis locis degentium turbabatur, Monachos sæpe a monasteriis avocabant irrequisitis Abbatibus, ut eos Ecclesiis adscriberent, unde nonnihil reſto monasteriorum regimini detrahebatur. Redditus monasterii sibi magna in parte vindicabant in Monachorum dispendium. Gregorius Magnus, qui & Monachus olim extiterat, harum rerum apprime conscius, initio septimi sæculi hæc Episcoporum facta coërcuit, jussitque, ut Sacerdos quidem Episcopali auctoritate ad Monachorum subsidium constitueretur in Cœnobiis, sed Episcopi abstinerent a Missis solennibus, a figenda Episcopali sede, ab avocandis Monachis irrequisito Abbate, & a bonorum monasterii derivatione. Prima hæc fuerunt monasticarum exemptionum initia, quibus ceteroquin attentis, multa adhuc erant capita jurisdictionis, quam Episcopi in Monachos, & monasteria exercebant.

## V II.

Interea cum nova monasteria in dies erigerentur, fundatores ipsi curabant, ut ab Episcoporum potestate eximerentur. Exemptionem hanc Episcopi ipsi suis decretis confirmaverunt; modo confirmaverunt, ratamque habue-

habuerunt majores Antistites, ipse etiam Pontifex Maximus. Nondum tamen generalis exemptio erat: singularia monasteria singulares exemptionis titulos, & modos exhibebant.

### VIII.

A sæculo Ecclesiæ undecimo cum mores essent in Ecclesia corruptissimi, incessit probos omnes studium, ut homines ad literarum Divinarum studia, atque ad pietatis opera excitarentur. Hinc novi diversis editis regulis erecti sunt Monachorum ordines; quod & clericis occasionem præbuit, ut æquabilem vitam inirent institutis collegiis. Ordinum monasticorum institutio tam multiplex fuit, ut tandem decernere oportuerit, ne irrequisito Pontifice Maximo novi Monachorum Ordines instituerentur. Id cavit Lateranense Concilium sub Innocentio III. in cap. ult. de relig. domib. An exitus voto responderit, rerum inde gestarum experientia patefecit.

### IX.

Interea ad cleri subsidium Monachi e sylvis, eremisque locis, ad urbes, atque ad oppida etiam frequentiora migrarunt. Ibidem constituta Cœnobia; Monachi sacris Ordinibus initiati certam cleri partem constituere cœperunt, erectis ad monasteria publicis templis



plis, ad quæ fideles sacrorum causa convenirent. Qui in locis eremis adhuc degebant villarum, & pagorum curam ecclesiasticam receperunt, etiam suscepto parochiali officio, atque, ubi ampli essent monasterii, & prædiorum monasticorum fines, recepto officio penæ Episcopali. Faciles initio fuerunt Episcopi in indulgendis officiis; postquam vero Monachi exemptionis privilegiis se communiri curarunt; serius Episcopi agnoverunt, diocesana jura plurimum imminui debuisse. Cum ad Concilium Tridentinum deventum est, auditæ sunt Episcoporum, & cleri querimoniarum. Multa in eo Concilio Episcopis restituta sunt; aliqua restituta recentioribus sæculis ex constitutionibus Pontificum Maximorum, quibus coercita sunt privilegia exemptionum.

Quod de Monachis dictum est, idipsum intelligitur de Clericis pluribus Regularibus, qui recentioribus sæculis collegia erexerunt instar monasteriorum, junctaque vita clericali, & monastica privilegia exemptionum impetraverunt.

#### X.

Ea, in quibus hodie Monachi, ac Regulares omnes distinguuntur, sunt præcipue vota solennia servandæ perpetuo continentiae,  
*Instit. Pars II.* E pau.

paupertatis, & obedientiæ erga eum, qui Præpositus Cœnobio sit. Quidam etiam Ordines sunt, qui paupertatem in communi profitentur, atque mendicata stipe alimenta quærunt. Exterioris quoque habitus forma singulos Ordines distinguit. Nemo ad professionem admittitur, nisi rite probatus. Qui professus est, perpetuo debet in monasterio consistere, nunquam aut professionem deserturus; aut a monasterio deijciendus, nisi tales causæ sint, & gravissimæ, quæ canonibus comprobantur.

## *TITULUS XI.*

### DE SANCTIMONIALIBUS.

#### I.

**Q**UÆ de Monachis dicta sunt, ea fere omnia Sanctimonialibus conveniunt. Origo prope eadem est; eadem institutio. Infirmior sexus in iis, quæ mulieres decent, imitatus est sexum nobiliorem. Quæ viris propositæ fuere regulæ, eadem propositæ fuere foeminis, siquæ ex istis Divinarum rerum contemplatione delectatæ a negotiis sæcularibus abscedere, & in recessu vivere voluissent.

#### II.

## II.

Vitæ severioris professio occasionem Justiniano Imperatori præbuit, ut Sanctimonialium vita, & jura, & onera universa, exemplo Monachorum, in Episcoporum sollicitudinem conferrentur. Episcopi ab ipsa Sanctimonialium origine & curatores bonorum, & Sacerdotes sacra peracturos in Sanctimonialium monasteriis constituerunt, quæ disciplina ut plurimum etiam hodie viget. Relicta Abbatissæ, sive Præpositæ monasterio quadam matrisfamilias potestate, tota jurisdictio, vigilantia, ac sollicitudo penes Episcopum est.

Quædam tamen virginum monasteria exemplo virorum Monachorum quandoque postulaverunt, ut ab Episcopali potestate eximerentur, & Prælato Regulari subjicerentur, aliquando etiam majori Amistiti, ceu Pontifici Maximo. Hujus generis obtenta privilegia recentioribus sæculis, præsertim post Concilium Tridentinum, certis modis coercita sunt, ad instaurandam Episcoporum potestatem. Ubi controversiæ incidant, non tam privilegiorum tenor spectandus est, quam leges, & constitutiones, quæ privilegiis certum modum adjecerunt.

Muliebris sexus infirmitas singulare illud postulavit, ut Sanctimonialium monasteria certis cautionibus ædificarentur. Jam ab Justiniani temporibus abolitus usus fuit monasteriorum duplicium, in quibus scilicet degerent & Monachi, & Moniales. Deinde consultum fuit, ut locus monasterii erigendi talis esset, in quo tuta foret, & secura Sanctimonialium vita: nimirum non procul ab urbibus, vel frequentibus oppidis monasteria ædificarentur; ipsa etiam in urbibus, & frequentibus oppidis ædificata monasteria mœnibus cingerentur, ac munirentur. Hanc appellaverunt clausuræ legem, quam severiorem reddidit Bonifacius VIII. in cap. 1. de statu Regular. in 6., confirmavit Tridentinum Concilium in sess. 25. de Regular. cap. 5., quibus accesserunt recentiorum Pontificum Maximorum constitutiones.



## TITULUS XII.

### DE VICARIIS PONTIFICIS MAXIMI IN URBE.

#### I.

**S**ic absoluta descriptione singularium personarum, quæ singularia jura habent in ecclesiastica hierarchia, vel in ea conditione, quæ proxime ad ecclesiasticam hierarchiam accedit, & quidem vi proprii officii, ac status, aliæ sunt commemorandæ personæ, quæ alienum officium in hierarchia gerunt, & Vicarii appellantur.

Sunt isti vel Vicarii Pontificis Maximi, vel Vicarii Episcoporum, vel Vicarii Parochorum. Vicarii autem Pontificis Maximi vel in urbe Roma constituuntur, vel extra urbem. De singulis in hoc, & sequentibus titulis agendum ex ordine est.

#### II.

Præterquamquod Romanus Antistes Pontificatum Maximum in universa Ecclesia gerit, in Ecclesia occidentali unicus Patriarcha dici potest, Primatum quoque habet, & Archiepiscopatum singularem; suam quoque habet diocesim a ceterorum Episcoporum diocesi distinctam, videlicet Romanam, in qua gerit Episcopatum. In tanta sollicitudinum

amplitudine debuit, ac debet identidem aliena opera uti, eamque ob rem plures habet sui ministerii adjuutores, præsertim in urbe Roma.

### III.

Ad exercendam æque diœcesanam, ac totius Ecclesiæ curam, utitur Congregationibus selectorum in urbe virorum, ac præsertim Cardinalium.

Quæ, quales, quantæque sint Congregationes in adiutorium Pontificis Maximi erectæ, in sequente libro demonstrabitur.

### IV.

Ad exercendam diœcesanam potestatem, nimirum urbis, & diœcesis Romanæ, suum Vicarium constituit, ut plurimum ex Cardinalium numero electum. Non dissimilis est hujus Vicarii ratio, ac sit ratio Vicariorum Episcopaliū. Tota jurisdictio ex mandato Pontificis Maximi pender, nisi quædam sint communi jure, aut moribus recepta singularia.

Singulare illud est, ut vita functo Pontifice Maximo, Vicarii jurisdictio diœcesana adhuc perduret. Singulare etiam est, ut non solum Romanæ diœcesis clericos ordinet, sed & clericos Episcoporum suburbicariū, si Episcopi suburbicarii vel per se,  
vel

vel per suffraganeos Episcopos, siquos habent, ipsi sacros Ordines non sint collaturi. Eam ob rem Cardinalis Vicarius Episcopali Ordine insignitur.

### *TITULUS XIII.*

#### DE VICARIIS PONTIFICIS MAXIMI EXTRA URBEM.

##### I.

**Q**UOTQUOT extra urbem a Pontifice Maximo Vicarii constituuntur, non diocesanam Romani Antistitis potestatem explicant, sed eam, quam Romanus Antistes explicare potest vel ut Archiepiscopus, vel ut Primas, vel ut Patriarcha, vel ut maximum gerens Pontificatum, pro modo muneris Vicario demandati, pro modo causæ, ob quam Vicarius constituitur, pro ratione provinciæ, ad quam Vicarius mittitur.

##### II.

Quicumque designentur Vicarii, & quocumque titulo, universam potestatem metiuntur, & metiri debent ex viribus mandati. Præprimis observandæ sunt conceptæ mandatorum formulæ: ubi formularum faciendæ sit interpretatio, inquirendum erit, quid jam in similibus definitum, aut generali lege, aut

rescriptis fuerit: ubi nihil expresse definitum adpareat, consuetudo diuturna rerum plurium gestarum erit accurata Pontificiæ voluntatis interpres. Certe pro qualitate, & characteribus variis personarum, quibus vices suas solent Pontifices Maximi mandare, modo latior, modo angustior interpretatio fieri solet.

### III.

Triplicis generis recenferi solent Vicarii; quorum alii appellantur Vicarii nati, alii missi, alii a latere.

### I V.

Vicarii nati dicuntur Antistites quarundam Ecclesiarum majorum, quibus in perpetuum consueverunt Pontifices Maximi vices suas committere, itaut in ea provincia Pontificis Maximi potestatem exerceant. Hæc Vicariatus potestas Sedi potius, & Ecclesiæ, quam personæ datur, eamque ob rem transit in successores dignitatis, ac Sedis. Horum potestas non longe distat a potestate Archiepiscoporum, aut Primatum.

### V.

Missi dicuntur, qui legatione Pontificia funguntur, & totidem specie sunt, quot esse possunt legationis causæ. Ut plurimum mittuntur ad Principes. Apud veteres isti

ap-



appellabantur Apocryfarii; quandoque dicti sunt responsales, quod cum mandata Pontificia apud Principem exhibuissent, tum deinde responsa Principum Pontifici Maximo referebant. Solent in multis provinciis Pontifices Maximi Legatis ad Principes missis certa Pontificiæ potestatis munera demandare, præsertim ad gerendam sollicitudinem erga eos, qui exempti sunt abs jurisdictione Ordinariorum.

## VI.

Cum Cardinales legatione Pontificia funguntur, ii appellantur Legati a latere, quasi cum membra dicantur unum corpus cum Romano Antistite conficientia, e latere Pontificio quodammodo prodiisse intelligantur. Ob eximiam Cardinalatus dignitatem a ceteris Legatis missis secernuntur, eandemque ob causam solent a Pontifice Maximo amplioribus cum facultatibus mitti.



## TITULUS XIV.

## DE VICARIIS EPISCOPORUM.

## I.

**I**AMDIU consueverunt Episcopi certis selectis clericis vices suas demandare in dioecesana sollicitudine. Amplitudo rerum in dioecesi gerendarum id suavit. Et quidem id eousque & probatum, & probandum fuit, quousque non eam ob causam Episcopi se, suamque operam omnino subducant.

Hanc ob causam sæculo nono, & decimo improbatum, damnatique fuerunt Corepiscopi illi civitatenes, de quibus mentionem superius feci in tit. 7. num. 4. Hos ideo Episcopi designaverant, ut in eisdem translata omni cura, otio fruerentur.

## II.

Cum primum vices suas Episcopi mandare cœperunt, non certas personas ad nutum amovibiles designarunt, sed certa perpetua munera in Ecclesiis constituerunt, ad quæ cum certam personam elegissent, tum Vicarium in ea parte sibi constituuisse intelligerentur. Hinc potius dignitas ipsa veluti vicaria, quam persona intelligebatur, & vices uni commissæ ad successorem in dignitate commebant.

Sic

Sic constituti olim fuerunt in cathedralibus Ecclesiis Œconomi, qui vice Episcopi res temporales Ecclesiæ curarent; Archipresbyteri, Archidiaconi, Primicerii in cathedralibus, qui vice Episcopi Presbyteros, Diaconos, ac Notarios dirigerent; Archipresbyteri rurales, qui extra cathedralem vice Episcopi certo Parochorum numero præessent, atque his similes.

### III.

Succeffione temporum selecti illi viri, qui vi propriæ dignitatis vicariam operam Episcopo præstabant, se ordinariam potestatem nactos fuisse censebant. Longa consuetudo, ac præscriptio loco tituli videbatur, adeout quandoque adversus Episcopos ipsos de potestate contenderint. Maluerunt Episcopi alios sibi Vicarios adsciscere, quos uti pro lubitu assumerent, ita pro lubitu removerent. In civitatibus Vicarios Generales concessa amplissima potestate constituerunt, modo unum, modo plures, modo tributis officiis. Quum unum rebus sacris præficerent, alterum judiciis, priorem *Vicarium*, posteriorem *Officalem* appellantes. Extra urbem Vicarios quosdam constituerunt lubitu etiam suo removendos, quos *Vicarios Foraneos* nominaverunt.

Exinde

Exinde dignitates cathedralium Ecclesiarum, & Archipresbyteratus rurales sua nomina retinuerunt, officia amiserunt, nisi de quibusdam minoribus muneribus ageretur, aut de certa jurisdictionis specie exercenda, quam certis singularibus titulis adquisitam, sibi confirmandam pactionibus, rebusve judicatis curavissent.

#### IV.

Vicariorum jurisdictio, ac potestas tota pender, ac modum accipit ex Episcopi mandato. Longe major est Vicariorum Generalium, quam Foraneorum. In generali mandato graviora non continentur, hæc enim indigent speciali mandato. Ubi de interpretatione mandati agitur, considerandus præprijis mandati tenor, ac formula. Deinde quid leges, & decreta de interpretandi ratione definiverint. Consuetudo denique mandantium erit æquissima voluntatis Episcopalis interpres.



## DE VICARIIS PAROCHORUM.

## I.

**D**UÆ causæ sunt, ob quas Vicarii Parochorum designantur. Prima est, cum Parochus facile non potest in suum ministerium incumbere; altera est, cum Parochus solus minime sufficit ad curam animarum exercendam. Exempla prioris causæ multa sunt. Quid enim, si Episcopatus, aut alteri dignitati, vel officio in cathedrali Ecclesia constituto adnexa sit cura animarum in certum populum, & plebem longe distitam ab Ecclesia cathedrali? Quid, si ad Capitulum, vel Collegium cura animarum pertineat, nec facile per totum Capitulum, vel Collegium exerceri possit? Quid, si cura animarum in una parochia referatur ad plures vicos, nec par sit unus Sacerdos omnibus? In his, & similibus casibus Vicarii parochiales constituuntur; imo & constitui solet Vicaria tanquam munus perpetuum, & simile parochiali officio. Episcopus, Dignitas, Capitulum, Parochus procul degens dicuntur gerere curam animarum habitu, Vicarius constitutus actu dicitur curam animarum exercere. His in casibus Vicarii parum distant a Parochis;

&

& in usu parochialium officiorum tanquam veri Parochi habentur, integris manentibus juribus, ac prærogativis, quæ in institutione Vicariæ reservatæ sunt Parocho *primitivo*, ut vocant., idest illi, qui curam animarum habitu retinet. Exemplum alterius causæ est, ubi in una parochia populus auctus est, aut tanta populi multitudo, ut unius Sacerdotis officium non sit sufficiens. Hac in specie vel unus, vel plures constituuntur adjuutores, qui una cum Parocho, & sub Parocho ipso curam animarum exerceant.

### II.

Ad Episcopos ordinario jure spectat in eas causas inquirere, atque, ubi opus, Vicarias erigere, Parochos adigere, ut Vicarios sibi adjungant, Vicariorum eorundem electorum personas probare, quandoque etiam in officio instituere. •

### III.

Ex Vicariis Parochorum alii sunt perpetui, alii amovibiles ad nutum. Frequentius Vicarii perpetui constituuntur, ubi cura animarum adnexa est Capitulis, Collegiis, Dignitatibus; rarius ubi ex multitudine populi Parochi adiguntur, ut sibi Sacerdotes adjuutores adjungant.

## DE COADJUTORIBUS.

## I.

**A**D Vicarios proxime accedunt Coadjutores, illi nimirum, qui constituuntur, ut clericum certis officiis gerendis addictum, alias suo muneri satisfacere non valentem adjuvent. Æque dantur Episcopis, Dignitatibus, Canonicis, ac Parochis.

## II.

Causæ dandorum Coadjutorum sunt infirmitas clerici certo officio addicti, &, quæ non procul est ab infirmitate; ipsa senectus: ut paucis dicam, quotiescumque clericus par esse officio nequit, alias autem æquum non est, clericum, qui diu in Ecclesia ministravit, a suo officio, ac beneficio removeri.

## III.

Si causa Coadjutoris constituendi perpetua est, Coadjutor perpetuus datur. Si spes est futurum, ut causa cesseret, ad tempus vel certum, vel incertum Coadjutor constituitur, donec nimirum coadjutus vacare suo muneri valeat.

## IV.

Coadjutores perpetui quandoque constituuntur, ita, ut jus habeant futuræ successionis.

nis. Res non sine gravi periculo, ob votum facile gliscens inter homines infirmos optandæ mortis alienæ, item ob frequentes occasiones, quæ inde emergunt, successionum, aut familiarium, aut pene hereditariorum in beneficiis, dignitatibus, officiisque sacris. Has ob causas sæpe Concilia ecclesiastica intercesserunt, ut hæc coadjutoriarum genera damnarent. Si gravis quædam causa nihilominus id fieri postulet, qui de causa cognoscit, toto studio in id incumbere deber, ut, quoad fieri possit, ea & animarum, & Ecclesiarum pericula avertantur.

Coadjutor datus perpetuo cum jure futuræ successionis, loco titularis habetur officio tenus, locum sibi vindicat coadjuti, & honores; a redditibus tamen beneficii abstinet. Coadjutoribus temporalibus quædam reddituum portio tribuitur.





## TITULUS XVII.

## DE RELIGIOSIS PRINCIPIBUS,

*Vel Optimatibus, ac Proceribus Reipublicæ;  
Defensoribus, Advocatis, & Patronis  
Ecclesiarum.*

## I.

**N**ON Ministris sacrorum modo, verum etiam Patronis, ac Defensoribus Ecclesia, & ecclesiastica ratio universa indiget. Hinc jure optimo Paullus Apostolus supra commemoratus tit. 1. *Opitulationes* inter Ecclesiæ gradus recensuit.

Patronis quibuscumque, & præsidium Ecclesiæ porrigentibus sui quoque sunt gradus alii aliis majores.

## II.

Præcipua ratio semper habita fuit religiosorum Principum. Statim ac enim Imperatores, ac Reges, ac Rerumpublicarum Duces, ac Curatores universi nomen Christo dederunt, nihil ipsis antiquius fuit, nihil magis Ecclesiæ ipsi dulcius, quam ut Ecclesia, & res ecclesiasticæ universæ eorundem clientelæ, ac patrocínio commendarentur. Perennis fuit ista traditio, & perpetuis canonibus comprobata.

*Instit. Pars II.*

**F**

**In**

In hanc rem prostant testimonia Leonis Magni, Iſidori Hiſpalenſis, & Joannis VIII. in can. 20. 21. & 25. cau. 23. qu. 5. Leo idem Magnus ita ſcribebat ad Leonem Auguſtum epiſt. 125. editionis Queſnellianæ: *Debes incunſanter advertere Regiam poteſtatem tibi non ſolum ad mundi regimen, ſed maxime ad Eccleſiæ præſidium eſſe collatam*; quod ipſum repetebat in epiſt. 133., imo ut designaret, quo patrociniū collimaret in ep. 122., appellavit Imperatorem Chalcedonenſis Concilii *Cuſtodem*. In canone 5. vetuſtiſſimi Antiocheni Concilii decernitur, Principum vindictæ ſubefſe clericum Eccleſiæ turbatorem. In can. 4. diſt. 17. ſub nomine Gregorii Papæ rogantur Principes, ut puniant eos, qui poſt baptiſmum a Catholica fide receſſerint, & in can. 20. cau. 11. qu. 1. ut coërceant Epiſcopos reos violatæ canonum diſciplinæ. Hanc prærogativam ſibi ſæpe adſeruit Juſtinianus in ſuis Novellis, præ ceteris in Nov. 137. princ., & cap. 1., & in Nov. 57. Hiſce formulis pleni undique ſunt canones, ac præ ceteris Capitularia Francorum Principum. Ipſi etiam Pontifices Maximi ſæpe ac ſæpius, ubi gravis cauſſa id expoſceret, ad religioſorum Principum fidem, tutelam, ac patrociniū confugerunt.

## III.

Quando vero Principes summi Magistratibus suis, selectis Optimatibus, ac Proceribus, unicuique pro virili parte, potestatis suæ exercitationem committunt, pro eadem virili parte selecti ipsi viri nomine Principis patrocinium Ecclesiæ, & rerum ecclesiasticarum exercent.

## IV.

Veteribus sæculis, cum sub uno Imperio innumeræ provinciæ subjacerent, & admodum difficile foret implorandi patrocinii causa pro emergentibus negotiis Imperatorem adire; alias autem constituti in provinciis Magistratus aut variis negotiis distraherentur, aut non omni suspitione liberarentur, consuevit Ecclesia ab Imperatoribus postulare certos sui, suorumque jurium defensores, exemplo civitatum, quæ etiam defensores easdem ob causas postulaverunt. Defensorum cura erat, ut nomine Principis Ecclesias tuerentur, atque ab injuriis vindicarent.

De defensoribus civitatum extat titulus in codice Justinianæo.

Africanos Episcopos postulavisse ab Imperatore, ut Ecclesiis defensores concederentur, liquet ex canone 10. cau. 23. qu. 3., eosdemque defensores fuisse imperiali aucto-

ritate concessos constat ex l. 38. cod. Theod. de Episcopis, & Clericis.

Cum res Constantinopolitano-Romani Imperii in pessum irent, & vix Imperatores orientales in occidentali Imperio potestatem suam exercerent, Pontifices Maximi defensores nonnullis Ecclesiis dederunt, ut plurimum in Subdiaconorum Ordine constitutos, Facile id liquet ex pluribus epistolis Gregorii Magni directis ad defensores Ecclesiarum numero plurimos.

## V.

Sequioribus sæculis cum bona Ecclesiarum temporum injuriis passim diriperentur, Ecclesiæ pene singulæ saltem majores quosdam sibi patronos selegerunt sub nomine *Advocatorum*. In hac parte delectus fiebat cujusdam personæ doctrina, prudentia, & generis nobilitate spectabilis. Imo ut vehementius Advocati concitarentur ad tuendas Ecclesias, ac jura Ecclesiarum, hoc munus non tam personæ, quam familiæ concedebatur, ita ut parentibus & filii, & nepotes etiam seri succederent, concessis variis honoribus, imo & annuis censibus ab eadem Ecclesia persolvendis.

Hoc munus in Ecclesia jamdiu cessavit, postquam Deo dante, pax, tranquillitas, ac securitas Ecclesias omnes tutas reddidit,

didit, præsertim sub vigilantia Principum religiosorum.

## VI.

Quoties privatus quisque Ecclesiam erexit, aut certa in Ecclesia officia designari collatis annuis stipendiis curavisset, is eandem Ecclesiam, & officium veluti sub tutela, patrocinioque suo suscepit. Hi appellantur Patroni Ecclesiarum. Sunt autem in primis fundatores ipsi, deinde ii omnes, qui in limine foundationis vocati sunt, ut in eo munere, ac honore succedant. Hoc ipsum jus appellatur juspatronatus. Juripatronatus cohærent onera tuendæ Ecclesiæ, ac bonorum collatorum. Cohærent quoque nonnulla jura, quæ pro temporum varietate modo plura, modo pauciora extiterunt. Potuerunt fundatores sua in Ecclesiis nomina adscribere; aut loco nominum stemmata familiaria. Potuerunt fundatores, ac successores in jurepatronatus primum locum in conventu populi, primosque honores habere, quod veteres appellabant *jus processionis*. Clericos in Ecclesia, vel beneficio instituendos præsentis Episcopo fecerunt. Denique ubi ad inopiam vergerent, ut ab Ecclesia alantur, canonibus cautum est.

## TITULUS XVIII.

DE LAICIS GENERALEM ECCLESIAE  
COMMUNIONEM HABENTIBUS.

## I.

**Q**UI in Ecclesia extra hierarchiam constituti sunt, generali nomine Laici appellantur, atque a clericis distinguuntur. Isti edocentur a clericis in doctrina fidei, & morum; disciplinam sequuntur ab Ecclesia propositam: Sacramenta a sacris ministris percipiunt, ad Ecclesiae conventus sacros accedunt, & in unum corpus in Ecclesia coalescunt.

## II.

Quamquam laici omnes abstinere debeant ab officiis, quæ clericalis hierarchiæ sunt singularia, in ceteris tamen Ecclesiae negotiis certis juribus pollent. Hæc jura modo perpetua sunt, atque constantia, modo vices quasdam, & mutationes patiuntur. Perpetua, & constantia sunt, quæ in Sacramentorum participatione, & generali Sanctorum communione consistunt: quippe communio Sanctorum inter vincula christianæ societatis recenseretur. Vices, & mutationes patiuntur jura quædam, quæ ad regiminis sacri formam quoquo modo accedunt extra usum hierarchicorum

rum officiorum. Hujus generis sunt interesse Synodis, consensum præstare in electionibus sacrorum administratorum, certam in judiciis ecclesiasticis stationem habere, & his similia. Hujus generis jura quandoque etiam laicis fuere communia, quandoque ad paucos, ceu Optimates contracta, quandoque solis clericis reservata.

### III.

Laici tumprimum in Ecclesia sunt, juraque sibi competentia explicant, cum Christo nomen dederint, & baptizati fuerint. Tum extra Ecclesiam ejiciuntur, cum anathemate percelluntur. Cum in Ecclesia sint, varias stationes habere possunt, pro uniuscujusque modo. Sunt enim quidam, quibus omnia competunt jura christianæ communionis; sunt quidam, quibus certa jura denegantur, quemadmodum sunt publici peccatores, aut in pœnitentium stationes ejecti.

De anathematizatis, vel excommunicatis, de pœnitentibus, & variis istorum gradibus, ac stationibus inferius suo in loco sermo habebitur.

## LIBER II.

DE

CONVENTIBUS, ET COLLEGIIS IN ECCLESIA.

## TITULUS I.

## DE FORMA ECCLESIAE.

## I.



ECCLESIA est societas hominum rite colentium Deum. Duæ sunt hujus societatis bases, ac fundamenta, nimirum leges, & jura. Uti leges communes omnibus esse debent, ita esse debent jura communia. Nomine legum communium hoc in loco veniunt, quæ omnes sine discrimine devinciunt. Hujus generis sunt subjectio certo Prælato donec deveniatur ad Pontificem Maximum, qui Vicarius est Christi Ecclesiæ Principis; item propositio, & professio ejusdem doctrinæ, & fidei, & morum. Ubi cumque est Ecclesia, apud quoscumque etiam provincia longe remotissimos, ibi has leges communes invenies. Nomine jurium communium veniunt hoc in loco jura christianæ communionis. Ubi cumque Ecclesia est; ibi christiana communio invenitur. Equidem hæc jura multigena sunt; sed ab istis nemo chri-



christianus excluditur, nisi aut culpa sua quidam semetipsum excludant, aut nisi in poenam criminis ab Ecclesia ipsa excludantur.

## II.

Generalis hæc hominum societas, retenta tamen unitate dividitur in varias singulares societates, quæ una collectæ in generalem deinde eandem illam societatem coalescunt. Singulares societates fiunt ex duplici causa, primo nimirum ex conditione personarum, secundo ex distinctione locorum. Sic qui ejusdem conditionis sunt, singularem quandam societatem constituunt: sic singularem societatem faciunt, qui in certis locorum finibus commorantur. Singularibus societatibus suæ sunt singulares leges, sua quoque jura singularia, æquabiliter ac cum de generali societate agitur.

## III.

Ratione personarum aliam singularem societatem constituunt clerici, aliam laici. Quæque societas suas habet singulares leges, sua jura singularia: aliam constituunt monachi, & regulares, imo & isti pro modo sui instituti, & regulæ in multas societates tribuuntur; diriguntur legibus singularibus, & jure singularibus utuntur. Accesserunt his societates laicorum, quas sodalitia, seu confrater-

fraternitates vocant; collegia studiosorum; ac denique loca quædam religiosa, in quæ certum hominum genus colligitur. Omnes istæ societates suas habent singulares leges, suæque jura singularia.

#### IV.

Ratione locorum facile est singulares initas societates indicare. Univerſa Eccleſiæ ſocietas dividitur in nationes, in provincias, in diœceſes. Toti Eccleſiæ præeſt Pontifex Maximus; nationi præeſt Patriarcha, aut Primas; provinciæ Metropolitanus, ſive Archiepiſcopus, diœceſi Epicoſopus. Ut ubicumque certa ſocietatis forma ſervetur, ac teneatur, cauſſa adminiſtrationis, unicuique Prælato collegium ſuum cohæret, cujus conſilio, ac conſenſu negotia tractentur, diſcutiantur, ac dirimantur. Ordinario jure unusquiſque Prælatus collegium habet clericorum Eccleſiæ, quam regit, adſcriptorum.

Sic diœceſanus clerus collegium Epicoſopi conſtituit, clerus Metropoleos collegium Archiepiſcopi, clerus Primatialis, vel Patriarchalis Sedis collegium Primatis, vel Patriarchæ; clerus Romanus collegium Pontificis Maximi.

## V.

Verum enim vero collegia isthæc modo ordinaria sunt, modo extraordinaria. Ordinaria sunt, quæ causis ordinariis, frequentioribus, ac vulgaribus prospiciunt, si causa gravis emergat, & certam providentiam illico postulet, interea eidem consulunt, ne mora adferat detrimentum. Uniuscujusque civitatis clerus, qui cum Episcopo residet in Ecclesia cathedrali, ordinarium collegium constituit, ac in eo totius diœcesis negotia dirimuntur. Idem dixeris de clero urbis Metropolis, qui residet cum Archiepiscopo in Ecclesia Metropolitana, ubi ordinaria provinciæ negotia agenda sint, vel ea, quæ moram non patiuntur. Idipsum de clero Ecclesiæ Præmialis, vel Patriarchalis, ubi de negotiis agatur nationis. Idipsum denique dixeris de clero Romano, cujus est ferre consilium Pontifici Maximo in agendis totius Ecclesiæ negotiis. Extraordinaria collegia sunt, quæ causis gravioribus consulunt, easdemque concludunt. Ad hæc componenda concurrunt totus clerus societatis pro modo societatis ejusdem, prout vel generalis societas est, vel singularis; quod contingit in Conciliis sive generalibus totius Ecclesiæ, sive particularibus aut nationis, aut provinciæ, aut diœcesis.

Ne

Ne tota societas conveniret in ordinariis, frequentioribus, & vulgaribus causis, aut etiam in gravioribus, quæ moram non patiuntur, utilitas publica postulavit. Scilicet nimis grave fuisset Ecclesiis, si pro quacunque causa totus clerus diœcesanus apud Episcopum, totus clerus Provincialis apud Archiepiscopum, totus clerus nationis apud Prælatum, vel Patriarcham, totus clerus, quantuscumque in Ecclesia universa est apud Pontificem Maximum conveniret.

#### VI.

Sed & ipsa collegia ordinaria varias vices passa sunt pro modo adjunctorum; item pro modo causarum, denique pro modo Ecclesiarum. In cathedralibus singulis Ecclesiis constituta sunt Capitula Canonorum, quibus mandatum est, exclusis ceteris clericis civitatenis, ut Episcopum consilio juvarent; quamquam, & quandoque certis in causis cleri extra Capitulum constituti habita ratio fuit, uti liquet in conspectu Tridentini decreti de erectione Seminariorum sess. 23. de ref. cap. 18. Si de negotiis provincialibus, vel nationalibus ageretur, præsertim gravioribus, antiqui canones docent, Archiepiscopos, sive Prælatos, aut Patriarchas nihil agere debere, priusquam consensum, aut con-

consilium suffraganeorum Episcoporum postulavissent. Et si Concilium, sive conventus extraordinarius minime celebraretur, datis tamen, receptisque epistolis tractari res poterat. Eam ob rem frequentibus literis invicem se se Episcopi excolebant. Denique ubi de negotiis Ecclesiæ universæ a Pontifice Maximo gerendis ageretur, hæc forma indita ordinariis conventibus fuit, ut Episcoporum quidem plurium saltem finitimorum consilium postularetur; deinde ut pro clero Romano collegium Cardinalium institueretur; Cardinales autem eligerentur delectu maximo ex universa Ecclesia. Eam ob causam Episcopi quidam Romanæ urbi finitimi in Cardinalium collegium cooptati sunt; de ceteris Cardinalibus ita scribebat S. Bernardus in lib. 4. de considerat. cap. 4. *an non eligendi de toto orbe orbem judicaturi?*

## VII.

Primis Ecclesiæ sæculis collegia extraordinaria ita fiebant, ut universa fidelium multitudo ad ea conveniret pro modo cujuscumque societatis. At adaucto populi fidelis numero, & clero ipso in ingentem multitudinem redacto, non potuere non præberi occasiones contentionibus, quas turbæ facile excitabant. Inde factum est, ut jus comi-

tiorum

tiorum extraordinariorum solis iis concederetur, qui digniores erant, seu qui ceterorum veluti principes essent, & valerent in congressu plurium personas pene repræsentare. Sic ad Concilia generalia advocati sunt Episcopi omnium Ecclesiarum, variique Prælati, & digniores selecti viri, exclusis clericis inferioribus. Ad Concilia nationalia, ac provincialia advocati sunt præter Episcopos nationis, & provinciæ etiam Capitula Canonicorum saltem nobiliora; in Conciliis autem dioecesanis totus pene clericorum ordo admissus est.

### VIII.

Videor mihi generalem hucusque tributionem Ecclesiæ exhibuisse, eam scilicet, in qua non generalis societas modo dignoscitur, sed &prehenduntur singulares societates in generalem denique coalescentes. Ex sequentibus titulis res tota magis perspicua fiet.



**III.**

## TITULUS II.

## DE CONCILIIS GENERALIBUS.

## I.

**C**ONCILIUM generale, quod & Œcumenicum dicitur, est conventus Ecclesiæ universæ. Ex quo præsertim Ecclesia fuit longe lateque diffusa, fieri plane non potuit, ut in unum fideles omnes convenirent. Saltem illos, quos præcipue tangere debet sollicitudo, & cura Ecclesiarum, & convocari, & convenire necesse est. Hi profecto sunt, quos cum convenisse quis deprehendat, tum prudenti judicio agnoscat, talem esse conventum, qui totam Ecclesiam repræsentet.

Hæc ratio est, & forma usu recepta in conventibus universitatum, sive societatum: ubi enim universitas ingenti personarum multitudine constat, præsertim si tales personæ sint, quæ ratione locorum longe sint, lateque diffusæ, publica utilitas postulavit, paucos selectos convenientes universitatis vices gerere.

## II.

Causæ generalium Conciliorum celebrandorum debent esse gravissimæ, quarum definitio totius Ecclesiæ intersit. Hujus generis sunt declaratio doctrinæ fidei, & doctrinæ  
morum,

morum, quarum doctrinarum unitas est vinculum fidelium univerſorum. His accedunt certa capita diſciplinæ, quæ publice intereſt æqualiter, & ſine diſcrimine in Eccleſiis omnibus obſervari. Pax quoque, & tranquillitas Eccleſiæ, quandoque aut hæreſibus ſubortis, aut concitatis ſchiſmatibus turbata, occaſionem ſaluberrimam præbent celebrationi Concilii generalis. Si cauſæ longe minores occurrant, operæ pretium non eſt, totam Eccleſiam commoveri; cum alii ſuperſint modi, quibus Eccleſiæ conſulatur.

### III.

Uſus celebrandorum Conciliorum antiquiſſimus eſt. Vel ipſi Apoſtoli, uti docet S. Lucas in Actis, Concilia celebraverunt, ad quæ una cum ipſis univerſa multitudo convenit. In urbe Hieroſolymitana, in qua illa Concilia celebrata ſunt, non multi numero fideles erant, proindeque facile poterant omnes convenire. Exemplum Apoſtolorum imitati ſunt Epifcopi ſucceſſores, etiam quo tempore pace non fruebatur Eccleſia. Sed ipſa temporum adjuncta non ferebant, fideles omnes ad Concilia colligi. Hinc nulla prioribus tribus Eccleſiæ ſæculis ab historicis conſignata Concilia ſunt, quæ generalia dicerentur. Primum generale Concilium celebratum eſt data  
Eccle-



Ecclesiæ pace sub Constantino Imperatore anno 325. in urbe Nicœna occasione hæreseos Arianæ. Subinde oriæ aliæ hæreses occasionem dederunt celebrationi aliarum Synodorum succedente ætate. Postremum generale Concilium est Tridentinum.

Maxima semper habita fuit in Ecclesia auctoritas quatuor priorum generalium Conciliorum, qualia sunt Nicœnum, Constantinopolitanum, Ephesinum, & Chalcedonense: Sancti Patres, & Pontifices Maximi professi sæpe fuerunt, se illa Concilia colere eodem cultu, quo quatuor Evangelia colebant. Horum Conciliorum antiquitas hunc honorem præ ceteris mereri visa est.

#### IV.

Quoties generale Concilium celebrandum fuit, multa occurrere consueverunt. Investiganda erat causa celebrationis, ac palam proponenda veluti digna diremptione, ac definitione Concilii. Designandus locus, in quo Concilium celebraretur. Ex omnibus Ecclesiis Episcopi advocandi certa inevitabili auctoritate, quam declinare minime possent. Cavendum, ne cum omnes convenerint, tumultibus, turbis, seditionibus locus fieret; eamque ob rem sollicitudo adhibenda, ut omnia secure, tranquille, sine vi, & metu

*Instit. Pars II.* G gerere.

gererentur. Causæ ipsæ, quæ discutiendæ forent, dirimendæ erant juxta Divinas literas, traditiones Patrum, atque jam editas canonum sanctiones. Si quorum specialiter intererat, certas causas definiri, erant ipsi audiendi, aut saltem invitandi, ut quod sua intererat, proponere palam possent. Denique sententiæ in Concilio editæ erant executioni mandandæ, ne alias definitiones synodales in irritum caderent. Hæc sane omnia sine plurium concursu fieri nequibant.

Hinc opus est in primis eorum sollicitudine, qui causas exhibeant, & proponant, illorum etiam, qui causas ipsas explorent, an dignæ Concilio sint, tum vero celebrationem Concilii postulent, aut pro celebratione Concilii urgeant. Deinde opus est consilio, & consensu plurium in designatione loci, qui aptus sit, opportunus, & commodus. Insuper opus est auctoritate illius, qui possit omnes Episcopos convocare, & ad conventum adigere. Præterea opus est præsidio potentium, qui omnem tumultus, ac seditionis causam, ipsam etiam suspensionem amoveant. Certos quoque selectos viros advocari necesse est, in Divinis literis, in doctrina Patrum, in disciplina canonum eruditissimos, qui præsto sint Episcopis suffragium

gium laturis, explorando, discutiendo, expandendoque Divinas, ecclesiasticasque sententias. Quando multorum interesse potest, certa capita definiri, eos etiam invitare necesse est, ne illis inauditis aut omnino contemptis in discrimen adducatur, quod pronuntiandum est. Denique cum sententiæ generalis Concilii ideo edantur, ut in Ecclesia universa executioni mandentur, opus est auctoritate eorum, qui constituti in Ecclesia sunt, ut ecclesiasticorum canonum patrocini-um in se suscipiant, curentque, ut nec vacuæ, nec inanes constitutiones evadant.

Causæ celebrationis Concilii ab omnibus sine discrimine proponi possunt; omnium enim sine discrimine interest publica Ecclesiæ salus. Eo vero majore ratione digna propositio habebitur, quo aut dignior est, qui proponit, aut major est numerus proponentium. Discussio causarum aut literis, aut indictis præliminaribus comitiis fit; qua in re prudentia concitatur illorum, qui primas in Ecclesia dignitates tenent; proindeque præsertim Pontificis Maximi. Sic deliberatio fit celebrandi Concilii.

Succedit designatio loci. Ut unus potius locus præ altero designetur, actus prudentiæ est, singula librantis juxta adjuncta

rerum, quæ causam Concilio præbent. Ergo eorum omnium, qui causas celebrandi Concilii diremerunt, de loco iudicium est. Necessarium esse consensum illius Principis, in cuius ditione locus designatur, ipsa publici juris, & domini territorialis ratio postulat.

Designatione loci facta, sunt advocandi omnes Episcopi, quod jus ad primam Sedem, qualis est Romana, pertinere dignoscitur. Is enim convocare Episcopos solus potest, & debet, qui in universos Episcopos potestatem habet.

Præsidia ad avertendos tumultus a piis religiosis Principibus sunt imploranda. Sic verus constans docuit consuetudo; quare Marcianus in Chalcedonenſi Concilio ita de se profitebatur. *Nos ad fidem confirmandam, non ad potentiam ostendendam, exemplo religiosissimi Principis Constantini Synodo interesse volumus, ut inventa veritate, non ultra multitudo pravis doctrinis attracta discordet; can. 2. dist. 96.*

Cum directio rerum in Concilio definiendarum facienda sit, audiendi sunt viri periti & Divinarum literarum, & veterum traditionum, & canonum ecclesiasticorum. Id plane fieri nequit, nisi convenient in Concilium, uti advocari, & convenire consueverunt selecti Theologiæ magistri, & cano-  
num

num cultores, quorum omnium consilio suffragia Episcoporum quodammodo dirigerentur. Sic stabilitur doctrina fidei, ac morum. Quod si de capitibus disciplinæ generalis agatur, cum ista non ubique aliquando conveniat, tum interest selectos de unaquaque provincia audiri viros, quorum consilio constet, an eadem disciplina facile possit provinciis universis accommodari.

Quoties in generali Concilio discutienda sint facta quædam singularia, ceu suscepto certarum causarum iudicio, eodem jure citandi, & cum comparuerint, audiendi sunt illi, quorum interest, quo jure citandi sunt omnes, & cum comparuerint, audiendi, quorum causa sit in judiciis agitanda.

Denique nemo non intelligit, causa executionis decretorum conciliarium, intercedere pios, ac religiosos Principes, qui circa disciplinæ ecclesiasticæ patroni, tutores, ac vindices passim prædicantur, & revera existunt, quo etiam pertinet modo laudatus canon 2. dist. 96.

Quæ huc usque tradita sunt, pertinent ad ordinariam celebrandi Concilii formam. Extra ordinem contingere potest, ut non servatis solennitatibus, subsequente ta-

men ratihabitione, Concilium & iustum, & legitimum habeatur. Vulgare hujus rei exemplum demonstratur in Concilio V. generali, sive Constantinopolitano II., in cujus conspectu sequens ratihabitio Pontificum Maximorum in causa fuit, ut non amplius quaereretur, an initio Sedis Apostolicæ auctoritas intercessisset.

## V.

Jus suffragii definitivi in Conciliis generalibus est penes Episcopos, tanquam eos, qui in Ecclesia Christi locum tenent Apostolorum, quibus Divino jure commendata jam fuerat propositio, ac prædicatio sacrae doctrinæ seu fidei, seu morum, quibus etiam eodem jure mandata deprehenditur potestas quæcumque ligandi, ac solvendi. Et quando Pontifex Maximus Episcoporum omnium Princeps est Divino jure constitutus, magna semper habita fuit ejusdem suffragii ratio.

Non inde tamen sequitur, non posse alios ad suffragium ferendum admitti, sive constitutionibus, sive privilegiis, sive moribus. Etenim suffragii ferendi potestas sequitur indolem, ac naturam jurisdictionis sacrae, in qua moderanda locum habent & positivæ leges, & privilegia, & mores, quamquam verum sit, parcius ad has concessiones de-  
veniri,

veniri, cum agatur de potestate legislativa, quæ in unaquaque republica, ac societate summa est, & maxima.

Cardinales Romanæ Ecclesiæ in hac parte etiam potestatem nacti sunt, sive quod tanquam unum corpus cum Pontifice Maximo constituere dicantur, sive quod in suis titulis quasi Episcopalem jurisdictionem acceperint, sive quod præsertim hodie ex variis orbis provinciis eligantur, sive quod ii in generalibus Conciliis legatione Pontificis Maximi fungantur. Siqui alii Prælati non Episcopi, utut jus nacti fuerint accedendi ad Concilia generalia, velint ulterius jure ferendi suffragii experiri, doceant oportet, se hoc jus legitimo titulo quæsisisse.

## VI.

Definitiones Conciliorum generalium in doctrina vel fidei, vel morum, inconcussæ sunt, & nulli prorsus errato obnoxia, eamque ob rem nec vocari in dubium, eoque minus retractari possunt. Siquidem in his definitionibus versatur, quid verum sit, quid falsum, quid justum, quid iniquum: veritas autem, & justitia una semper est, constans, perpetua. At si definitiones spectent disciplinam, observandæ quidem ab omnibus sunt, quousque non retractentur; at possunt

vel in alio Concilio, vel etiam alia legitima ratione retractari, atque aboleri; etenim in his causis versatur, quod expedit, quod decet, quod utile est: multa autem quæ sicut uno in loco, ita & uno tempore expediunt, decent, atque utilia sunt, mutatis inde sicut locorum, ita & temporum adiunctis, expedire desinunt, aut decere, imo & inutilia, forte etiam noxia reddi possunt.

Inde profuit, quandoque certa disciplinæ capita utut in generali Concilio præstituta, non in omnibus peræque provinciis observari.

### *TITULUS III.*

#### DE CONCILIIS NATIONALIBUS, PROVINCIALIBUS, ET DIÆCESANIS.

##### I.

**Q**UEMADMODUM Concilia generalia exhibent generale totius Ecclesiæ collegium; ita Concilia particularia exhibent varia illa singularia collegia, quibus Ecclesia constat, uti in titulo 1. notandum fuit. Ergo tot species sunt particularium Conciliorum, quot sunt singularium collegiorum. Est nationale collegium totius alicujus nationis conventus; provinciale totius alicujus provinciæ, diæ-



diœcesanum totius alicujus diœcesis; unum profecto collegium alio collegio amplius, & dignius.

Sic diœcesanum Concilium provinciali, provinciale nationali inferius est: eamque ob rem nationalia Concilia in conspectu provincialium, aut diœcesanorum apud veteres Synodorum pene generalium nomine appellata fuere. Sic Concilium totius Africæ *Plenarium* Concilium a Sancto Augustino Hipponensi nuncupatum est.

### II.

Pro majore Concilii amplitudine major quoque dignitas est, major etiam auctoritas, quemadmodum suprema dignitas, suprema etiam auctoritas est Concilii generalis.

### III.

Sive spectemus auctoritatem illius, cujus est particularia Concilia convocare, sive spectemus jura, aut onera illorum, qui possunt, aut debent Conciliis particularibus intervenire; eadem servandæ sunt æquabiliter regulæ, quæ Conciliis œcumenicis normam præbent. Ergo qui nationi præest sub titulo Patriarchæ, aut Primatis, nationale; qui provinciæ præest sub titulo Metropolitani, aut Archiepiscopi, provinciale; qui diœcesi præest Episcopus, diœcesanum Concilium

con-

convocant. Ergo singuli nationis Episcopi ad nationale, & singuli provinciæ Episcopi ad provinciale Concilium & convocandi sunt, & accedere tenentur. In loci designatione æquabilis ratio habenda erit, quemadmodum occurrit, ubi generale Concilium sit celebrandum, uti dictum superius est tit. 2. num. 4., quod maxime observandum, si de nationali Concilio agatur. Etiam in provinciali Concilio fere obtinuit, ut in metropolitana, sicut in diocesano, ut in cathedrali Ecclesia celebretur. Præter Episcopos, ad hæc omnia Concilia & convocantur, & interveniunt clerici plures, præsertim ut prudentia sua, & consilio definitiones Episcoporum adjuvent. Hanc ob causam, si de nationali Concilio agatur, selecti semper fuerunt eximii viri de tota natione, atque inter istos ii præsertim, qui conspicuas in patriarchali, vel primatiali Ecclesia dignitates gerunt. Si de provinciali Concilio agatur, seliguntur viri ex singulis cathedralibus Ecclesiis, quales præsertim sunt, qui Capitulum cathedralium earundem componunt. In Concilio diocesano interveniunt præter Capitulum cathedralis Ecclesiæ, etiam Capitula collegiararum, singuli quoque Parochi, ceu præcipui animarum Rectores, & Episcoporum adjutores

in

in plebibus; ut plurimum etiam quotquot sunt in beneficiis ecclesiasticis constituti, quamquam in modo consilii, consensuque præstandi, non omnium æqua ratio habeatur, sed moribus singularum regionum indulgeatur.

Ubi quidam Archiepiscopi sunt nomine, ac dignitate tenus, idest nec provinciam habentes, nec suffraganeos Episcopos, eligunt sibi provinciam ut plurimum finitimam, ad cujus provinciale Concilium accedere & possint, & debeant.

Similiter si quidam Prælati sint Episcopo inferiores, nec jus habeant dioecesani Concilii convocandi, licet exempti sint, tenentur accedere ad Synodum dioecesanam finitimi Episcopi.

Exempti quoque in dioecesi constituti & ab Episcopo convocandi sunt ad Synodum dioecesanam, & ad hanc accedere debent, quoties certa capita definienda sint, quorum definitio illorum interfit.

Archiepiscopo impedito, aut deficiente, obtinuit, ut senior ex suffraganeis Episcopis Concilium provinciale convocet, & in eo præsit.

## IV.

Olim frequentia erant Concilia & provincialia, & diœcesana, adeo ut quandoque præceptum fuerit, ut eadem bis singulis annis celebrarentur. Hodie ex disciplina Tridentini Concilii in cap. 2. sess. 24. de ref. cautum est, ut singulis saltem trienniis provincialia, & singulis saltem annis diœcesana Concilia celebrentur. Optarunt viri prudentes, ut hæc disciplina paratam executionem juxta formam sacrorum canonum habuisset.

## V.

Causæ, quæ in Conciliis particularibus dirimendæ sunt, eadem propemodum recenseri possunt, quæ Conciliorum generalium judicio subsunt. Et primo quidem fidei zelus, quo damnentur hæreses, & schismata; secundo zelus doctrinæ morum, quo coërceantur abusus, pravæque omnis generis doctrinæ; tertio disciplinæ ecclesiasticæ moderatio, ex qua & doctrina fidei, & doctrina morum communiri solent; denique frequentior causa agnita fuit apud veteres, judicium quoddam grave de factis clericorum, imo & Episcoporum, si forte isti cuiquam graves fuissent, aut injuriam intulissent.

Acta veterum Conciliorum id totum abunde demonstrant, adeo ut etiam si de causa

caussa fidei ageretur, quæ omnium gravissima est, vix demonstrari possit suborta hæresis quædam, quæ non in particularibus primum Conciliis discussa fuerit, atque damnata. Tantum notandum est horum Conciliorum judicia novis majorum Conciliorum judiciis obnoxia fuisse, ac potuisse in melius reformari cognita causa. Eam ob rem dici belle potest, ubi definitio Synodi particularis ad dogmata fidei pertineret, definitionem quidem ipsam in fide versari, non tamen definitionem esse de fide, proptereaquod necdum generalis esset totius Ecclesiæ, & adhuc Ecclesiæ judicio subjaceret.

## TITULUS IV.

### DE COLLEGIO CARDINALIUM,

*Et de Congregationibus Urbis Romanæ.*

#### I.

**Q**UÆCUMQUE Ecclesiæ particulares, ex quibus universa Ecclesia coalescit, suum habent sub suo Antistite cœtum clericorum, quorum consilio geritur cura sacrorum. Sic Ecclesia a Christo tanquam collegium amplissimum instituta, nec collegium esse definit in singulis suis partibus; atque  
ita

ita comparata est sacra hierarchia , ut ex collegiis particularibus in singulis dioecesebus institutis componi queat collegium generale omnium dioeceseon , Præprimis hoc singulare collegium agnoscitur in Ecclesia Romana omnium matre , ac principe , quod hodie appellatur collegium Cardinalium opera sua , ac consilio Pontificem Maximum adjuvantium .

## II.

De nomine *Cardinalis* viri eruditi dimicant. Nec nimium antiquum, nec nimium recens in Ecclesia est; nec constans fuit ejus usurpatio ad idem significandum. Derivata vox est a verbo *incardinare* , quod idem sonat , ac *inserere* , *adjicere* , *immittere* . Si ergo clericus quidam , idest aut sacerdos , aut diaconus Ecclesiæ alicui inferebatur , is dicebatur incardinari , seu fieri illius Ecclesiæ clericus , sacerdos , diaconus cardinalis . Frequentius dicebatur de clericis , qui a suis Ecclesiis injuria temporum ejecti , in aliis Ecclesiis recipiebantur . Quidquid tamen sit in conspectu veterum formularum , hodie circumscripta est nominis significatio ad indicandos Episcopos , Presbyteros , & Diaconos , qui certos titulos in Romana Ecclesia gerunt , & unum quodammodo corpus constituere dicuntur cum Pontifice Maximo .

## III.

## III.

Priscis Ecclesiæ sæculis hoc collegium coalescebat ex universis Romanæ Ecclesiæ clericis, quemadmodum etiam observabatur in collegiis omnium cathedralium Ecclesiarum. Atque illud collegium modo amplius erat, modo angustius pro merito, & qualitate causarum dirimendarum. Si enim causæ leviores essent, istæ dirimebantur a Pontifice Romano consilio clericorum Romanæ urbis, ac dioceseos: si graviores essent, istæ dirimebantur a Pontifice Romano consilio etiam Antistitum Romanæ provinciæ, aliquando insuper finitimarum provinciarum, præsertim Italiæ. Habebat ergo Romana provincia suas urbes Episcopales Romæ suffraganeas. His præfecti Antistites dici propterea potuerunt Episcopi Romanæ Ecclesiæ Cardinales. Ipsa Romana urbs præter Pontificalem Ecclesiam habebat plures titulos aut sacerdotales, seu presbyterales, aut diaconales. Titulis sacerdotalibus præficiebantur Presbyteri, qui ibidem sacra facerent, & Sacramenta administrarent. Titulis diaconalibus præficiebantur Diaconi, qui ibidem patrimonium, seu facultates, resque omnes temporales Romanæ Ecclesiæ administrarent, inque pias causas tribuerent. Hisce titulis præfecti vocati sunt Romanæ Eccle-

Ecclesiæ Cardinales Presbyteri, aut Diaconi. Ergo triplex constitutus est Cardinalium ordo, nimirum Episcoporum, Presbyterorum, & Diaconorum.

Qualiscumque fuerit pro temporum varietate Cardinalium numerus, hodie definitus ita est, ut sit septuagenarius. Videlicet sex sunt Episcopi suburbicarii, quinquaginta Presbyteri, titulos habentes sacerdotales, & quatuordecim Diaconi, titulis diaconalibus præfecti,

#### IV.

Cardinales ita constituti hodie conficiunt præcipuum Romanæ Ecclesiæ clerum, ac senatum, & quamquam olim omnes Romanæ Ecclesiæ adscriberentur ita, ut in Romana Ecclesia residere tenerentur; hodie tamen obtinuit ut aliarum Ecclesiarum longe lateque diffusarum clerici etiam majores, ceu Episcopi, adlegerentur, proptereaquod eorum consilio multa universæ Ecclesiæ negotia tractanda essent, non facile dirimenda nisi suffragiis eorum, qui plurium Ecclesiarum iura, & consuetudines callere apprime valerent; juxta illud Bernardi in lib. 4. de considerat. cap. 4. *An non eligendi de toto orbe orbem judicaturi?*

#### V.



## V.

Multa Cardinalibus concessa privilegia sunt. Ut enim omittam, quæ in habitu, & incessu singularia obtinuerunt, quæque jura explicare potuerunt, dum singulari Pontificis Maximi legatione fungerentur, certum est, illos omnes in suis titulis quasi Episcopalem jurisdictionem nactos fuisse. Ipsi præterea soli hodie Pontificem Maximum eligunt; imo & ex ipsorum cœtu Pontifex Maximus eligi solet. Et, quod maximum est, Sede Pontificia vacante, Romanæ ejusdem Sedis jura administrant ea forma, ac ratione, quæ Pontificiis constitutionibus definita est.

## VI.

Quando vero Pontifices Maximi in gravibus negotiis Cardinalium opera, & consilio utuntur, consueverunt iidem Pontifices Maximi varia munera inter Cardinales tribuere, institutis pluribus Cardinalium Congregationibus, ut sic certa officia inter ipsos partirentur. Ad spirituale Romanæ urbis regimen instituta fuit Congregatio *Visitationis Apostolicæ*. Ad ejusdem Romanæ urbis politiam spectat erectio duarum Congregationum, quarum una dicitur *Consulta*, sive *super consultatione negotiorum status ecclesiastici*, altera *Instit. Pars II.*

H

boni

*boni regiminis*. Aliæ plures Congregationes spectant regimen universæ Ecclesiæ, inter quas memoratu dignæ sunt, Congregatio *Consistorialis*, Congregatio *Interpretum Tridentini Concilii*, Congregatio *Inquisitionis*, Congregatio *Indicis*, Congregatio *super negotiis Episcoporum*, & *Regularium*, Congregatio *immunitatis*, Congregatio *Indulgentiarum*, & aliæ.

Qui seriem harum Congregationum, & jura singulis adtributa nosse velit, adeat Cardinalem De-Luca in Tractatu de relatione Curie Romanæ.

## TITULUS V.

### DE CAPITULIS CATHEDRALIUM ECCLESiarUM.

#### I.

QUUM primum deventum est ad divisionem dioceseon, & singulis Ecclesiis civitatensibus sui dati Episcopi sunt; tum operæ pretium fuit, ut singulis Episcopis cœtus clericorum accederet, quasi senatus quidam Presbyterorum, in quo provide, salubriterque rebus ecclesiasticis consulereetur. In hunc cœtum relati fuerunt clerici omnes majores quotquot etiam in tributionem venerant munerum

nerum dioecesanorum, Parochos præprimis dico, & Sacerdotes universos Parochorum adjutores. Paullatim exclusus est clerus dioecesanus, & universa jura clericis civitatensibus accreverunt, Imo & clerici cathedrali Ecclesiæ adscripti ceteros etiam civitatenses clericos excluderunt, præsertim ubi clerici cathedrali Ecclesiæ adscripti communem vitam una cum Episcopo iniverunt, sub certa regula, ex quo *Canonici* quasi viventes sub regula, & in elenchum cathedralis Ecclesiæ relati, nuncupati fuerunt. Hunc cœrum appellavere Capitulum. Ad hunc cœrum a sæculo præsertim duodecimo pertinere cœperunt omnia fere jura, quæ olim clericis omnibus in communi comperebant: videlicet Episcopo ferre consilium, & suffragium suppeditare, ubi Episcopus viveret, mortuo autem Episcopo, aut quomodolibet vacante Episcopali Sede, ea gerere, quæ ad Episcopalem jurisdictionem pertinerent.

Ceterum multa in hac re modum acceperunt ex variis statutis, aut consuetudinibus cathedralium singularum, item ex præscriptionibus, aut transactionibus initis inter Episcopos, & Capitula, similibusque singularibus juribus, ac placitis, quibus contentiones omnes facile averterentur.

## II.

Hæc forma regiminis non cathedrales modo, sed etiam archiepiscopales, primatiales, ac patriarchales Ecclesias moderata est. Eam ob rem, quæ Capitulis incubuit sollicitudo in Ecclesias, & res diocesanas in cathedralibus, similis sollicitudo incubuit in Ecclesiis metropolitanis, primatialibus, ac patriarchicis, Capitulis earundem Ecclesiarum erga Ecclesias, relique omnes ecclesiasticas suffraganeas; quasi potestas non tam Archiepiscopo, Primati, aut Patriarchæ, quam Ecclesiis ipsis archiepiscopalibus, primatialibus, & patriarchicis concessa foret in iis causis, quæ jurisdictionem metropolitanicam, primatiale, aut patriarchalem spectarent, exemplo plane Romanæ Ecclesiæ, quemadmodum in præcedente titulo dictum est.

## III.

Capitula quæcumque constant pluribus clericis, quorum alii dicuntur in dignitate, alii in personatu constituti, alii simplex officium singulare gerentes, alii communi fungentes officio, Canonici nuncupati. De his satis dictum est in libro præcedente tit. 9. Satis erit heic adjicere, contingere aliquando, ut dignitates non censeantur esse de gremio Capituli, proindeque juribus non gaudeant

deant Capitulo competentibus . Hac in re habetur ratio statutorum , ac morum singularem uniuscujusque Ecclesiæ . Solent præterea esse in cathedralibus Ecclesiis alii clericorum ordines inferiores ad minora quædam officia ecclesiastica gerenda . Clerici isti nec Capitulum componunt , nec ad jura capitularia admittuntur , nisi quibus in causis aliud obtinere demonstretur .

#### IV.

Recentioribus sæculis cautum fuit , ut cum cathedralis Ecclesia vacaret , administratio ecclesiasticarum rerum , seu jurisdictio , non a toto Capitulo exerceretur , sed a Vicario a Cænonicis electo , quem propterea Vicarium Capitularem appellaverunt . Quandoque , sed extra ordinem , deputatur Vicarius a Pontifice Maximo , qui proinde Vicarius Apostolicus nominatur .

Novam hanc rationem postulavit utilitas Ecclesiarum , quibus magis expediebat per unum res ecclesiasticas administrari , quam plurium opera , & ministerio .

## TITULUS VI.

DE CAPITULIS COLLEGIATARUM  
ECCLESiarUM.

## I.

**Q**UÆ Ecclesiæ certum clericorum collegium habent, cathedrali, seu episcopali Ecclesia inferiores, eæ collegiatæ appellantur. Clerici autem in ipsis merentes, exemplo clericorum merentium in cathedrali, in *Capitulum* coalescunt.

A conventu clericorum eæ Ecclesiæ quoque appellantur conventuales.

## II.

Non omnium conventualium, seu collegiatarum Ecclesiarum una eademque ratio est. Sunt enim quædam, quæ proxime accedunt ad naturam, & indolem cathedralium, cujusmodi sunt, quæ nullum quidem habent Episcopum, sed reguntur a Prælato episcopalem jurisdictionem habente, cum qualitate, ut ajunt, nullius diœcesis. Porro istarum Ecclesiarum Capitula eisdem juribus gaudent, quibus Capitula cathedralium, adeout etiam succedant in jurisdictionem Prælati, quotiescumque Prælati dignitas vacet. Sunt aliæ, quæ non adeo accedunt ad naturam, & indolem cathedralium, sed in multis tanquam cathedrales habentur

bentur, nimirum si regantur a Prælato jurisdictionem episcopalem habente, in diœcesi Episcopi certis finibus circumscriptam. Itarum Ecclesiarum Capitula dignitate Prælati vacante non succedunt in jura Prælati, utpote quæ diœcesano Episcopo accrescunt: interea tamen unacum Prælato suo, si par sit, jura Ecclesiæ administrant pro modo fundationum, consuetudinum, aut probatorum statutorum, vel privilegiorum. Sunt præterea Ecclesiæ monasticæ, de quibus infra sermo recurret tit. 8., ubi agendum erit de collegiis monachorum. Sunt denique aliæ collegiatæ Ecclesiæ inferiores, in quibus collegium quidem Canonicoꝝ est, sed sine Prælato jurisdictionem episcopalem habente, in quibus nimirum tota quantumque est episcopalis jurisdictio diœcesano Episcopo reservatur.

### III.

Collegiatæ postremi hujus generis Ecclesiæ, & Capitula Canonicoꝝ in iis merentium erigi consueverunt exemplo, & ad imaginem quandam cathedralium Ecclesiarum: Hinc & in istis suæ constitutæ dignitates quandoque sunt, concessa Canonicoꝝ, eorundemque collegio jura singularia, sua habent statuta, consuetudines, privilegia; eamque ob

causam Ecclesiis simplicibus non conventualibus, etiam parochialibus, etsi ipsæ non parochiales præferuntur.

Inde factum est, ut quo tempore cathedralis Ecclesiæ Canonici totius diocesis cleri jura sibi vindicaverunt, nonnisi serius potuerint excludere Canonicos collegiatarum Ecclesiarum, præsertim si in civitate degerent; horum enim collegia, ceu corpora communi spiritu ducta tenacius suis juribus incumbant.

#### IV.

Collegiatarum Ecclesiarum erectiones frequentiores esse cœperunt sæculo Ecclesiæ duodecimo, quo nimirum tempore canonibus Conciliorum, & Pontificum Maximorum sollicitudine omnis industria adhibita est, ut clerici vitam communem inirent. Hæc vita communis instaurata est in Ecclesiis intra urbes celebrioribus extra cathedralem erectis, item in Ecclesiis erectis in oppidis frequentioribus, ubi par esset numerus clericorum.





## TITULUS VII.

### DE SEMINARIIS, ACADEMIIS, ET SCHOLIS.

#### I.

**C**ERTAS scholas olim fuisse in cathedra-  
libus præsertim Ecclesiis, ecclesiastica  
antiquitas docet. Instituebantur in iis cle-  
rici juniores in Divinis literis, in bonis ar-  
tibus, quæ Divinarum literarum scientiam  
promoveant, ac juvant; item in iis, sine qui-  
bus disciplina ecclesiastica consistere mini-  
me poterat. Exemplo cathedralium scholæ  
quoque institutæ æquabiliter fuerunt in col-  
legiatis, imo & in simplicibus quibusdam  
Ecclesiis, quibus certus clericorum numerus  
adscriptus esset.

Ergo præter scholas bonarum artium,  
ceu grammaticæ, rethoricæ, ac computorum  
ecclesiasticorum, erant quoque scholæ Theo-  
logorum; item scholæ Notariorum, Canto-  
rum, & Diaconorum. Qui scholis bonarum  
artium præerat, is Scholasticus appellabatur;  
qui Theologiæ tradendæ addictus erat, Theo-  
logus dictus est. Scholæ Cantorum præerat  
Cantor, sive Præcentor, aut Succentor,  
scholæ Notariorum Primicerius, scholæ Dia-  
conorum Archidiaconus.

U

Ut plurimum bonarum artium, ac Theologiæ Magistris, item Præfectis, Cantoribus, Notariis, & Diaconis assignatæ fuere præbendæ; quibusdam annua salaria, sive stipendia, quousque officio fungerentur; idque tum, cum clerici vitam communem non servabant, studiosis juvenibus clericis certa quoque subsidia assignata sunt pro merito singulorum ad vitæ sustentationem. Ubi vitam communem omnes clerici ducerent, & præceptores, & studiosi juvenes vitæ communis erant participes sub cura, & sollicitudine Præpositorum.

## II.

Quibus temporibus, & quibus in locis curatum est, ut omnigenæ sapientiæ studia instaurarentur, publicæ sunt erectæ Academiæ sub nomine *Universitatum studiorum*, præter minora collegia, in quibus liberalium artium disciplina excoleretur. Ad has Academias, atque ad hæc collegia patuit aditus laicis æque, ac clericis. In his adjunctis adama-verunt plures Ecclesiarum Prælati, ut clerici juniores studiorum causa ad Academias, & gymnasia publica mitterentur. Selectorum antecessorum doctrina, plurimum eo convenientium æmulatio, commoda ædium in id erectarum, eosdem Prælatos commoverunt;

ut

ut id consilii caperent. Inde factum, ut in pluribus Ecclesiis nuda remanserint nomina Cantorum, Primiceriorum, Scholasticorum, & Theologorum, idest sine officio docendi.

### III.

Patres Tridentini Concilii e re ecclesiastica esse judicaverunt, si mandarent Episcopis universis, ut juniores clericos in collegium quoddam redigerent in pietate, cultuque bonarum artium, ac præsertim Divinarum literarum educandos. Hoc collegium appellaverunt *Seminarium*, quasi locum ad præparandos illos, qui deinde Sacerdotes optimi, & animarum pastores, ac duces futuri quandoque sint. Ut hoc piissimum opus erigeretur, & paupertati clericorum illuc convenientium occurreretur, nec quidquam curæ omissum est, quo in eam causam certi Ecclesiarum redditus impenderentur, Episcoporum auctoritate, consilio, ac consensu Canonorum æque ac nonnullorum de clero.

Sanctio Tridentini Concilii, qua & erigendorum Seminariorum ratio traditur, & erectorum cura protegitur, habetur in sess. 23. de reform. cap. 18.

## TITULUS VIII.

DE COLLEGIIS MONACHORUM,  
CETERORUMQUE REGULARIUM,  
AC SANCTIMONIALIUM.

## I.

**E**TSI primi ex Monachis solitariam vitam ducerent, paullatim tamen, præsertim a S. Benedicti temporibus, in occidentali Ecclesia in vitam communem coaluerunt. Unitas regulæ omnibus propositæ, obedientia in certum Præpositum, unitas cœnobii, in quod recipiebantur, causam collegii constituiebant. Et quamquam collegium Episcopo diœcesano subesset, certa tamen & Prælati, & Monachis collegii jura concedebantur. Hinc & sua statuta condebant, Præpositum eligebant, & in communi res monasterii per selectos ad id curatores administrabant.

## II.

Hujus generis collegia per plurâ sæcula prorsus fuerunt singularia, idest ita constituta, ut unum ab altero non penderet. Etsi enim multa erecta cœnobio forent ejusdem regulæ, & instituti, nihil tamen erat præter vitæ, & morum similitudinem uni cœnobio cum altero commune.

## III.

## III.

Paullatim factum est, ut quæ cœnobia ejusdem regulæ, & instituti essent, ea in unum veluti generalem cœtum componerentur instar provinciæ, ac certæ gentis, exemplo Ecclesiarum cathedralium, in quibus suæ erant provinciæ, & nationes. Hinc quemadmodum Ecclesia quæcumque cathedralis subest metropolitane, metropolitana patriarchali, aut primatiali, ita fere obtinuit, ut singula cœnobia subsint cœnobio majori provinciali, sive provinciali Præfecto, ac Præfecti collegio; denique provincialis Præfectus una cum collegio suo subsit Præfecto generali, ejusdemque collegio. Id obtinuit præsertim, postquam Monachi, & Monachorum collegia eximi cœperunt a potestate diocesano- rum Antistitum.

Colligitur ex his Monachos ejusdem regulæ, atque instituti, etiam late in variis cœnobiis diffusos, plerumque unum generale collegium constituere, quod tamen adhuc constat pluribus collegiis singularibus,

## IV.

Hinc factum est, ut certa qua generalis, qua particularium collegiorum jura definirentur, ceu in electionibus Prælatorum aut faciendis, aut confirmandis, in visitationibus,

in

in reservationibus graviorum negotiorum,  
& similibus.

Non potest in hac parte tradi generalis regula omnigenis Monachorum collegiis communis. Quippe singulis pene Ordinibus suæ sunt singulares constitutiones, ad quas, prout res incidit, semper est respiciendum.

#### V.

Quando Monachi cœperunt Ordinibus clericalibus, ac Sacerdotio insigniri, etiam concessa sunt Monachorum collegiis certa jura, quæ res sacras spectant. Neque in hac parte tradi generalis regula potest: pendent enim universa ex privilegiis, quæ singulis Monachorum Ordinibus concessa fuerunt. Hæc privilegia aucta in dies fuerunt, ex quo Monachi ex eremis advocati sunt in urbes, quasi clericorum adjutores.

#### VI.

Quæ de Monachorum collegiis dicta sunt, facile protrahuntur ad collegia Regularium quorumcumque Clericorum. Ista recentiora sunt collegiis Monachorum: sed exemplo collegiorum monasticorum instituta sunt. Tantum discrimen est in eo, quod Clerici Regulares initio, & vi suæ primigeniæ institutionis clericalia munera profitentur, atque huic professioni clericalium munerum vitæ monasticæ leges adjunxerunt.

#### VII.

## VII.

Ad Monachorum primigenium institutum magis accedunt collegia Sanctimonialium. Istæ reguntur intime a Prælata monasterio: Prælata eligitur communi Sanctimonialium suffragio: communi quoque suffragio sorores recipiuntur, & negotia monasterii dirimuntur. Interea singula cœnobيا singularia sunt, nec unum ab altero pender, etsi ejusdem regulæ, atque instituti. Collegia ipsa subesse solent Episcoporum diœcesanorum jurisdictioni: omnia quidem olim suberant; pleraque etiam hodie subsunt: quædam privilegiis, aut similibus singularibus titulis in jurisdictionem quorundam Prælatorum Regularium collata sunt, aut etiam exempta omnino ab inferiorum Prælatorum potestate, & immediate subiecta Pontifici Maximo. Ceterum adhuc in nonnullis, etiam in istis aut restituta, aut concessa singularis potestas fuit Episcopis diœcesanis.

In hac parte inspicienda semper sunt singulorum cœnobiorum privilegia, ac diurnæ consuetudines; item recentia aut Conciliorum, aut Pontificum decreta, quibus in parte saltem restituta fuit Episcopis jurisdictionio.

TIT.

## TITULUS IX.

## DE SODALITIIS, SEU CONFRATERNITATIBUS LAICORUM.

## I.

**I**Psæ etiam Ethnici certa olim habuere collegia eorum, qui præter sacerdotes causa religionis coirent, eademque publica auctoritate probabantur. Laudabilis inde fuit in Ecclesia laicorum hominum pietas, qui in certum collegium impetratis ab iis, ad quos pertinet, facultatibus coaluerunt, ut statim temporibus, certisque in adjunctis sese in quibusdam piis, & ad christianas institutiones exactis operibus exercerent. Hæc collegia appellavit posterior ætas *Confraternitates, seu Sodalitia Laicorum*. Difficile est definire, quo primum tempore instituta hæc collegia fuerunt. At hæc ipsa difficilis definitio temporis indicat, illa fuisse antiquissima. Certum est, jamdiu ante octavum Ecclesiæ sæculum existisse,

## II.

Ipsa quidem horum collegiorum indoles, & natura postulat, ut non solum sodales, sed & sodalitia ipsa laicorum jure censeantur, proindeque a publicis magistratibus pendeant; interea tamen quod spectat ad ritus, ordinesque  
sacra-



sacrarum precum, & pietatis instituta, pend-  
 ent a diocesani Episcopi auctoritate.

### III.

Solent hæc collegia condere sua statuta, ita tamen, ut probentur auctoritate superiorum, nec obligent sodales invitos: siquidem ad evitanda quæcumque pericula, provide jamdiu cautum est, ut quemadmodum quis inter sodales adscribi libere potest, ita libere in sodalitii institutiones incumbat. Eam ob rem improbatur quodcumque jusjurandum, quo sodalis se ad obeunda sodalitii officia obstringeret. Huic proximum est, sodalitia invitari quidem solere, ut ad publicas supplicationes (*processiones* vocant) accedant, non tamen posse ab Episcopis obligari.



## TITULUS X.

## DE LOCIS RELIGIOSIS

*Ad similitudinem Collegiorum erectis.*

## I.

**C**HRISTIANA illa pietas, quæ Apostolos, ac fideles omnes apostolicæ ætatis concitavit, ut passim necessitatibus inopum occurrerent, sub finem sæculi quarti id consilii suppeditavit, quo pauperibus in unum locum collectis prospiceretur. Hinc instituta collegia pauperum certis assignatis redditibus: *Hospitalia* hodie appellant.

Varia sunt Hospitalium nomina, pro qualitate indigentium, qui in eadem recipiuntur, ceu senum, infirmorum, orphanorum, debiliū: Hinc dicuntur modo *Gerontocomia*, modo *Xenodochia*, modo *Ptocotrophia*, modo *Orphanotrophia*, atque his similia.

## II.

Viri ecclesiastici ex Ecclesiæ redditibus sæpe Hospitalia erexerunt: sæpe etiam laici ex bonis patrimonialibus: quandoque & ecclesiastici, & laici viri junctis studiis: hinc divisio Hospitalium in ecclesiastica, laica, & mixta. Sunt etiam Hospitalia, quæ privilegiata appellantur, vel quia in supremorum Prin-

Principum singulare patrocinium recepta sunt, vel quod singularibus munita sunt privilegiis, ceu si certo Monachorum, aut Regularium ordini sint adnexa, & privilegium ordinis gaudeant.

### III.

Hospitalibus antiquiora sunt alia pia opera charitatis, quibus pauperum inopiæ succurritur, quin pauperes in unum veluti collegium colligantur, Hujus generis erant loculi, quos & Christus habuit, & Apostoli administrare perrexerunt: nimirum quidam rerum fungibilium, ac præsertim pecuniæ cumulus, quæ in pauperes pro singulorum indigentia tribuuntur. Hujus generis erant veteres diaconiae, seu loca diaconica in Ecclesia, in quæ oblationes a fidelibus collectæ congebantur, & per Diaconos jussu Antistitum pauperibus erogabantur. Etsi posteriore ætate loca hæc diaconica non adeo frequentia, ac vix conspiciantur, in horum tamen locum successerunt similia charitatis opera, etiam laicorum liberalitate erecta, inter quæ locum habent, quos vocant *Montes pietatis*, idest collecta quædam pecunia muruo danda pauperibus indigentibus, statim legibus, statoque tempore restituenda.

## IV.

Et si viri ecclesiastici ex natura ecclesiastici peculii curam semper gerere debuerint Hospitalium, operumque piorum ex ecclesiastico peculio erectorum; adhuc tamen in certam Episcoporum curam collata sunt Hospitalia laica ex generalibus Principum legibus sanctione canonum confirmatis. Exceptio est, si in singulare Principum patrocinium recepta sint, si quoquomodo exempta, & aliorum curæ commissa, vel si aliud fundatoribus placuisset.



## LIBER III.

## DE ECCLESIASTICA JURISDICTIONE.

## TITULUS I.

## QUID SIT ECCLESIASTICA JURISDICTIO.

## I.



UUM Christus Dominus Ecclesiam suam instituit, voluit etiam communitam Sacramentis, quibus homines & Deo reconciliarentur, & magis magisque sanctificarentur.

Sacramentorum ministerium voluit pendere ex Sacramento Ordinis, ex quo, veluti ex fonte Sacramenta cetera dimanarent. Hæc est illa potestas, quam *Ordinis* passim vocant, & quidem Divino primum jure instituta. Ecclesia quoque exemplo Sacramentorum a Christo institutorum certa sacramentalia instituit; & horum sacramentalium ministerium a Sacramento Ordinis pendere voluit; atque hæc etiam potestas *Ordinis* appellatur, jure ecclesiastico inducta. Ceteræ potestates, quæ in Ecclesia sunt, aut esse possunt extra causam Sacramentorum, & sacramentalium, comprehenduntur, & veniunt sub nomine ecclesiasticæ jurisdictionis.

Ubi dictum est, Sacramentorum ministerium ex Sacramento Ordinis pendere, probata exceptio est in Sacramento Baptismatis, utpote maxime necessario, quod proinde sine discrimine a quocumque etiam non ordinato, imo etiam non baptizato valide, quandoque etiam licite ministratur. Sunt, qui aliam exceptionem adjiciunt in Sacramento Conjugii, qui scilicet ajunt, hujus Sacramenti ministerium ipsis conjugibus relictum esse.

Quoniam vero in Sacramento Ordinis multi sunt gradus, Divino jure definiendum fuit, quo in Ordinis gradu tributim Sacramenta conferantur, eandemque ob causam ecclesiastico jure definiendum fuit, quo in Ordinis gradu tributim conferantur sacramentalia.

## II.

Itaque quæ potestas versatur extra causam Sacramentorum, & sacramentalium, ea jurisdictio dicitur. Non tamen inde consequitur & Sacramenta, & sacramentalia omnia sine jurisditione rite administrari. Sunt Sacramenta, quæ nullam jurisditionem desiderant, quæ scilicet ad unum Corpus Christi verum referuntur, qualis est confectio, & oblatio Eucharistiæ. Cetera Sacramenta, atque

que omnia sacramentalia quamquam præcipue ex Ordine pendeant, non ab alio tamen rite administrantur, quam ab eo, qui certa præterea jurisdictione polleat, tanquam ea, quæ ad Corpus Christi mysticum sanctificandum, expiandumque referuntur.

Ratio inde petitur, quod in Corpus Christi verum nulla Sacerdotum jurisdictionio est; jurisdictionio in Corpus Christi mysticum, idest in fideles, exercetur.

### III.

Itaque jurisdictionis nomen in Ecclesia latissime patet, atque omnia sacrorum administrorum officia pene comprehendit. Conciliorum celebratio, ministrorum electio, oblationum administratio, judicia sacra, officiorum partitio, templorum erectio, reorum coercitio, & multa his similia, qualiacumque, & quantacumque sint, omnia jurisdictionis esse dicuntur.

### IV.

Inde liquet antiquissimam esse originem jurisdictionis sacrorum, nimirum altissime repetendam vel ex ipso jure gentium, quod jus Divinum positivum præcessit, quamquam jurisdictionio ipsa sacrorum sit Divino etiam positivo jure confirmata. Revera nulla potest esse sacrorum societas, nisi sint, qui eidem

societati præsent, & jurisdictione polleant conditioni societatis accommodata. Hæc jurisdictionis ante mosaicam legem fuit in sacerdotibus gentium. Ex mosaica lege in populo Dei fuit in Aaronica tribu ex Divino præcepto. Post Christi adventum translata est in Apostolos, & Apostolorum successores, non quasi nova quædam per se jurisdictionis esset, sed quasi Divino judicio confirmata, traducta, & certis personis adsignata.

Ex hac altissima origine jurisdictionis, quæ in jure gentium causas primigenias positas habet, colligitur jurisdictionem sacram, qua in parte sine potestate Ordinis exercetur, subjacere humanis moribus, mandatis, statutis, privilegiis, & mutationibus legum.

## TITULUS II.

### DE ECCLESIASTICO FORO,

*Sive interno, sive externo.*

#### I.

**E**T si forum proprie dicatur locus, in quo publica judicia exercentur, ut tamen etiam judiciis ecclesiasticis fori nomen accommodaretur, obtinuit duplex dici Ecclesiæ forum, prius internum, posterius externum.

#### II.



## II.

Antistites ecclesiastici duplicem habent potestatem. Vel enim consulunt privatorum quorumcunque spirituali saluti; tum vero dicuntur potestatem interni fori explicare: vel consulunt directo in utilitatem generalem Ecclesiæ; tum vero dicuntur potestatem externi fori exercere.

Fateor privatorum utilitati cohærere semper utilitatem publicam: & e converso ex publica utilitate emergere privatorum utilitatem. Semper tamen facile est dignoscere, in quonam potissimum publica, in quonam potissimum privata utilitas versetur, ut inde dispiciatur, quandonam externi, quandonam interni fori jurisdictio exerceatur.

Ut exempla tradam, privatæ monitiones, ipsæ etiam prædicationes, item absolutio a peccatis, & similia præcipue diriguntur in singularem cujuscumque fidelis utilitatem. En potestatem interni fori. E contrario censurarum, & poenarum indictio ad terrendos pravos homines, legum editio, designatio sacrorum administratorum, præcipue diriguntur in publicam utilitatem. En potestatem externi fori.

## III.

## III.

Non omnium sacrorum administratorum est utriusque fori jurisdictio. Utramque habent Episcopi universi. Facilius Presbyteris conceditur potestas interni fori. Si quando Sacerdotibus Episcopo inferioribus, aut etiam clericis singulari jure tribuitur externi fori jurisdictio, id veluti insigne privilegium habetur, ex quo dignitas constituitur. Hujusmodi sunt Vicarii Episcoporum, item Abbates, & Prælati inferiores numero plurimi, qui præsertim nullius diœcesis esse dicuntur.

## TITULUS III.

*Quomodo jurisdictio ecclesiastica adquiratur,  
& quando.*

## I.

**J**URISDICTIO vel ordinaria est, vel singularis, vel delegata. Ordinariam dico, quæ competit certæ dignitati ex ejusdem primigenia dignitatis natura, & quæ ab ipsa dignitate evelli vix potest. Hujus generis est dignitas Episcoporum. Singularem dico, quæ competit quidem certæ dignitati ita ut cuiusque in dignitate successori comperat, non tamen vi primigenia dignitatis, sed accessione quadam, veluti ex privilegio, ex consuetudine,

dine, ex præscriptione, aliisve id genus singularibus titulis. Hujus generis sunt dignitates Abbatum, aliorumve Prælatorum Episcopo inferiorum. Delegatam dico, quæ competit certo mandato, ceu Legatis, Delegatisque Pontificiis, Vicariis Episcoporum, & similibus.

Notanda erant hæc discrimina, ut via sterneretur ad definiendum, quomodo, & quando jurisdictio adquiratur.

## II.

Itaque in primis si de ordinaria jurisditione quæretur, quæ competit Episcopis, ea statim acquiritur, ac quis Episcopalem dignitatem nactus est, & quidem tanta, quanta dignitati competit primigenio jure, nisi legibus, & reservationibus coercita fuerit. Adquiratur autem ex jure communi Decretalium a die electionis confirmatæ, etiam ante consecrationem Episcopalem.

## III.

Singularis jurisdictio competens Prælati Episcopo inferioribus acquiritur dignitati ex titulo singulari, ceu consuetudine, præscriptione, privilegio, & quidem tanta, quantum consuetudo, præscriptio, privilegium demonstrat; nisi constet derogatum jure fuisse. Adquiratur personæ statim ac dignitatem quis  
ad-

adquirat, eodem modo, quo de Episcopis dictum est.

#### IV.

Jurisdictione delegata acquiritur mandatis, & tanta, quanta mandatis eisdem continetur. Amittitur iis omnibus modis, quibus mandata expirant.

### *TITULUS IV.*

#### DE JUDICIBUS IN ECCLESIA.

##### I.

**S**UUM quoque est apud Prælatos Ecclesiæ tribunal, in quo publica quædam judicia exercentur. Hoc postulavit modo certarum causarum qualitas, modo certarum personarum conditio.

Hoc tribunal exercetur ab iis, qui jurisdictionem habent in foro externo, sive ordinariam, sive singularem, sive delegatam, quemadmodum dictum est in §. 1. tituli præcedentis.

##### II.

Causæ, quæ Judicem ecclesiasticum postulant, sunt illæ, quæ religionem ipsam spectant, ceu definitio fidei, administratio Sacramentorum, ac sacramentalium, atque his similia. In foro Ecclesiæ interno Judici ecclesiastico

ecclesiastico subsunt causæ omnes, in quibus agitur de criminibus, vel delictis pœnitentia expiandis. In foro externo subsunt illa crimina, quæ etiam censuris, aut pœnis ecclesiasticis puniuntur.

### III.

Personæ, quæ Judici ecclesiastico subji- ciuntur, sunt clerici, & quidem ex natura iudicii, si de rebus sacris, si de eorum ministerio, si de canonum observantia, si de pœnis canonicis agatur. Ex constitutionibus Principum in civilibus causis clerici apud ecclesiasticum Judicem conveniuntur, quamquam si contra laicos agant, Judicem laicum adire debeant. In criminalibus causis serius clerici privilegio ecclesiastici fori donati sunt; imo & si enormia crimina sint, veluti læsæ Majestatis, ne tum quidem hoc privilegio fruuntur.

De conflictu judiciorum, qua apud ecclesiasticos, qua apud civiles Judices sæpe ac sæpius disputatum est, siue ratione causarum, siue ratione privilegii personarum. Disputationibus hujus generis ut plurimum finis impositus est initis transactionibus, ac concordatis.

### IV.

Judices in Ecclesia, & in singulis diocesisibus sunt Episcopi omnes, vel qui nomine Epi-

Episcoporum jurisdictionem exercent, illorum Vicarii, pro modo mandati. Infra Episcopos judicium gerere possunt quotquot Prælati inferiores singulari titulo jurisdictionem quasi Episcopalem nacti sunt, aut etiam jurisdictionem Episcopalem, ceu Vicarii Capitulares Sede Episcopali vacante. Supra Episcopos judicium gerunt in causis appellationum Archiepiscopi, Primates, Patriarchæ, ac præcipue Pontifex Maximus,

### V.

Sæpe contingit, ut Pontifex Maximus constituat Judices in provinciis, ac diocesisbus nomine suo judicatuos. Olim nihil definitum erat de horum Judicum dandorum qualitatibus, dummodo doctrina, & prudentia polerent causæ accommodata. Bonifacius VIII. definivit non alios designandos esse Judices, quam in dignitate, vel personatu constitutos, aut saltem Canonicos Ecclesiæ cathedralis, cap. 11. de rescript. in 6. Concilium Tridentinum sess. 25. de ref. cap. 10. statuit, ut in provincialibus, aut diocesanis Synodis viri quidam seligerentur præditi qualitatibus, quas Bonifacius VIII. constituerat, & alioquin ad id apti, quibus in posterum jurisdictione a Sede Apostolica delegaretur. Hinc isti appellati sunt Judices synodales.

*TIT.*

## TITULUS V.

## DE FORMA JUDICIORUM ORDINARIA.

## I.

**O**Rdo judiciorum ecclesiasticorum in foro externo alius olim fuit, alius hodie, & quidem jam a pluribus sæculis observatur. Olim judicia apud Episcopos duplicis generis erant: vel enim spectabant causas suapte natura ecclesiasticas, ceu de rebus Divinis, & sacris, ac de tuenda canonum disciplina inter clericos adhibito censurarum terrore, & pœnarum ecclesiasticarum usu: tum vero in medio Sacerdotum, & Diaconorum Episcopus sedens causam collectis suffragiis dirimebat sine strepitu, & figura judicii, sed de plano, ita ut omnia quiete, tranquille, & cum profectu omnium finirentur. In gravioribus autem causis convocabatur Synodus dioecesana, atque in ea definitio fiebat; quandoque etiam referebatur res ad provinciale Concilium, cujus sententia judicio finis imponebatur, nisi ad majus Concilium provocaretur. Vel judicia spectabant causas civiles, etiam clericorum, aut monachorum: tum vero Episcopi arbitros potius, quam judices agebant: nimirum ex consensu partium judicabant, atque ubi utraque pars ad-  
quievisset

quievisset Episcopali iudicio, publici iudices sententiam exequabantur.

De hoc Episcopali arbitrio plures extant leges in codice Theodosiano: extat etiam titulus *de Episcopali audientia* in codice Justinianæo: plura quoque statuit Justinianus in suis novellis constitutionibus, præsertim in nov. 79. & 83.

Interea sacri canones monebant clericos, ut Episcopali potius arbitrio se subicerent, animosque suos invicem Episcopali sententiæ conciliarent, imo nec primum laicos in foro publico convenirent, nisi Episcopum certiolem de causa fecerint.

Dixi, hanc disciplinam obtinuisse in causis civilibus: etenim ubi de criminali causa ageretur, & clericus crimen quoddam publicum, idest publicis legibus coërcitum, admisisset, causa hæc criminalis magistratui publico reservabatur ad pœnam publicam infligendam. Tantum ad honorem clericalis ordinis constitutum fuit, ut clericus criminis reus, antequam pœnis publicis a magistratu publico damnaretur, Episcopali officio deiceretur a gradu suo, idest a clero abjiceretur; quemadmodum liquet ex Justiniani novellis modo laudatis.



## II.

Recentioribus sæculis, præsertim postquam causæ omnes civiles clericorum, magna etiam pars causarum criminalium, ad Episcopale forum adductæ sunt, alia invaluit disciplina, & forma judiciorum. Imitati fuerunt Episcopi ordinem judiciorum, qui apud civiles magistratus in usu erat. Judicia synodalia non nisi extra ordinem adhibita sunt. Soli Episcopi, vel illorum Vicarii judicis partes susceperunt.

Viri eruditi cum causas investigarunt variatæ disciplinæ, tum plures adduxerunt. Meo judicio præcipua causa ex eo repetenda est, quod post sæculum Ecclesiæ undecimum viri ecclesiastici cœperunt in studia civilis jurisprudentiæ incumbere, atque utriusque juris disciplinam nexu quodam componere. Gratiani collectio, & pone sequentes Decretalium codices, in quibus multa ad jus etiam civile exacta traduntur, novam hanc judiciorum formam provexerunt.

## III.

Equidem inde judicia adhuc duplicis generis esse potuerunt, nimirum aut summaria, aut ordinaria. Summaria dicuntur, in quibus insuper habentur judiciorum ritus, & solennitates, dummodo ea, quæ natura judicii postulat

*Instit. Pars II.*

K

stulat

stulat, teneantur, veluti citatio rei, probatio ex parte actoris, & admissio exceptionum ex parte rei. Sunt quædam causæ, in quibus statutum est, ut summario judicio procedatur, quales sunt matrimoniales, causæ mercedum, & miserabilium personarum, & aliæ. Judicia ordinaria dicuntur, in quibus præter ea, quæ natura judicii postulat, adhibentur ritus omnes legibus præstituti.

#### IV.

Tres personas ad judicium concurrere necesse est; nam in causis civilibus demonstrantur actor, reus, & judex; actor, qui petit, reus, qui convenitur, judex, qui sententia litem dirimit; in causis criminalibus demonstrantur accusator, vel qui vicem accusatoris sustineat, qualis est promotor, ut ajunt, fiscalis, reus criminis insimulatus, & judex, qui reum aut condemnet, aut absolvat.

In criminalibus causis procurator nunquam admittitur, contra in civilibus. Veteres quidem Romani etiam in civilibus causis procuratorem respuebant. Sed inde ab ea disciplina recessum est, inventa tamen quadam juris fictione, qua tradiderunt, procuratorem esse dominum liris. Simplicitas recentioris ætatis scrupulosas hasce fictiones vix retinere potuit, eatenus nimirum, quatenus  
procu-

procurator in judicio habetur, ac si principalis ipse in judicio se sisteret.

Hinc quædam sunt, in quibus opus est, principales ipsos per se apud judicem comparere, videlicet dum de facto suo interrogantur, vel jusjurandum exigitur ab ipsis, nisi quibusdam in causis eligant potius procuratorem speciali mandato instruere.

### V.

Omnia judicia civilia ( de criminalibus heic amplius non loquor; de his enim opportunius agetur in libro quinto ) hanc formam ordinariam habent. Exordium fit a vocatione in jus, seu citatione rei, ut coram judice se sistat, actori petenti responsurus, & exceptiones, si quas habeat, allegaturus. Si citatio omittatur, quæcumque acta successerint odio rei, prorsus irrita sunt.

Romani veteres distinguebant vocationem in jus a citatione; atque hoc discrimen postulabat singularis judiciorum disciplina, qualis apud illos in usu erat: nimirum apud illos & persona, & officium magistratum distinguebantur a persona, & officio judicum. Magistratus jurisdictione præditi erant. Ipsi judicem dabant, & sententiam dati judicis exequiebantur. Judices tantum notionem habebant, idest potestatem cognoscendi de

caussa, & sententiam ferendi. Ergo primum opus erat, ut actor apud magistratum constitueret reum, ut iudex designaretur: hæc dicebatur in jus vocatio. Iudice constituto a magistratu, reus erat apud iudicem conveniendus. Hæc dicebatur citatio. Recentioribus sæculis cum magistratus per se judicia exercuerunt, tum ea distinctio in jus vocationis, & citationis evanuit. In foro ecclesiastico vix ea distinctio locum unquam invenit.

### VI.

In judiciis ordinariis citatio fit exhibita ab apparitore scriptura, & quidem exhibita reo ipsi, si inveniatur, aut relicta apud domesticos, vel vicinos, si domi reus non inveniatur, aut appensa ad fores domicilii rei, si absens sit, & ignoretur, quo loco degat. In ea scriptura non modo actoris, & rei nomina designanda sunt, verum etiam designandum nomen iudicis, apud quem reus convenitur, item locus iudicii, ac dies; deinde causa est exprimenda, ob quam reus convenitur, ut inde deliberare reus queat, quid sibi agendum sit.

### VII.

Si reus vocatus minime compareat post tria iudicis edicta, aut post unum edictum, quod unum pro omnibus dicitur, ac peremptorium, reus ipse tanquam contumax habetur. Contumacia

tumacia autem admittitur a reo, five reus expresse profiteatur, se comparere nolle, five dolo latitet, ne inveniatur. Contumacis pœna est, ut actor, quod petiit, consequatur, ut reus teneatur ad luendas impensas ab actore factas, ut interim actor mittatur in possessionem bonorum rei, ut reus magis magisque ad se in iudicio sistendum concitetur.

### VIII.

Actor cum primum ad iudicem accedit, petiturus ut reus iudicis auctoritate citetur, libellum debet iudici exhibere. In eo actoris, & rei nomina describenda sunt, specialis exhibenda petitio, & summatim exponendæ causæ petitionis, ut inde constet, quæ, & qualis actio proponatur. Impetrato citationis edicto, citatoque reo, actor debet iterum apud iudicem se sistere, propositurus quid ipse petat, & legitimis argumentis probaturus se rite, ac iuste perere. Cum reus citatus se quoque in iudicio sistit, seque legitimum contradictorem actori opponit, tum dicitur fieri contestatio litis; cujus contestationis effectus præcipuus est, ut quæ actio forte temporaria foret, inde perpetua reddatur.

### IX.

Tempore litis contestatæ olim fiebat iuramentum calumniæ five ab actore, five a reo;

ita dictum, quod actor juraret se sine calumnia actionem instituisse, & sine calumnia se iudicium prosecuturum; e converso juraret reus, se sine calumnia obistere, ac propositurum eas, quæ sibi competunt, exceptiones. Hodie vero hoc iuramentum præstari amplius non solet, forte ne frequens detur perjuryis occasio.

## X.

Actoris munus est, quod contra reum proposuit, probare, nisi reus confessione sua actorem ipsum ab onere probandi levet. Hanc ob causam admittuntur in iudiciis rei interrogationes, quas appellant *positiones*, eo consilio, ut si reus fateatur, actor a probatione eximatur, si reus neget, actor probare teneatur. Probationis causæ ad hæc summa capita reducuntur: videlicet ad instrumenta, ad testes, ad ocularem inspectionem, ad notorium, ad famam, ad præsumptionem. Probatio modo plena est, si talis sit, quæ iudicis animum expleat; modo semiplena, si talis sit, quæ iudicem movere quoquomodo possit, non tamen omnino persuadeat. Sæpe cum probatio semiplena est, deferitur actori iuramentum, quod suppletivum dicitur; actore autem iurante, probatio habetur, ac si plena fuisset. Ubi actor non probet, quod proposuit, reus absolvitur.

## XI.

## X I.

E converso rei munus est, si quas habet contra actorem exceptiones proponere, easdemque probare: qua in parte receptum est, reum excipiendo quodammodo fieri actorem, idest probare debere exceptionis causas eisdem modis, quibus actor causas actionis probare debet. Sæpe inter actorem, & reum proponuntur mutuæ petitiones; liberum enim est reo actorem in eodem judicio reconvenire, etsi de alia re, & causa agatur; & in hac parte actor nequit personam electi judicis declinare, etsi alias ejus judicis jurisdictioni non subesset. Si contra exceptiones actor opponere velit, ipsa oppositio appellatur replicatio. Atque ita per varias oppositiones ad causæ instructionem utrinque contenditur.

## X I I.

Exceptionum reo competentium plura sunt genera: aliæ enim sunt declinatoriæ, veluti si judex suspectus dicatur, aut minime competens; aliæ dilatoriæ, veluti si opponatur, nondum venisse tempus, quo actio proponi in judicio possit; aliæ peremptoriæ, quæ actionem prorsus elidunt, veluti si dicatur, jam solutam esse pecuniam, quæ debita erat, & petitur.

TIT.

## TITULUS VI.

## DE SENTENTIA, ET RE JUDICATA.

## I.

**J**UDICIS officium est, ut sententiam proferat, &, nisi aliud obster, prolatam exequatur. Triplex autem est sententiarum genus: aliæ dicuntur a pragmaticis sententiæ *provisionales*, quæ litem minime dirimunt, imo vix ad causam pertinent, de qua contenditur, sed spectant certa interim emergentia adjuncta, quibus abs judice sit consulendum. Veluti cum de causis divortii inter virum, & uxorem disputatur, & interim judex decernit, ut vir alimenta uxori seorsim viventi suppeditet. Aliæ dicuntur sententiæ *interlocutoriæ*, quæ utiles quidem sunt ad causam instruendam, & ad clariora reddenda litis argumenta; non tamen litem ipsam dirimunt universam; veluti cum judex pronunciat, causas suspicionis a reo propositas inanes esse, edita instrumenta nullo vitio laborare, aut similia; aliæ denique dicuntur sententiæ *definitivæ*, quæ toti judicio finem imponunt, quibus propterea reus aut absolvitur, aut damnatur.

## II.



## II.

Sententia debet esse certa, a competente iudice pronunciata, vocatis partibus prolata, in loco Curiae publicata, si de ordinario iudice agatur, denique in scripturam redacta. Vix opus est admonere sententiam debere esse juri consentaneam.

## III.

Nisi a sententia fuerit intra tempus legitimum appellatum, eadem semper transit in rem judicatam, quæ pro rei veritate existimatur. Excipe casum, quo sententia sit ipso jure nulla, vel quo sine peccato quis sententiam exequi nequeat, quod quandoque contingit in causis matrimonialibus.

Finge enim vero, iudicem pronunciasse, matrimonium consistere inter eos, quorum uni certo constat, se consanguineum conjugis esse. Iste non tenebitur parere iudicato, cap. 7. de re judicata.

## IV.

Pronunciata sententia nihil aliud superest, quam ut executioni mandetur, nisi executio suspensa fuerit interposita appellatione. Porro exequi sententiam illius est, qui sententiam pronunciavit.

## TITULUS VII.

DE APPELLATIONIBUS, QUERELIS,  
ET DEVOLUTIONIBUS.

## I.

**N**ON frustra constituti sunt in Ecclesia, qua minorum, qua majorum Antistitum gradus. Cum enim contingere possit, ut Prælati aut jurisdictione, qua pollent, abutantur, aut muneri suo præsto non sint, decuit maxime, ut inferiorum per superiores aut cohibeatur excessus, aut defectus suppleatur. Id fit vel appellationibus, vel querelis, vel devolutionibus. Appellatio locum habet in causis judiciariis; querelæ fit locus, ubi causa quædam emergat extra judicii figuram: devolutio admittitur, quoties non causa privatorum, sed causa publica utilitatis ecclesiasticæ versatur.

## II.

Quacumque ratione aut cohibendus sit excessus, aut supplendus defectus inferiorum Antistitum, regula generalis est, proximum superiorem intercedere. Hinc si agitur de Episcopo, excitatur jurisdictio Metropolitanæ; si de Metropolitano agatur, Primas, vel Patriarcha officio suo præsto est; si denique agatur de Primæ, vel Patriarcha, suprema Pontificis

rificis Maximi potestas intercedit. Cum de mandata jurisdictione sermo sit, a Vicario generali Episcopi, non Episcopus, sed Episcopi superior appellatur, proptereaquod Episcopi, & Vicarii generalis Episcopalis unum, idemque tribunal est. At a delegato Pontificis Maximi, Pontifex idem Maximus appellatur, cum non tota jurisdictio Pontificia delegato mandetur.

### III.

Itaque appellatio in primis locum habet in judiciariis causis, in quibus interest litigantium privatorum. Appellatur ab ea sententia, quæ definitiva est, non autem ab interlocutoria, nisi hæc vim habeat definitivæ, & cujus gravamen per appellationem a definitiva reparari nequeat, uti definitum est in Concilio Tridentino sess. 24. de ref. cap. 20. Appellatione pendente nihil est innovandum, adeo ut sententia, a qua appellatum est, in suspenso remaneat.

Sunt tamen sententiæ quædam, quæ appellatione non obstante adhuc executionem habent, vel natura sui, vel ob publicam utilitatem ex præscripto legum. Ex natura sui statim executionem habent sententiæ, in quibus executio a sententia distingui nequit, uti contingit in sententia excommunicationis. Ob  
publi-

publicam utilitatem ex præscripto legum executionem statim habent sententiæ Episcoporum latæ ob morum reformationem sine strepitu, & figura judicii, præsertim tempore visitationis. In his casibus dicitur appellatio locum habere quoad effectum devolutivum, non tamen quoad suspensivum. Id est interea sententia executionem habet, & judex, ad quem appellatum est, cognoscit, an sententia justa sit, eam reparaturus, si iniquam esseprehenderit.

#### IV.

Appellatio primum interponitur apud judicem, a quo appellatur. Penes hunc, qui se læsum putat, profiteri debet, se appellare, & quidem intra decem dies a die publicatæ sententiæ numerandos. Olim etiam læsus tenebatur petere apostolos, id est libellos dimissorios, quibus abs judice sententiam effato ad judicem appellationis dimitteretur. Hodie apostoli fere ab usu exoleverunt. Deinde interposita appellatio introducitur apud judicem, ad quem appellatum est, & quidem intra spatium triginta dierum. Denique ex jure scripto annus conceditur ad appellationem proseguendam; quamquam prudentis superioris arbitrio relinquitur tempus, intra quod sententia ferenda sit.

#### V.

## V.

In iis causis, in quibus quis se læsum a suo Prælatō existimat extra iudiciū, conceditur locus querelæ apud superiorem Prælatum interponendæ: qua in specie qui queritur apud superiorem, actoris quodammodo partes sustinet, nemo est, qui rei partes sustineat. Prælatus superior, accepta querela, totum in se negotium suscipit, Prælatum inferiorem de querela privatim certiorem facit, causas percunctatur ab eo, & juxta accepta responsa de querelâ, & responsorum æquitate iudicat, iustitiam redditurus illi, qui conquestus est, si iustam fuisse querelam agnoverit.

Duobus exemplis rem demonstro: finge primum clericum diaconum sine causa a suscipiendo sacerdotio ab Episcopo rejici. Conqueritur ille apud Metropolitanum: Metropolitanæ partes sunt, causas ab Episcopo sciscitari; ubi nullæ sint, Episcopum commonefacere, hortari, & si id non sufficiat, adhibitis juris remediis adigere. Finge deinde, contracturos matrimonium habere causas in Concilio Tridentino probatas, quibus dispensationem a denunciationibus ab Episcopo postulaverint. Ubi dispensare Episcopus sine causa renuerit, similiter conqueri apud Me-

tro-

ropolitanum possunt, qui ex officio Episcopum certiorum de querela reddet, ubi legitimam esse causam noverit, commonefaciet, atque etiam adiger.

Obiter hic adnotare juvat, querelam adhuc quandoque proponi posse apud ordinarium adversus privatos, quando scilicet quis certum opus præstare tenetur, & illi, cujus interest opus præstari, nulla potest competere actio; sic monasteria quædam, quæ neque in communi quidquam acquirere possunt, proponunt querelam penes judicem adversus eos, qui certam rem monasterio debent. Cum monasterium actione destituitur, tum judex accepta querela ex officio procedit.

#### VI.

Denique quandoque fit locus devolutioni, ex qua superior sponte, & nemine postulante ea peragit ex publica utilitate, quæ alias inferior agere debuisset. Id contingit, ubi inferior negligit ea onera implere, quæ sibi ex lege imposita sunt. Hinc si Episcopus negligat beneficia conferre ad sui collationem spectantia, collatio beneficiorum ad Metropolitanum devolvitur. Imo hac in specie certa in jure præstituta sunt tempora, nimirum sex mensium, ut devolutioni locus fiat.

Non

Non est omittendum, etiam devolutionem locum habere adversus privatum, cui jure certa imminet obligatio. Hinc cum patroni Ecclesiarum debeant intra certum tempus vacanti Ecclesiæ consulere, præsentatione rectoris, negligentiam illorum jure devolutionis ordinarius supplebit.



LIBER

LIBER IV.  
DE REBUS ECCLESIAE.  
TITULUS I.

DE RERUM DIVISIONE IN ECCLESIA.

I.



**S**i utilitas commerciorum in civili societate causam præbuit partitioni rerum eidem societati competentium; æquabilis quoque cujusdam commercii ratio est in societate sacrorum, sive in Ecclesia, unde rerum quædam divisio profluit sacræ eidem societati accommodata. Est in ea in primis magnum, & ineffabile commercium, quod Deus habere cum hominibus voluit, quod Christus Deus homo pepigit. Ad hoc commercium spectant res Divinæ, nimirum a Deo ipso institutæ, paucæ quidem numero, sed mirabiles, sed Divina virtute præcellentes, sed satis idoneæ ad eos fines, quos Deus ipse singulari clementia sua proposuit.

Hujusmodi sunt Sacramenta, quibus & nos fidem nostram testemur, & spem nostram erigamus in Deum, & Deus superna dona sua nobis tribuat.

II.



## II.

Istud ipsum magnum, ineffabile commercium Ecclesia, potestate sibi a Christo tributa utens, promovit, nonnullis institutionibus, quæ prope res ipsas Divinas attingerent, & quodammodo imitarentur, atque ob hanc rem Divinæ certa ratione appellari possunt. Hæ sunt res sacræ. Istis Divina virtus inesse quidem potest, non sane ex expresso speciali Divini Numinis pacto, sed ex Ecclesiæ instituentis fiducia, quam maxime fovent, atque erigunt generales Christi promissiones, & concessæ facultates: ex hac causa ego res sacras a Divinis distinguo. Ut clarius loquar, res Divinæ a Deo datæ sunt Ecclesiæ: res sacræ ab Ecclesia Deo offeruntur.

Hujus generis sunt sacramentalia, dedicationes ædium, & supellectilium, quibus ædes sacræ instruuntur ad usum sacrorum.

Ex dictis colligitur, omnes res Divinas etiam proprie sacras appellari debere; non tamen e converso res omnes sacras proprie esse Divinas.

## III.

Res ipsæ seu Divinæ, seu sacræ, quibus ineffabile inter Deum, & homines commercium constat, utut spirituales sint per se, atque incorporeæ, corporalibus tamen, & sensibilibus

bilibus adminiculis indigent ; sive quod Ecclesia visibilis esse debeat , sive quod homo & ipse corporeus sensibilibus signis opus habere videatur , quibus ad Divina eleveetur . Hæc adminicula tertiam rerum speciem constituunt in Ecclesia , atque has res ego appello res Divinis , sacrive rebus aut conjunctas , aut prope cohærentes .

Hujusmodi sunt symbola in Sacramentis , ac sacramentalibus , materia , quibus ædes sacræ , ac suppellectilia sacra constant , redditus Ecclesiarum , quibus ædes sacræ , ac suppellectilia curentur , & sacris ministris prospiciatur .

#### I V.

Succedit alterum in Ecclesia commercium , quo devinciuntur fideles inter se , & mutuis charitatis officiis se se complectuntur . Hinc res quædam piæ in Ecclesia designantur a rebus Divinis , sacrisque distinctæ . Pietas quidem ipsa incorporea res est , sed corporalibus adminiculis exercetur ; hinc res piæ rebus corporalibus adcenferi etiam possunt .

Hujus generis sunt Xenodochia , & omnis generis opera charitatis .

Non repugnat autem quasdam esse res , quæ simul sint & adminicula sacrorum , & officia pietatis , uti liquet in bonis , quibus beneficia ecclesiastica constant : quippe hæc  
bona

bona & Ecclesiis factis tuendis, & instruendis sacris suppellectilibus, & alendis sacris ministris, & levandæ pauperum inopiæ serviunt.

### V.

Et quando pietas non solum exercetur in fideles viventes, sed etiam in defunctos cum Christo capite charitate conjunctos, nostra aut officia, aut suffragia expectantes, designari debet alia species rerum, quæ vocantur religiosæ.

Hujus generis sunt Sanctorum reliquiæ, fidelium sepulturæ, & funerum officia universa.

Non repugnat autem, quasdam esse res, quæ simul sint adminicula sacrorum, & spectent aut pietatis, aut religionis in defunctos officia.

### VI.

In rebus Divinis æque ac sacris; item in rebus piis æque ac religiosis, & adminiculis earum universis, præter jura communia, quæ fidelibus universis competunt, sunt etiam quædam jura singularia nonnullorum: atque ista jura efficiunt aliam rerum speciem, quæ res sunt prorsus incorporales.

Hujusmodi sunt jura electionum, jura patronatus, & similia.

### VII.

Res Divinæ, ac sacræ in nullius dominio sunt. Sunt autem ad usum, & utilitatem fide-

lium omnium paratæ, ministerio, ac dispensationi sacrae hierarchiæ pro singulorum administratorum modo, & ordine commissæ.

### VIII.

Res corporales, & sensibiles, quæ rebus Divinis, aut sacris cohærent, potuerunt esse in dominio aliquorum, antequam rebus Divinis, aut sacris cohærent: postquam cohærerere cœperunt, vel symbola ipsa sunt, & figuræ, quibus res ipsæ Divinæ, aut sacrae continentur; tum vero eodem jure censentur, ac res Divinæ, vel sacrae, proindeque in nullo dominio sunt, usui omnium fidelium patent, & dispensationi hierarchiæ committuntur, veluti oleum in chrismate, parietes in sacris ædibus, lapides in altari, & similia: aut sunt subsidia quædam ita comparata, ut rebus Divinis, ac sacris exterius consulatur: tum vero sunt in dominio Ecclesiæ illius, cui competunt, dispensantur ab administris ejusdem Ecclesiæ, ceu curatoribus, & in eos usus, in quos collata fuerunt, veluti bona Ecclesiarum, & fidelium oblationes.

### IX.

Res piæ sunt in dominio societatis illius, cui commissæ sunt, exemplo rerum ad publica opera collatarum, quæ sunt in dominio Reipublicæ. Si res piæ conjunctæ sint rebus sacris,

sacris, seu rebus temporalibus, quæ sacris cohærent, illæ sunt in administratione clericorum, æque ac res ipsæ temporales, quæ sacris cohærent. Si res piæ a rebus sacris, vel ab iis, quæ sacris cohærent, separatæ omnino sint, etiam sacri administri earum curam obtinuerunt, quemadmodum superius adnotandum fuit tit. 10. libri 2. Quippe de cleri sollicitudine fiduciam magnam semper habuit fidelium societas, rata, clericos rite res pias juxta instituentium propositum esse impensuros.

## X.

Res religiosæ in nullius dominio sunt; usui omnium esse possunt: sunt autem in administratione ecclesiasticæ hierarchiæ.

## XI.

Denique jura sacris, ac religiosis rebus cohærentia sunt in dominio nullius, quippe quæ sunt omnino extra commune commercium posita. Tantum sunt in usu vel communi si communia sint, ceu jura christianæ communionis, vel singulari, si singularia sint, & certis tantum personis competant, ceu jura patronorum. Quodammodo dici possunt in dominio nostro eatenus, quatenus contra impediētes tueri eadem nobis possumus, &, si singularia sint, possumus eadem vindicare contra quemcumque illegitime occupantem.

## TITULUS II.

## DE REBUS DIVINIS,

*Ac primum de Sacramentis generatim.*

## I.

**E**TSI multæ sint in Ecclesia Divinæ virtutes, ac Divina dona, quibus ineffabile inter Deum, & fideles homines commercium agitur; qualis est inter plura, Divina prædestinatio, Divina gratia sive movens, sive adjuvans, sive sanctificans; cum tamen de rebus Divinis canonum cultores agunt, lucubrationes suas ad Sacramenta coërcent, cetera Theologis expendenda relinquunt. Itaque primum generatim de Sacramentis agendum est.

## II.

Sacramentorum nomine appellantur signa sensibilia a Christo servatore instituta ad fidelium sanctificationem. Septem numero recensentur: Baptismus, Confirmatio, Eucharistia, Pœnitentia, Unctio Infirmorum, Ordo, ac Conjugium. Horum institutione a Christo facta, abolita fuerunt Sacramenta veteris legis ad sanctificationem judaici populi a Deo instituta.

## III.

## III.

Duo illa Sacramenta Ordinis, & Conjugii instituta sunt bono universitatis, cetera bono singulorum. Ex iis, quæ instituta sunt bono singulorum, quædam sunt omnino necessaria ex natura, atque institutione sui, veluti Baptismus omnibus sine discrimine, ac Pœnitentia adultis peccatoribus; quædam necessaria ex præcepto, veluti Eucharistia certis temporibus; cetera utilia omnibus, & a nemine contemnenda. Cum Sacramentum necessarium est, & suscipi ob certa adjuncta nequeat, factis est, si votum suscipiendi Sacramenti eliciatur, cum primum suscipi poterit.

## IV.

Tria sunt Sacramenta, quæ semel tantum suscipiuntur, Baptismus, Confirmatio, & Ordo. Ista propterea dicuntur imprimere indelebilem characterem. Si prudenter dubitetur, an suscepta sint, sub conditione conferuntur.

## V.

Ex Sacramentis alia hominem Deo reconciliant sui natura, veluti Baptismus, & Pœnitentia; alia hominem jam Deo acceptum magis magisque in Divina gratia confirmant. Non repugnat autem & Baptismum, & Pœnitentiam invenire jam hominem reconcilia-

tum Deo, veluti eum, qui pridem Dei amore flagret, & votum suscipiendi Sacramenti conceperit; quemadmodum nec repugnat, quandoque cetera Sacramenta primum hominem Deo reconciliare ex singularibus causis, quæ emergere possint.

## VI.

Constant omnia Sacramenta rebus, & verbis. Rem recentiores appellaverunt materiam, verba appellaverunt formam sacramentalem. Utraque, sive materia, sive forma a Christo fuit instituta. Et materiam, & formam a Christo fuisse institutam in specie in duobus Sacramentis, nimirum in Baptismo, & in Eucharistia, certissimum est. An tantum in genere, an etiam in specie a Christo instituta fuerit in ceteris Sacramentis, adhuc positum est in Theologorum disputatione.

Materia in genere dicitur signum omne sensibile, quodcumque aptum est ad significandum singularem cujuscumque Sacramenti effectum. Sic etiam dicitur forma in genere, quæ verbis conceptis apta est ad indicandas cujusque Sacramenti rationes. Materia, & forma in specie dicitur, quæ inter plures idoneas selecta est ad Sacramenti collationem.

## VII.



## VII.

Ut decore Sacramenta ministrantur , ac recipiantur , certi ab Ecclesia adjecti sunt ritus , quos præterire nemini licet , nisi certæ , ac probatæ causæ subsint quibusdam in casibus . Hinc editi libri manuales , rituales , cœremoniales , pontificales , ac missales .

## VIII.

Sacramentorum administratio , seu dispensatio juribus sacerdotalibus ad censetur . Majoribus Sacerdotibus , idest Episcopis reservatur jure Divino sacra ordinatio majorum clericorum , item ordinarium Confirmationis ministerium . Cetera Sacramenta ministerio Presbyterorum commissa sunt jure Divino , ceu solennis Baptismatis collatio , Eucharistiæ confectio , oblatio , & dispensatio , absolutio a peccatis , unctio infirmorum , & benedictio nuptiarum , si verum est hanc benedictionem ad formam Sacramenti pertinere . Quandoque etiam Diaconi & solenniter baptizant , & Eucharistiam a Sacerdote confectam dispensant , sed tanquam vicarii , & adjuutores Sacerdorum . Jure ecclesiastico quædam Sacramenta sunt Parochorum ministerio reservata , uti solennis Baptismus , Eucharistia seu in Paschate omnibus , seu infirmis dispensanda , unctio infirmorum , & benedictio nuptiarum . Singularare

gulare est in Sacramento Baptismi, ob maximam ejusdem necessitatem, a quocumque etiam laico, etiam foemina, etiam non baptizato ministrari valide quidem semper, imo & licite, si necessitas id postulet.

# IX.

In eo, qui Sacramentum administrat, nec fides requiritur, nec probitas. Hinc hæreticus, aut improbus quisque, valide, nisi aliud obstat, Sacramenta confert. Requiritur tamen intentio faciendi, quod facit Ecclesia ex Christi institutione. An interna intentio requiratur, vel externa sufficiat, adhuc Theologi disputant. Interea minister tuto non agit, nisi intentionem internam habeat.

Cum intentio sit actus voluntatis, semper est interna ex parte ministri. Controversia de intentionis internæ necessitate tota spectat ministri scopum. Cum enim in Sacramento tria sint, primum actus sensibilis cortice tenus consideratus, alterum actus sensibilis a Christo ad spiritualia elevatus, postremum effectus Sacramenti ex Divina virtute derivans; qui putant sufficere intentionem externam, ajunt, sufficere, ministrum intentionem dirigere in actum sensibilem cortice tenus consideratum; qui e contrario intentionem internam requirunt, ajunt, debere  
mini-

ministrum intendere insuper in actum sensibilem a Christo ad spiritualia elevatum. Intentionem directam in effectus Sacramenti minime necessariam esse, certissimum apud omnes habetur.

Distingui etiam solet triplex intentionis species, nimirum actualis, virtualis, & habitualis. Actualem dicunt, quæ elicitur, quo tempore Sacramentum administratur: virtualem, quæ pridem elicitæ, perseverat adhuc virtute sua, dum Sacramentum administratur, etiam si quidquam inconsiderato incidat animo ministrantis: habitualem, quæ neque elicitur tempore administrationis, nec pridem elicitæ fuit, sed tantum consistit in habitu, idest in consuetudine ministrandi. Actualis intentio est omnium optima: virtualem sufficere passim traditur: habitualem omnes velut inanem prædicant.

#### X.

In eo, qui Sacramentum est suscepturus, si adultus sit, requiruntur eæ animi adfectiones, quæ Sacramento conveniant, ut effectus Sacramenti obrineatur: ut autem Sacramentum recipiatur, & Sacramenti character, sufficit intentio saltem virtualis. Exceptio est in Sacramento Pœnitentiæ, in quo nec Sacramentum quidem est, ubi pœnitens rite dispo-

dispositus non sit, propterea quod dispositio pœnitentis ipsa est Sacramenti materies. Si infans sit, qui Sacramenta suscipit, ne intentio quidem requiritur; intentionem enim pro eo supplet Ecclesia mater, quemadmodum contingit in Sacramentis Baptismatis, & Confirmationis.

Hinc receptum est, adultos non quidem invitos, & reluctantes, sed metu adductos ad Baptismum recipiendum, etsi alias non reciperent, adhuc tamen valide baptizari, cap. 3. in fine de Baptismo.

### *TITULUS III.*

#### DE SACRAMENTIS BAPTISMI, ET CONFIRMATIONIS.

##### I.

**O**LIM quo tempore Baptismus conferebatur, eodem conferebatur Confirmatio sive parvulis, sive adultis. Huic utrique collationi occasionem præbebat vetusta disciplina, juxta quam sicuti Confirmatio, ita Baptismus in ordinario Episcoporum ministerio erat. Quod si necessitas quemquam baptizari postularet absente Episcopo, tum Confirmatio in aliud tempus differebatur. Recentioribus sæculis distincta Sacramenti utriusque col-

collatio fuit; five quod Baptismus conferri infantibus cœperit, & satius visum est, Sacramentum Confirmationis differri in illud tempus, quo baptizati ad usum rationis pervenerint; five quod baptizandi munus esse cœpit proprium Parochorum, qui Sacramentum Confirmationis administrare non possunt.

Nihilominus in sacris canonibus Confirmatio adhuc appellatur Baptismi perfectio, ac complementum.

## II.

Per Baptismum Christo regeneramur. Res Sacramenti ex aqua constat, quæ ex ritu Ecclesiæ benedici solet statis diebus. Verba sacramentalia sunt: *Ego te baptizo in nomine Patris, & Filii, & Spiritus Sancti.*

Veteres solebant baptizandos in aquam immergere, eam ob rem fontes habebant baptismales a sacris ædibus separatos, in quos descendebatur. Raro ab immersione abstinebant, aquæ infusione contenti. Aliquando aquæ adspersione baptizavisse, sed perquam raro, multi censent. Hodie aquæ infusione Baptismus perfici solet. An valeat Baptismus in nomine Christi, sine expressa Sanctæ Trinitatis invocatione, Theologi adhuc disputant. Verosimilius est, non valere, propterea quod in Evangelio præceptum a Christo legitur,

gitur, baptizandum esse in nomine Patris, & Filii, & Spiritus Sancti. Si cui negotium fa-  
cessat canon *A quodam* 24. de cons. dist. 4.,  
adeat meas lucubrationes in codicem Gra-  
tianeum.

### III.

Olim soli Episcopi solenniter baptizabant  
statis certis diebus, videlicet Sabbato, quod  
præcedit sanctum Pascha, item Sabbato, quod  
præcedit diem Dominicam Pentecostes. Su-  
perest hodie hujus disciplinæ vestigium in be-  
nedictione fontium baptismalium. Ubi Epi-  
scopus impediretur, aut deesset, Archipresby-  
teri eo munere fungebantur. In quibusdam  
Ecclesiis etiam in die Epiphaniæ solenniter  
Baptismus conferebatur, ob memoriam re-  
colendam Christi eodem die in Jordane ba-  
ptizati. Paullatim officium baptizandi ad Pa-  
rochos omnes traductum est, atque hodie  
inter jura parochialia recensetur, quin tamen  
certi amplius dies adsignentur, necessitate ur-  
gente Baptismi ministerium cuicumque, &  
quocumque tempore & olim concessum est,  
& hodie conceditur.

### IV.

Quando Baptismus maxime necessarius est,  
salubriter caveri debuit, ut non diutius, præ-  
sertim imminente periculo differatur. Hanc  
ob

ob causam infantes recens nati baptizantur. Si de adultis agatur, solenter primum erudiendi in fide sunt, exploranda eorum voluntas, & certa catechumenatus tempora absolvenda, nisi periculum vitæ aliud postuler.

Olim catechumeni adulti variis exorcismis expiari solebant, quibus ad Baptismum præparabantur. Hodie adhuc exorcismi adhibentur, una cum ceteris ritibus, sed eo ipso tempore, quo Baptismus confertur. Si baptizandus in discrimen vitæ adductus sit, statim baptizatur, omissis ritibus, & exorcismis, quos inde supplent Parochi cessante periculo.

## V.

Solebant apud veteres ab Ethnicorum superstitionibus & adulti, & pueruli ad Baptismum adduci. Ne vero aut fictionibus locus esset, aut apostasiæ periculum foret, baptizandis accedebant fidejussores, quos appellabant susceptores: posterior ætas paternos, aut maternas appellavit. Sæpe plures hoc officio functi sunt: Concilio Tridentino cautum est, ut unus tantum, & altera ad summum hoc munus obeant. Imperatores christiani statuerunt, inter susceptores, & susceptos cognationem spirituales intercedere, quæ cognationis naturalis exemplo matrimonia impediret.

pediret. Sacri canones id confirmaverunt. Scholaſtici hanc cognationem extenderunt ad baptizantes, ad filios ſuſceptorum, ad ſuſcipientis uxorem, vel maritum, quæ omnia diuturna conſuetudo probavit. Concilium Tridentinum ſeſſ. 24. de ref. matrim. ad certas perſonas eo decreto expreſſas cognationis ejuſdem jura coërcuit; cap. 2.

# VI.

Sacramento Confirmationis Baptiſmus perficitur; in eo enim infunduntur Divini Spiritus ſacra chariſmata, quibus anima magis magiſque in fide firmatur, ac roboratur. Huius Sacramenti collatio Episcopis reſervatur. Ad hoc admittuntur, qui ad uſum rationis pervenerint. Intercedunt quoque ſuſceptores, quin tamen ulla ſpiritualis cognatio contrahatur. Verba ſacramentalia ab Episcopo recitantur juxta formam in Pontificali præſtitutam. Res Sacramenti eſt manuum impoſitio Episcopalis, ac inunctio cum chriſmate ab Episcopo benedicto. An manuum impoſitio, an potius inunctio ad Sacramenti ſubſtantiam pertineat, adhuc Theologi diſputant. Utraque adhibenda eſt; ſi alterutra omittatur, caute ſupplendum ſuper eſt quod fuerat prætermiſſum, uti legimus in cap. 1. de Sacramentis non iterandis.

*TIT.*



## TITULUS IV.

## DE SACRAMENTO EUCHARISTIÆ.

## I.

**C**ONSECRATIONE panis, & vini adhibitis Christi Domini verbis Sacramentum Eucharistiæ conficitur. Panem triticeum esse oportet, sive azymus sit, sive fermentatus. Ecclesia Græca usque adhuc fermentato utitur. In Ecclesia Latina jamdiu præceptum est, ut azymus adhibeatur. Vino aquam infundi perennis ritus fuit, quod ex Divina traditione nonnulli ex Patribus derivaverunt. Hoc Sacramentum dignitate sua cetera antecellit, propterea quod continet in se Corpus ipsum, & Sanguinem Christi sub speciebus panis, & vini.

## II.

Olim dispensabatur Eucharistia non solum fidelibus provectis, sed recens baptizatis quibuscumque etiam infantibus, eo ipso tempore, quo conferebantur Sacramenta Baptismi, & Confirmationis. Si de infantibus ageretur, ministrabatur Eucharistia sub sola specie vini ad labia admoti. Adultiores sub utraque specie communicabant, nisi certis in casibus decuisset solam speciem panis accipere, veluti cum Eucharistia ad absentes mittebatur.

*Instit. Pars II.*                      M                      Hodie

Hodie jamdiu obtinuit, ut laici omnes sola panis specie contenti sint, & tantum communicare sub utraque specie & possint, & debeant Sacerdotes Eucharistiam conficientes. Etenim qui Eucharistiam conficiunt, uti Divino jure sub utraque specie conficere debent, ita Divino jure debent utramque speciem sumere. Ceteri quamquam a specie vini abstinere, adhuc de Corpore, & de Sanguine Domini communicant, cum Christus totus in alterutra specie contineatur.

Quare salubriter cautum fuerit, laicos, & ceteros non celebrantes abstinere debere a specie vini, omnibus notum est.

### III.

Est Eucharistia & Sacramentum, & Sacrificium. Sacramentum consistit in statis rebus, & verbis. Singulare est in hoc Sacramento, ut permanens sit; facta enim consecratione, manet Corpus, & Sanguis Christi ad dispensationem. Sacrificium consistit in consecratione, & oblatione. Integrum Sacrificium est, cum facta consecratione, & oblatione, Sacerdos communicaverit. Sacrificium & viventibus prodest, & defunctis, nec distinguitur a Sacrificio, quod Christus ipse Dominus obrulit Patri in cruce, cum eadem victima sit in Eucharistia exhibita utut aliis symbolis demonstrata,

strata, idem etiam Christus, qui se Deo Patri pergit per suos administratos offerre. Sacrificium istud soli Sacerdotes offerunt. Sacramentum dispensare etiam possunt Diaconi tanquam Sacerdotum administri, seu adjutores.

#### I V.

In Sacramento Eucharistiæ ceu permanente tria contingunt, dispensatio, publica expositio, & solennis ad cultum publicum circumgestatio. Dispensatio hodie fit solis adultis, cum ad eam ætatem pervenerint, qua conscii esse possint de tanti Sacramenti dignitate. Adultis omnibus inculcandum est, ut quam optime possint, digne ac devote ad Sacramentum accedant, curentque, ut quam frequentius etiam fieri possit, de Corpore Christi communicent. Lateranense Concilium sub Innocentio III. cavit, ut saltem singulis annis Paschali tempore unusquisque hoc Sacramentum suscipiat. Morituris Eucharistia, veluti magnum præsidium, danda est ex Divino præcepto. Hodie Paschalis communio, & Eucharistiæ delatio ad infirmos inter jura parochialia recensetur. Nisi gravis infirmitas aliud suadeat, statutum est, ut quisque jejunus ad Eucharistiam sumendam accedat.

## V.

Publica expositio, & solennis ad cultum publicum circumgestatio fieri cœpit initio sæculi decimiquarti; licet enim jam olim obtinisset, ut Eucharistia custodiretur, id tamen solum fiebat gratia infirmorum, quibus, prout morbus urgeret, statim consuleretur tanti Sacramenti collatione. Quando concedendum sit, ut Eucharistia aut exponatur, aut gestetur publice ad fidelium venerationem, id totum in Episcoporum judicio positum est.

*TITULUS V.*DE SACRAMENTIS PŒNITENTIÆ,  
ET OLEI INFIRMORUM.

## I.

**E**TSI Baptismate homines regenerentur, quod nisi semel contingit, quia tamen labi ex infirmitate solent, duo instituta sunt ex Christi clementia Sacramenta, quibus illi reparentur, & pristinæ, uti ita dicam, salutis restituantur. Hæc sunt Sacramenta Pœnitentiæ, & Olei infirmorum.

## II.

Dedit in primis Christus Dominus Apostolis suis, & Apostolorum successoribus facultatem remittendi peccata. Hæc Divina virtus  
exer-

exercetur per Episcopos primum, deinde per Sacerdotes omnes, quibus ea potestas ab Episcopis communicetur. Duplex potestas ad id requiritur, Ordinis in primis, deinde jurisdictionis. Potestas Ordinis acquiritur vi Sacerdotalis consecrationis: potestas jurisdictionis acquiritur vel lege, vel mandato; lege, uti Parochis, ceterisque ordinariis ejus Sacramenti administris; mandato, uti iis omnibus, quibus ea facultas fit ab iis, qui jurisdictione ordinaria pollent.

Hoc Sacramentum instar judicii institutum est, proindeque sola Ordinis potestas minime sufficit; præter hanc requiritur jurisdictio.

Sunt quædam crimina, quorum absolutionem aut Episcopi, aut Prælati Episcopis majores sibi reservant. Ab his absolvere non potest inferior, nisi specialem facultatem ab eo acceperit, qui reservavit.

### III.

Potestas, quæ Sacerdotibus competit in administratione hujus Sacramenti æque consistit in absolvendo, ac retinendo: quippe fundamentum habet in iis Christi Domini verbis: *Quorum remisistis peccata, remittentur eis, quorum retinueritis, retenta sunt.* Cauti ergo, prudentesque esse debent Sacerdotes,

ne quæ remittenda sunt, retineant, aut ne e converso remittant, quæ sunt retinenda. Ex adfectionibus reorum judicandum est a prudente Sacerdore, num remittenda sint crimina, num retinenda.

#### IV.

Res, quæ in hoc Sacramentum venit, sunt peccata post Baptismum admissa; porissimum autem pœnitentis adfectiones, quæ dicuntur quasi materia hujus Sacramenti. Actus pœnitentis sunt detestatio admissi, criminum confessio, & aut satisfactio ipsa, aut saltem satisfaciendi propositum. Forma hujus Sacramenti sunt verba, quibus Sacerdos indicat, se reum a peccatis absolvere.

#### V.

Primum est detestatio admissi, quæ debet esse sincera; juncta cum proposito non peccandi de cetero, item elicita ex causa supernaturali, qualis est amor Dei. An ad Sacramentum Pœnitentiæ sufficiat detestatio peccati ex metu gehennæ, an requiratur insuper elicitus amor in Deum, Scholastici disputant. Tutius inde agit, qui amore Dei concitetur ad pœnitentiam peccatorum, eo etiam laudabilius, quo pressius Divinæ literæ universæ urgeant gravissimum præceptum amandi Deum. Ceterum dolor delictorum ex metu gehennæ

gehennæ conceptus bonus in se est, & certe valet ad disponendum hominem ad Poenitentiam.

## V I.

Necessaria quoque est criminum confessio, saltem illorum, quæ gravia sunt. Quomodo enim dijudicare Sacerdos poterit, an absolvendum sit a criminibus, an crimina retinenda, si de criminum & qualitate, & quantitate Sacerdoti non constet? Ne rei criminum ab hac confessione abstraherentur, docemur ab Ecclesia Divinis oraculis illustrata, confessionem esse oportere secretam, quam propterea auricularem vocant, eandemque ob causam Sacerdotem, apud quem quis confessus sit, nemini crimina pandere posse.

## V I I.

Denique necessaria est aut satisfactio, aut saltem satisfaciendi propositum. Quippe etsi per absolutionem & peccata remittantur, & teus in Divinam gratiam restituatur, remanet tamen aliquid, in quo & Deo, & Ecclesiæ satisfaciendum est, quod fit piis operibus, ceu eleemosynis, jejuniis, & exercitatione animi in optimis institutis, ac præsertim orationibus. Per hæc, siquæ adhuc supersunt, imæ criminum radices in animo contunduntur.

## VIII.

Tria hæc, quæ, ut dictum est, sunt Sacramenti quasi materies, sensibilia esse debent. Quid vero, si ex fato quodam sensibilia esse non possint, velut in eo, qui morbo corripiatur ita, ut penitus a sensibus abstrahatur? Quæ signa sensibilia infirmus præbuerit intimi doloris, & propositi satisfaciendi Divinis mandatis, cum convaluerit, loco materiæ esse poterunt, ut absolutio concedatur. Si nec sensibilibus signis infirmus animum pandat, bene anteaactæ vitæ præsumptio locum adhuc facere poterit absolutioni sacerdotali. Memor tamen debet esse Sacerdos in his casibus, se concipere debere absolutionis formulam sub conditione, si infirmus ad Sacramentum suscipiendum dispositus sit.

## IX.

Dolor de admissis criminibus, & propositum non peccandi de cetero ita necessaria sunt ad Sacramentum, ut sine iis inanis absolutio sit. Confessio peccatorum tum est necessaria, cum fieri potest. Satisfactio ipsa inducit quidem Sacramenti integritatem, sed adhuc Sacramentum sine ea consistit, dummodo tamen sit satisfaciendi propositum, sine quo nulla unquam Sacramenti vis esse potest. Qui proposuit, se satisfacturum, aut satisfacere



cere deinde per se debet, aut adjuvari meritis Christi, & Sanctorum ex dispensatione Ecclesiæ, quam dispensationem vocant concessionem indulgentiarum. Si necdum Deo satisfecerit, & moriatur, debet in altera vita peccati reliquias expiare in loco, quem purgatorium Ecclesia appellat. Atque hoc etiam in loco adjuvari quis potest orationibus, piisque operibus fidelium, imo & concessione indulgentiarum, per modum, ut ajunt, suffragii.

## X.

Apud veteres emerferunt olim libri nonnulli Pœnitentiales, ita dicti, quod designarent, quæ, qualis, & quanta satisfactio pro singulis pene criminibus immineret. Isti erant veluti norma quædam Sacerdotibus absoluturis. Multi quidem a sanctis, doctisque Patribus concinnati fuerunt; multo plures ab obscuris viris, imo & qui sanctos, prudentesque viros auctores habuerunt, fuere corrupti. Opportunum fuit recentiore ætate eos libros omnes abrogare, indeque factum, ut satisfactio prudentis Sacerdotis arbitrio relinqueretur; arbitrio, inquam, prudentis, ne forte credatur enormia scelera levioribus quibusdam operibus posse expiari.

## XI.

Et si privata, seu occulta crimina occulta pœnitentia expiari decet, si tamen crimina publica sint, & rempublicam læserint, ea expiari oportet etiam publicis pœnitentiis. Olim certæ erant constitutæ publicorum pœnitentium stationes, quas per gradus emetiri necesse fuerat. Prima statio erat flentium, sive lugentium in Ecclesiæ vestibulo; secunda audientium, quibus communis erat cum catechumenis locus: tertia substratorum, qui Ecclesiam ingrediebantur, dummodo non ultra ambonem progredierentur; postrema consistentium, qui cum ceteris fidelibus communem locum habebant, ab Eucharistica tamen communione abstinere jubebantur. In singulis gradibus sua pœnitentiæ opera injungebantur, & sua species erat singularis christianæ communionis; siquidem pro stationis qualitate modo minora, modo majora christianæ communionis jura aut concedebantur, aut denegabantur.

Publicæ pœnitentiæ aut indictio, aut relaxatio semper fuit Episcopis reservata.

Quandoque etiam privatorum, sive occultorum criminum rei sese publicis pœnitentibus sponte ex animi demissione immiscebant. His nemo molestiam ingerebat, in

ea

ea statione, in quam se immisissent, pro lūbitu remansuri.

Hodie perraro disciplina conspicitur publicarum pœnitentiarum. Friguit a sæculo Ecclesiæ duodecimo. Videntur publicorum pœnitentium rationes secutæ quædam laicorum confraternitates, quæ priscorum pœnitentium habitum in Ecclesiis induerunt. Si externis indumentis respondeant interiores animi affectiones, erunt sane & isti priscis pœnitentibus facile comparandi.

## XII.

Si quis infirmatur, paratum habet ex Divina institutione, juxta tradita a sancto Apostolo Jacobo aliud Sacramentum, quo advocatis Presbyteris infirmus oleo ungatur, & ex quo allevietur infirmitas, & remittantur peccata. Vulgo hæc unctio dicitur extrema, quia supponit infirmum jam unctum olim fuisse oleo catechumenorum in Baptismate, & sacro chrismate in Confirmatione. Ex eo quod ex traditione Apostoli, Presbyteri vocandi sint, liquet Presbyteros esse hujus Sacramenti ministros. Disciplina ecclesiastica recentior hoc ministerium juribus parochialibus ad censuit. Item infirmis tantum hoc Sacramentum conceditur, & quidem, si gravis infirmitas sit, de qua dici cum Apostolo possit, per  
Sakra-

Sacramentum alleviari. Præcipuus vero hujus Sacramenti effectus est remissio peccatorum, eamque ob rem hoc Sacramentum inter Sacramenta expiantia belle recensetur, quod in caussa fuit veteribus, ut conferretur infirmis ante Eucharistiæ administrationem, quæ disciplina adhuc in aliquibus provinciis viger. Oleum, quod est Sacramenti materia, ab Episcopis primum benedici solet. Oleo benedicto, etsi ignoretur, quæ, quales, quotque partes a veteribus inungerentur, hodie ex vulgato rituali, si tempus suppetat, inunguntur oculi, aures, nares, pedes, manus, & renes. Singulis inunctionibus sua verba respondent, quæ sunt Sacramenti forma, quibus Sacerdos veniam peccatorum infirmo precatur. Ut infirmis hoc Sacramentum præsto esse possit, mandatum est Parochis universis, ut oleum benedictum ad eum finem custodiant, & singulis annis renovent ab Episcopo acceptum.

Forma hujus Sacramenti paullo distat in Ecclesia etiam Latina a formis ceterorum Sacramentorum, quod verbis precatoriis concipiat. Id factum est, ut consonet phrasi Jacobi Apostoli, qui monuit advocari Presbyteros, ut *orent* super infirmos.

*TIT.*

## TITULUS VI.

## DE SACRAMENTO ORDINIS.

## I.

**N**ON quibuscumque datum est præesse facris, & dispensare Divina, sed selectis ministris, quibus ea facultas ex Divino mandato ab Ecclesia fiat solenni inauguratione. Ob hanc rem institutum fuit a Christo Sacramentum Ordinis, a quo cetera Sacramenta ministerii causa penderent. Hoc Sacramentum varios habet gradus, ex quibus tota hierarchia coalescit. Hierarchiam constare ex Episcopis, Presbyteris, & ministris, Concilium Tridentinum definivit in sess. 13. can. 6.

## II.

Episcoporum, & Presbyterorum officia, & gradus Divino jure distingui facile demonstrari potest, quemadmodum & ab Episcopis æque ac Presbyteris distingui ministros inferiores. At quo jure, & qua ratione ministri iidem inferiores distinguantur inter se, potius ex Ecclesiæ definitionibus pendet. Jam suo tempore Apostoli designaverunt Diaconos, qui nomine ministrorum hierarchiam constituentium veniunt. Infra Diaconos Ecclesia inde collocavit Subdiaconos, Acolytos, Exorcistas, Lectores, Ostiarios, quandoque

doque etiam aliis adjectis gradibus, veluti Cantorum, & Psalmistarum. Hanc ob causam concludi potest, hos gradus inferiores pertinere ad institutionem Ecclesiæ, quamquam in hac re Ecclesia secuta sit generalem institutionem Dei de ministris certo ordine tribuendis.

Nihil amplius hoc in loco adjicio, ut designem singulorum graduum, & ministrorum officia, quando id jam superius executus sum lib. 1. tit. 8, *de clericis, prout ex Ordine distinguuntur.*

Antequam quis inter ministros solenni inauguratione recenseatur, initiari solet prima tonsura, quæ proinde dicitur dispositio quædam ad Ordines suscipiendos. Et quando tonsura initiatis nullum tribuitur singulare officium, vel ministerium, sed tantum aditus aperitur, ut in sortem Domini advocentur, liquet, tonsuratos in clero facile numerari posse, nullum tamen adhuc Ordinem, sive Ordinis gradum habere.

### III.

Ordinarius ordinationis minister est Episcopus, & quidem Divino jure, si de conferendo Episcopatus, vel Presbyteratus, vel Diaconatus Ordine agatur; jure tamen ecclesiastico, si agatur de ceteris inferioribus  
 Ordi-

Ordinibus, utpote ab Ecclesia institutis. Hinc non repugnat ab Ecclesia concedi privilegia non Episcopis, ut isti possint infra Diaconorum gradus clericos ordinare.

Perraro hæc privilegia concessa deprehenduntur ad ordinationem Subdiaconorum, ex eo forte, quod Subdiaconatus jamdiu inter sacros, & majores Ordines relatus est. Frequentius concessa privilegia sunt ad ordinationem inferiorum clericorum; gradus enim infra Subdiaconos tributi, minores dicuntur, & non adeo sacri.

#### IV.

Certissimum est, veteres manuum impositionem in ordinatione Episcoporum, Presbyterorum, & Diaconorum adhibuisse, atque in impositione manuum statas adhibuisse formulas verborum, quibus designaretur tradita potestas, quæ cuique Ordini congrueret, Hinc constabat de materia, & forma Sacramenti. Recentioribus sæculis constat, traditionem symbolorum, sive instrumentorum accessisse. An hæc symbolorum traditio sit collationi Ordinis essentialis Scholastici disputant. Hæc plane adhibenda necessario est, quia Ecclesia id præcepit. In ordinatione illorum, qui infra Diaconos constituuntur, manuum impositio non adhibetur. Sola in-

strumen-

strumentorum traditione , & certis verborum  
formulis perficitur ordinatio .

V.

Perennis fuit Ecclesiæ traditio , qua præ-  
ceptum est , neminem sine certo titulo ordi-  
nari debere , idest quin certæ Ecclesiæ ad-  
scribarur , & in certa Ecclesia exercendis offi-  
ciis suo gradui competentibus mancipetur .  
Quod & Concilium Tridentinum confirmavit  
in sess. 23. de ref. cap. 16.

Inde olim receptum erat , ut quicum-  
que ordinaretur in certa Ecclesia , ex ejusdem  
Ecclesiæ redditibus aleretur , seu juxta mo-  
dum loquendi a recentioribus usurpatum , be-  
neficium ecclesiasticum consequeretur , quod  
& statuit Tridentinum Concilium sess. 21. de  
ref. cap. 2. A temporibus Alexandri III. re-  
ceptum est , ut quis adhuc ordinari posset sine  
participatione reddituum ecclesiasticorum ,  
dummodo certa pensione , aut privato patri-  
monio sufficienti non destitueretur. Concilium  
Tridentinum in dicta sess. 21. cap. 2. non  
aliter has ordinationes ratas habuit , quam si  
Episcopus expedire judicaverit pro necessi-  
tate , vel commoditate Ecclesiarum ; quasi  
ordinatio titulo patrimonii , vel pensionis non-  
nisi extra ordinem indulgeatur .

*TIT.*



## TITULUS VII.

DE CONJUGIO, ET CONJUGII  
SACRAMENTO,

## I.

**M**AGNUM sane est argumentum Divinæ clementiæ, Christum Dominum voluisse ita infirmitati humanæ consulere, ut conjugium sanctificari Sacramenti accessione valeret. Natura peccato originis jamdiu labefactata, & multiplicibus iniquorum hominum exemplis passim corrupta, plus æquo sibi & in conjugis, & conjugiorum occasione indulgebat; imo & conjugium ipsum visum fuerat jamdiu a prima sui naturali institutione detortum. In hac ipsa re, ubi ruendi periculum gravius erat, præsidium quoddam salutis Christi virtute collocatum est, imo & Christus in conjugio voluit esse figuram suæ conjunctionis cum Ecclesia; quare Paullus Apostolus conjugium appellavit *Sacramentum magnum in Christo, & in Ecclesia.*

## II.

Ergo qui simplex erat contractus a natura institutus, jure gentium confirmatus, publicis etiam populorum legibus communitus, ordinatus ad familiarum decus, ad propagationem sobolis, ad honestam liberorum educationem,

*Instit. Pars II,*                      N                      cationem,

cationem, is cœpit inter fideles sanctificari accessione Sacramenti, si rite omnia fiant ex Christi institutione.

Hæc indicant, conjugium quidem inter christianos posse Sacramento sanctificari; non semper tamen; nec omne christianorum conjugium Sacramentum esse. Tum Sacramentum erit, cum conjugium juxta formam Sacramenti a Christo præstitutam celebretur. Si hæc forma omiſſa sit, conjugium intra fines naturalis, ac civilis contractus manebit, non erit Sacramentum.

### III.

Inciditur in scholasticas disputationes, cum quæritur, quisnam sit hujus Sacramenti minister, quænam materia, quænam forma. Equidem ritus Ecclesiæ postulat, ut cum conjugium contrahendum sit, contrahentes coram Parocho consensum suum exprimant, deinde Parochus conjugibus benedicat. Sed interea sunt qui putant, contractum a conjugibus initum esse materiam Sacramenti, benedictionem parochialem esse formam, & Parochum esse Sacramenti ministrum. Sunt e contrario: qui putant contrahentes ipsos ministrare æque ac recipere Sacramentum, quasi Sacramenti forma sit ipse expressus contrahentium consensus, corpora contrahentium  
sint

sint materia , benedictio autem parochialis mere cœremonialis habeatur . Multa multi in hanc rem comminiscuntur . Ecclesia nihil adhuc definivit : unusquisque suo ingenio indulget .

#### IV.

Certum est , matrimonium esse non posse , nisi unius cum una , item esse perpetuum , & nonnisi alterutrius conjugis morte dissolvi , proptereaue nec matrimonium esse posse ; ubi conjuges eo animo ad contrahendum accedant , quo non se perpetuo obstringant . Debet præterea conjugium juxta leges contrahi , ita ut irritum sit , quoties impingat in leges aut naturales , quæ formam conjugio dederunt , aut positivas , decreto irritante munitas ; illicitum saltem sit , quoties impingat in leges aut positivas , quæ decreto irritante destituantur , aut naturales , quæ sitæ sint extra conjugii formam .

Hinc Pragmatici recensuerunt duplicis generis impedimenta conjugiorum , alia dirimentia dixerunt , cum conjugium irritum est , alia tantum impediencia , cum illicite celebratur .

#### V.

Multa sunt conjugii bona , sive quæ ex natura derivant , sive quæ religionem foveant ,

sive quæ juvant publicam societatem. Hinc conjugium dirigitur multiplici legum genere, idest jure naturali, Divino, ecclesiastico, & civili. Hinc conjugium modo dicitur tantum intra jura naturæ consistens, modo etiam ratum, cum Divina insuper, & ecclesiastica jura servata sint; modo etiam legitimum, cum legibus civitatis insuper paritum est. Ut Sacramenti vires habeat, sufficit satis esse factum legibus naturæ, & ea accessisse, quibus Sacramenti substantia constat; dummodo contractus non sit aut Divinis, aut humanis legibus positivis omnino damnatus. Ubi enim contractus irritus legibus positivis aut Divinis, aut humanis decernitur, quid superest, quod ad dignitatem Sacramenti eleveetur?

## VI.

Ut paucis leges irritantes comprehendam. In primis irrita sunt conjugia illorum, qui consentire non possunt, aut revera non consenserunt. Consentire nequeunt amentes, furiosi, ebrii, dormientes; item consensus infantium, vel puerorum pro non consensu accipitur. Leges ætatem definiverunt quatuordecim annorum in masculis, duodecim in foeminis. Revera non consentiunt, qui metu adacti sunt, dummodo metus sit gravis, ab homine incussus, nec publica potestate, &  
 inju-

injuria. Quæ raptum passa est, non consentit, nisi in loco tuto collocata ratum habeat, quod gessit, cum raperetur, quod invaluit post Tridentini Concilii constitutiones. Denique non consentiunt, qui errant, dummodo error sit in persona, vel talis, qui in eam incidat qualitatem, a qua communiter homines avertere animum solent, cujusmodi est conditio servilis; etenim error in ceteris qualitatibus conjugio non obest:

## V I I.

Secundo irrita sunt conjugia illorum, qui coire non possunt. Jure Decretalium adhuc hæc conjugia consistebant, si contrahentes vitium non ignoraverint, & animum habuerint se habendi veluti fratrem, & sororem. A temporibus Sixti V. penitus irritata hujus generis conjugia fuerunt, propterea quod graves inde abusus emergerent. Nec steriliū foeminarum, nec senum conjugia irritantur, utut vix sperari soboles ex his conjugiiis possit. Hermaphroditæ, si qui sint, ad conjugium admittuntur ita, ut quī sexus in ipsis prævaleat, attendatur, ubi neuter sexus prævalet, alteruter eligatur, & electio semel facta perpetua sit.

## VIII.

Tertio irrita sunt conjugia illorum, qui certo jam necessitudinis vinculo tenentur. Hujus generis est cognatio, affinitas, & publica honestas. Cognatio triplex recensetur, naturalis, civilis, & spiritualis. Cognatio naturalis est consanguinitas, atque intercedit inter personas sanguine junctas, idest ab eodem stipite descendentes. Consanguinitatis duplex est linea, recta, & collateralis, quæ etiam obliqua dicitur, seu transversalis. In linea recta sunt personæ, quæ se se mutuo respiciunt nomine parentum, & liberorum. Inter hos quicumque, & quocumque numerentur gradus, perpetuum est conjugii interdictum. In linea collateralis sunt personæ, quæ eundem stipitem habent, ab eodem quidem parente genitæ, sed quæ se se non invicem respiciunt ceu parentes, & liberos, veluti fratres, sorores, fratrum, sororumve filii. Inter hos, quidquid olim vigeret, interdictum conjugii ad quartum usque gradum protrahitur, & in quinto gradu cessat. Quoties ex duobus unus in quarto est, alter in quinto gradu, conjugium permittitur. Ut graduum computatio fiat, quærendus in primis est communis parens illorum, de quibus quæritur. Ex communi parente ducenda est  
 linea

linea duplex descendantium . Quoto gradu quis distat a communi parente , eodem gradu distat a consanguineo . In numeratione graduum ratione communis parentis numerus attenditur personarum & quæ genuerunt , & quæ genitæ sunt ; inde tot erunt gradus , quot personæ , una demia . Sic frater , & soror primum gradum constituunt , duorum fratrum filii secundum , ac successive eodem ordine servato .

### IX.

Cognatio civilis , quæ etiam legalis dicitur , ex adoptione proficiscitur . Quinam hujus cognationis causâ prohibeantur , ne matrimonium contrahant , satis docent leges Romanæ civiles . Cognatio spiritualis ex Sacramento Baptismi proficiscitur . De hac superius sermonem habui titulo 3. hujus libri numero 5.

### X.

Affinitas intercedit inter virum , & consanguineos uxoris , item inter uxorem , & consanguineos viri . Affinitatis ratio ex eo petita est , quod vir , & uxor una caro facti una eademque persona censentur . Ergo affinitas nondum intercedit , quousque matrimonium non est consummatum . Inde receptum fuit , etiam affinitatem oriri , ubi injusta fuit ,

& illicita corporum conjunctio. Si affinitas ex conjugio oriatur, ad totidem gradus extenditur, ad quos extenditur consanguinitas: si oriatur ex illicita conjunctione, intra secundum tantum gradum a Tridentinis Patribus coercita est. In computatione graduum affinitatis servatur hæc regula: quoto gradu cognationis vir distat a suis consanguineis, eodem gradu affinitatis uxor distat a consanguineis viri: e converso quoto gradu cognationis uxor distat a consanguineis suis, eodem gradu affinitatis vir distat a consanguineis uxoris.

## XI.

Publica honestas est veluti quoddam adfinitatis simulacrum. Oritur autem vel ex matrimonio tantum rato, necdum consummato, vel ex sponsalibus. Eam ob rem intercedit inter sponsum, aut maritum, & consanguineos sponsæ, aut uxoris, item inter sponsam, aut uxorem, & consanguineos sponsi, vel mariti. Si publica honestas ex matrimonio rato proficiscatur, ad eosdem gradus, ad quos affinitas, extenditur. Si proficiscatur ex sponsalibus, Tridentinorum Patrum decreto, ad primum gradum coercita est. Gradus numerantur quemadmodum in affinitate. Ubi matrimonium irritum sit, adhuc publi-



publica honestas intercedit, nisi irritum sit ex defectu consensus. Ubi sponsalia irrita sint, quacumque de causa irrita dicantur, ex decreto Patrum Tridentinorum publica honestas cessat. Certe, ut ex sponsalibus publica honestas oriatur, debent sponsalia esse certa, non indeterminata, neque in certum conditionis eventum collata.

## XII.

Quarto irrita sunt conjugia illorum, qui novum conjugium contrahunt, dum alterius conjugii vinculo detinentur. Id adeo verum est, ut nec conjugium convalescat, etiamsi deinde primum conjugium legitime dissolvatur. Imo & inter eos, qui adhuc conjugio juncti aut alterum matrimonium executi fuerint, aut data fide de matrimonio contrahendo quidquam moliti fuerint in conjugis necem, aut etiam, data fide de matrimonio contrahendo adulterium admiserint, matrimonium ne contrahatur perpetuo interdictum est.

## XIII.

Quinto irritum est matrimonium, quod contrahatur a christiano cum ea, quæ Christi religionem averfatur, & e converso; quamquam si catholicus cum hæretica, & e converso si catholica cum hæretico contrahat, conjugium, utut fere semper illicitum, sustineatur.

## XIV.

## XIV.

Episcoporum, Presbyterorum, Diaconorum, & Subdiaconorum matrimonia irrita penitus declarata sunt publicis legibus. Clerici inferiores, si uxores ducant, ab officiis clericalibus remouentur, nisi quo casu clericorum conjugatorum officiis arbitrio Episcopi Ecclesia indigeat. Monachorum quoque, & Sanctimonialium conjugia, post elicitam professionem contracta, jure penitus damnantur, atque irritantur. Non ita irritantur conjugia aliorum, qui continentiam Deo voverunt: horum conjugia tantum illicita sunt; quia nusquam deprehenduntur legum auctoritate irritata.

## XV.

Denique Concilio Tridentino sess. 24. de ref. matrim. cap. 1. irritata sunt conjugia illorum, qui contraxerint sine præsentia Parochi, aut parochialis Vicarii, aut Sacerdotis ab Episcopo delegati, item qui contraxerint sine præsentia duorum saltem testium. Nominine Parochi intelligitur Parochus aut mariti, aut uxoris, quod & ipsum & de Parcho, & de Episcopo alium Sacerdotem delegante intelligitur.

Consulto omisi vetera Romani juris civilis interdicta, de matrimonio damnato  
inter

inter rectorem provinciæ, & puellam provincialem, item inter tutorem, curatoremve, eorumve filios, & puellam, cujus tutela, vel cura gesta est, nondum redditis rationibus. Utrum enim hæc etiamnum vigeant, jurisperitorum disputationibus est relinquendum.

Certum est, olim jure Romano civili veritas fuisse nuptias viduis mulieribus ante annum luctus ob certam honestatem: si tamen contractæ fuissent, adhuc legitimæ habebantur.

## XVI.

Extra causas modo memoratas, si conjugium contra leges celebretur, illicitum quidem est, non tamen irritum. Vetant leges, ne filii familias nuptias contrahant sine paterno consensu; vetant, ne contrahant, qui voto continentiae perpetuæ obstringuntur; qui datam sponsalium fidem violant eo ipso, quo alteri junguntur; qui ignorant doctrinæ christianæ dogmata; qui controversiam in judicio aut moverunt, aut patiuntur de vi conjugii semel contracti, controversiam sane necdum judicis sententia diremtam: jubent leges, ut certa nuptiarum tempora observentur, videlicet non tempore adventus, non tempore quadragesimæ nuptiæ celebrentur, item jubent, ut non primum contrahatur matrimonium

nium, quam denunciationes publicæ præcefferint. Interea tamen, si matrimonium contrahatur, firmum erit.

### XVII.

Qui nuptias contracturi sunt, solent ante conjugii celebrationem contrahere sponsalia; idest mutuo consensu de futuris nuptiis pascisci. Regula est, eos omnes rite contrahere sponsalia posse, qui ad contrahendum matrimonium admitterentur. Non e converso ii omnes; qui a contrahendo matrimonio arcentur, impediuntur, ne interea sponsalia contrahant. Impediuntur quidem ne sponsalia contrahant, si impedimentum conjugii perpetuum sit, non vero, si sit tempore circumscriptum:

### XVIII.

Instar ceterorum contractuum sponsalia contrahi possunt vel pure, vel sub conditione, vel in diem certum. Si pure contrahantur, adhuc inest legis potestate certus dies, qui concedendus petenti est, in quem matrimonii celebratio differatur; & quidem ex interpretatione voluntatis contrahentium, qui non statim matrimonium contrahere voluerunt, statim ac cum matrimonium celebrare valerent, potius de contrahendis sponsalibus deliberarunt. Conditio debet esse possibilis, &  
ho-

honestā; si sit impossibilis jure, vel factō, sponsalia exemplo ceterorum contractuum irrita sunt. Si dies certus adjiciatur, certum est, contrahentes non aliud egisse, quam aut tempus a lege sponsis præstitutum coercere, aut prorogare ulterius voluisse:

In hoc certe sponsalia a conjugis differunt. Nam conjugia cum de præsentī sint natura sua, nullam temporis adjectionem patiuntur; imo nec patiuntur conditionem, quæ si impossibilis factō adjecta fuerit, pro non adjecta habetur: si impossibilis jure, etiam pro non adjecta habetur, quoties nihil contineat contra conjugii naturam; at si naturæ conjugii adversetur, matrimonium prorsus irritum reddit. Hæc est Gregorii IX. philosophia in cap. ult. de condit. appositis.

### XIX.

Effectus sponsalium rite contractorum est, ut utrinque inter sponsoſ obligatio nascatur aliquando contrahendi matrimonii. Efficax quidem obligatio est, utpote lege confirmata, proindeque actionem parit; verum si alterutra pars refragetur, & pervicax sit, obligatio pene sine exitu est, non sane vi sua, sed quod nullum inter homines sit remedium, quo ad exitum perducatur. Contumax quidem officio judicis terreri poterit: etiam comminatione

natione excommunicationis . Sed quid , si con-  
 rumax adhuc refragetur ? Adigi plane non  
 poterit ad matrimonium contrahendum , quod  
 sine consensu esse non potest . Id , quod in-  
 terest , in hanc obligationem non venit , cum  
 æstimari nequeant certi conjugii bona . Nihil  
 igitur agendum judici superest . Eam ob rem  
 contrahentes stipulari consueverunt certas  
 pœnas a fidei violatore luendas . At enim  
 pœnalis hæc stipulatio fuit abs jure impro-  
 banda , cum locum habere nequeat , quibus  
 in caussis nec id , quod interest , locum habet .  
 Potius admissa est arrharum obligatio . Ete-  
 nim arrhæ nihil habent commune cum eo ,  
 quod interest . Si fidejussores , aut pignora  
 dentur , utilis erit intercessio eatenus , qua-  
 renus in caussa arrharum accedant , nunquam  
 si accedant in caussa aut principalis obliga-  
 tionis , aut forte initæ stipulationis pœnalis .  
 Sunt alii sponsalium rite contractorum effe-  
 ctus , in iis caussis scilicet , in quibus sponsa  
 quodammodo incipit personam uxoris indue-  
 re , & privilegiis uxoris fruitur , de qua re  
 multa tradunt civilis juris Interpretes .

## XX.

Diffolvuntur sponsalia non solum morte  
 alterutrius ex sponsis , sed etiam tali alteru-  
 trius immutatione status , a qua vel matri-  
 monium

monium incipere nequit, vel nunquam alter sponsus de matrimonio cogitavisset. Hujusmodi est sponsi transitio ad clericales Ordines, vel monasticum statum, corruptio morum in sponso, vel sponsa, item infortunium grave vel in corpore, vel in patrimonio, aut quid simile. Præterea mutuo dissensu dissolvi sponsalia receptum est.

### XXI.

Antequam nuptiæ contrahantur, statutum fuit in Lateranensi Concilio, ut fiant publicæ denunciationes, cap. 3. de clandest. desp., quod & confirmatum fuit in Tridentino Concilio. Porro Patres Tridentini decreverunt, ut tribus continuis diebus festivis in Ecclesia inter missarum solennia a Parochis publicarentur nomina illorum, qui conjugium contracturi sunt, ut siquæ norunt certa posse esse ejusdem conjugii impedimenta, eadem Ecclesiæ pandant. Data tamen fuit Episcopis facultas a denunciationibus dispensandi, ubi gravis causa suppetat.

### XXII.

Cum ad conjugii celebrationem devenitur, Parochus, aut alius Sacerdos de Parochi, vel Ordinarii licentia præsens, una cum duobus testibus debet contrahentes interrogare de eorum consensu, cujus cum certior factus fuerit,

fuerit, conjugio benedicit juxta formam in Rituali præstitutam. Id totum ad certam rationem redactum est in Concilio Tridentino sess. 24. de ref. matrim. cap. 1., ut tandem, quoad fieri posset, abolerentur clandestina conjugia, quorum olim erat gravis abusus.

### XXIII.

Contracto conjugio nanciscitur uxor jura familiæ maritalis, quemadmodum & vir certam in uxorem nanciscitur potestatem; uterque autem vicissim obnoxii sunt liberorum causa, mutuamque operam præstare debent in liberalem, & honestam filiorum educationem, quæ conditioni cujusque respondeat.

### XXIV.

Tria in conjugio considerantur, vinculum, cohabitatio, & thorus. Vinculum omnino indissolubile est. Divina lege permittitur, ut si conjuges infideles sint, alteruter conversus ad fidem, & baptizatus, liber evadat, si infidelis nolit habitare sine injuria Creatoris. Sacris quoque canonibus constitutum est, religiosa professione conjugium ratum, nondum tamen consummatum dissolvi. Certe mortē conjugis, qui superstes est, ad secundas nuptias libere convolat. Cohabitatio conjugum non adeo indissolubilis est. Dissolvi enim potest ob adulterium conjugis postulante



lante altero, qui sit innoxius, similiter ob hæresim, aliudve scelus, quod alterum conjugem in criminis consortium trahere facile possit; item ob mariti sævitiam, ob insidias ab alterutro conjugē paratas, ceterasque hujus generis causas. Hæc tamen dissolutio fieri debet publicâ auctoritate. Thorus etiam ex mutuo consensu deferri potest. Si unus repugnet, debent esse alteri causæ graves a lege probatæ, si velit a thoro discedere, veluti morbus sonicus, & similes.

Quandoque conjugium improprie dissolvi dicitur quoad vinculum, veluti cum proponitur, conjugium ab initio irritum fuisse. Hoc casu si dissolvatur, dissolutio potius facti, quam juris est. Plane privato judicio non relinquuntur conjuges in hac parte, sed opus est publicâ auctoritate. Imo & in hoc causarum genere, ut omnis locus præcludatur collusionibus, solet in Curiis Episcopalibus designari vir prudens, qui intercedat, & exploret, an quæ a conjugibus contra conjugium opponuntur, justa sint; si talia non noverit, collusionem detegat, & matrimonium non esse dissolvendum proponat. Hic *defensor matrimoniorum* appellatur.

## TITULUS VIII.

## DE REBUS SACRIS.

## I.

UT sanctum, & ineffabile commercium inter Deum, & homines magis magisque foveret Ecclesia, res quasdam sensibiles obtulit Deo, in quibus suum cultum testaretur, ex quibus etiam fiduciam haberet fore, ut inde Deum ipsum sibi impensius conciliaret. In hac oblatione certos ritus instituit, in quibus Sacramenta ipsa a Christo instituta quodammodo imitaretur. Ergo & symbolis usa est, & certis precibus, quibus symbola ipsa consecrarentur, & res evaderent sacræ. Certos jam ritus adjecerat ministerio Sacramentorum, ut nitide æque ac decore dispensarentur, ac reciperentur. In ipso Sacramentorum ministerio designandus erat certus locus ad Divina mysteria accommodatus, paranda erant vasa, quæ Divina ipsa symbola continerent, instruenda suppellectilia ad usum rerum Divinarum. Ut excitaretur frequentius memoria susceptorum Sacramentorum, & recoleretur sæpe a fidelibus vinculum illud arcanum, quo cum Christo capite junguntur, multiplices videbantur adhibendæ figuræ. Hinc rerum sacrarum, ac sacramentalium institutio,

II.

## II.

Quando vero Sacramentum Baptismatis, quo primum fideles initiantur, in aqua consistit, & in Sacramento Confirmationis fideles inunguntur, rerum dedicatio, qua sacræ fierent, visa fuit auspicanda ex aquæ, vel olei super res ipsas infusione. Hinc factum, ut aqua, & oleum statò ritu, statisque precibus primum sanctificarentur, ex quibus sanctificatis sanctificatio ipsa in ceteras res quodammodo dimanaret. Hinc profluxit & aquæ benedictæ, & sacri chrismatis custodia.

Olei inunctio etiam in usu fuit apud Judæos certis in casibus ex Divina institutione. Ex Divina quoque institutione evangelica in usu fuit in Sacramento unctionis infirmorum. His exemplis commoveri magis magisque Ecclesia potuit, ut oleum dedicaret.

## III.

Itaque in primis dedicatio rerum sacrarum aut per aquam benedictam, aut per chrisma, idest per oleum sanctificatum facta est. Quandoque ex rerum qualitate decretum est, ut sola aqua benedicta sine chrismate dedicarentur; quandoque solum chrisma ad sanctificandum adhiberetur; quandoque etiam & aquæ infusio facta est, & chrismatis inunctio, prout hæc symbola pressius significare

O 2

valerent,

valerent, quid spiritualiter ageretur. Certum est, sanctum chrisma veluti nobilius aquæ elemento habitum fuisse, velut illud, quod convenientius Christum ipsum significaret, Christum inquam, qui unctus Dei interpretatur; unde fideles aqua baptizati, deinde per sanctum chrisma in confirmatione perfici dicuntur, ac roborari.

#### IV.

Altaria ipsa in quibus & Christus exhibetur, & Corpus Christi collocatur, unde omnis sanctificatio profuit, & aquæ adpersione, & chrismate dedicata sunt. Sacræ ædes, quæ sunt figura congregationis fidelium, aqua sanctificari debuerunt, ut significaretur Baptisma esse fidelibus necessarium: sæpe ac sæpius eadem sacræ ædes sunt chrismate dedicatæ, ut intelligant fideles posse se magis magisque roborari per sacrum chrisma, quo in Sacramento Confirmationis inunguntur. Consuevit in ingressu sacrarum ædium aqua benedicta adservari, ut intelligerent fideles ingressuri, se per aquam baptismalem in Ecclesiam fuisse admissos, eademque aqua se tingendo memoriam Baptismatis suscepti recolerent. Consueverunt in Ecclesiis parochialibus singulis dominicis diebus fieri aquæ aspersiones super populum, ut iterum renovaretur memoria suscepti

suscepti in Ecclesiâ parochiali Baptismatis. Postquam prope Ecclesias constructa sunt cœmeteria, & hæc consueverunt aqua benedicta lustrari; sive quod portio Ecclesiæ haberentur, sive quod fidelium baptizatorum corpora in iis recondiderentur:

## V.

Vasa sacra ad Eucharistiæ custodiam necessaria chrismate inungi receptum est, ob Sacramenti, quod continent, dignitatem; non tamen linthea, quibus Christi Corpus obvolvitur; ob rei, quæ munda esse debeat, qualitatem. In his sola aquæ adpersio semper adhibita est. Cetera quoque suppellectilia aquæ aspersione dedicari consueverunt. Suppellectilibus etiam accenseri consueverunt cruces, imagines Christi, & Sanctorum, & similia.

Quædam superfuerunt suppellectilia, quæ non adeo prope ad res Divinas accedunt, & tanquam Ecclesiarum, seu ædium sacrarum ornamenta sunt; in quibus nec aquæ adpersio, nec sacræ preces adhibentur. Nilominus sacrorum nomine veniunt, ratione usus sacri, ad quem designantur.

Idipsum dicas de signis, quæ fidelium largitate altaribus, aut muris sacrarum ædium appenduntur, perpetuo ibidem constituta,

Donaria hæc sunt, quibus fideles singularem cultum suum erga Deum testantur.

# VI.

Pietatis cujusdam gratia extra usum sacrorum benedici etiam consuevit aquæ adspersione aut panis, aut novis frugibus, aut domui, navive novæ, aut rebus quibuscumque ad humanam vitam necessariis. Non ideo tamen res istæ sacræ evadunt. Tantum benedictio adhibetur, ut in illis symbolo quodam fideles intelligant, se per baptismalem aquam peccato originis fuisse expurgatos, uti per aquæ adspersionem Sacerdotes a Deo precantur, ut panis, fruges, domus, naves, omniaque ad usum vitæ necessaria ita bona hominibus sint, quemadmodum bona fuissent, si homo nunquam a Divina obedientia recessisset. Plane inter res sacras ego commemorarem eulogia illa, ex. gr., panis, quæ benedicuntur in Ecclesia, ut publice in eadem Ecclesia distribuuntur, in argumentum christianæ communionis.

# VII.

Si rerum consecratio per oleum, seu chrisma fiat, ex juris ecclesiastici disciplina Episcopali Ordini reservatur. Nemo ergo ad has consecrationes accedere potest, nisi Episcopali Ordine insignitus, aut nisi privilegium  
fin-

singulare obtinuerit . Imo & ipsa olei consecratio ob eandem causam Episcopis reservatur . Si consecratio rerum fiat aquæ benedictæ adspersione , ea potest Ordini Presbyterali competere ex Episcoporum consensu .

Etiā in hac parte servata est analogia quædam cum ministerio Sacramentorum . Quippe Confirmationis Sacramentum , quod chrismate administratur , Episcopis reservatur , concessio Presbyteris ministerio Baptismatis , quod in aquæ infusione consistit ,

### VIII.

Alia exemplo Sacramentorum instituta sunt ab Ecclesia sacramentalia . Iterum memoro panem benedictum , qui quandoque publice tribui consuevit exemplo sacre Eucharistiæ . Memoro solennem manuum impositionem ab Episcopis olim factam super publicos pœnitentes , & eam manuum impositionem cum precibus instar absolutionis conceptis super eos , qui generalem criminum confessionem fecerint , exemplo Sacramenti Pœnitentiæ ; denique solennem nuptiarum benedictionem , quæ fit a Parochis exemplo Sacramenti conjugii , ut alia his similia omittam .

Reconciliatio publicorum pœnitentium Episcopis , & Prælati jurisdictionem in foro externo habentibus reservatur , quod eisdem

reservetur publicæ pœnitentiæ indictio . Generalis absolutio fit a Sacerdotibus , aut statim temporibus juxta generalem ritum , aut ex Episcoporum mandatis . Sollemnis nuptiarum benedictio parochialibus juribus accensetur , eadem ratione , qua Parochorum est conjugii interesse .

## *TITULUS IX.*

### DE DIVINARUM , AC SACRARUM RERUM ADMINICULIS .

#### I.

**E**T Divina , & sacra quæcunque ut ut spiritualia sint , sine corporalibus tamen adminiculis non subsistunt . Id demonstrant in Divinis rebus symbola ipsa Sacramentorum , ceu aqua in Baptismate , panis , & vinum in Eucharistia , & contractus conjugii in conjugii Sacramento , ut cetera omit-  
tam . De his ætüm jam superius est .

#### II.

In rebus sacris , licet consecratio , quæ spiritualis est , præcipue attendatur , res tamen ipsæ corporeæ per semetipsas patefiunt , in constructis altaris lapidibus , in parietibus , & tectoriis sacrarum ædium , in supellectilibus . De his cautum est ad honorem semel  
inditæ



inditæ dedicationis, ut cum symbola hæc, resque corporeæ in eum casum inciderint, quo usui sacrorum amplius esse non possunt, aut in sacrarium effundantur, aut comburantur, pro cujusque rei qualitate; certæ etiam res, uti area ædium sacrarum erutarum, cimenta ædificiorum, in usus profanos converti possint, nunquam tamen sordidos.

### III.

Si pollui sacras ædes contingat, veluti si homicidium in sacris ædibus admissum fuerit, receptum est, ut ab Episcopo, vel a Sacerdote ex auctoritate Episcopi reconcilientur, exemplo reconciliationis peccatorum poenitentium, quemadmodum in sacramentalibus receptum est, juxta ea, quæ præcedente titulo notanda fuerunt.

### IV.

Inter adminicula rerum Divinarum, & sacrarum, magna semper haberi ratio debuit obventionum, & reddituum ecclesiasticorum. Ex his sacrarum ædium ædificationi, & restorationi consulitur, struuntur, & ornantur altaria, suppellectilia parantur, & ea universa, quæ Divinis, & sacris inserviunt. Ex his aluntur administri Divinorum, & sacrorum. Cum ita satis Divinis, sacrisque rebus consultum fuerit, quod superest, pietati

tati, & religioni tribuitur, cum pietas, & religio Divinis, sacrisque institutis succedat. Non mediocris fuit in hac parte sollicitudo Ecclesiæ, quæ triplex esse debuit, eo primum directâ, ut pii fideles concitarentur ad ea tribuenda, quæ necessaria forent; deinde eo, ut clerici earum rerum administri fideliter redditus dispensarent, nihilque sibi præter necessaria alimenta vindicarent, nihil sanguini, privatisque affectionibus indulgerent, solum Deum præ oculis haberent; denique eo, ut quæ bona immobilia in perpetuum assignata Ecclesiis fuissent ad usus annuos, ea servarentur, nunquam alienarentur, nisi certis adhibitis solennitatibus constaret, justam esse alienationis causam.

## V.

Primis Ecclesiæ sæculis, sive Apostolica ætate, sive etiam posteriore usque ad sæculum quartum ecclesiastici redditus in solis piorum fidelium oblationibus consistebant. Siquid bonorum immobilium offerebatur, facile distrahebatur, eo præsertim tempore, quo Ethnici Ecclesiam vexabant, & fideles omnes, præsertim clericos insequabantur. A sæculo Ecclesiæ quarto cœperunt Ecclesiæ bona immobilia possidere; nihilominus tamen oblationibus locus fiebat. Frigescente  
fidelium

fideliū charitate, statui cœpit, ut decimæ ex fructibus prædiorum præstarentur, exemplo veterum Judæorum. Alicubi præter reales, seu prædiales decimas, solutæ etiam sunt personales, idest ex pecunia, quam quis industria sua, & artificio compararet. Paulatim aucti sunt redditus Ecclesiarum; eamque ob rem multis in locis populus ab obligatione luendarum decimarum absolutus est. Hodie in hac parte receptæ consuetudini indulgetur. Si forte contingat, Ecclesias necessariis subsidiis destitui, fidelis populus tenetur, quidquid necessarium est ad usum sacerdotum, & Sacerdotum alimenta conferre.

#### V I.

Hujus ecclesiastici peculii administratio olim tota conferebatur in Episcoporum sollicitudinem. Ex Episcoporum arbitrio prudenti tributio pendebat. Episcoporum curam Diaconi adjuvabant, mandata Episcopi exequentes. Ut planior esset executio, instituta sunt officia Archidiaconorum, qui vice Episcopi in hac re Diaconos dirigerent. Ad avertendas clericorum lites, & jurgia, atque ad consulendum æquabiliter clericis universis in alimentorum tributione sæpe cautum est, ut clerici ad communem vitam una cum Episcopo ducendam advocarentur. Sæpe communis

munis vita inita est, sæpe dissoluta; donec tandem Ecclesiæ patrimonium in viriles portiones divisum est, singulis clericis singulæ portiones adsignatæ. Hinc constituta beneficia, præbendæ, præstimoniam, & alia hujusce generis.

## VII.

Ceterum in hac virili tributione inter clericos facta, moniti perpetuo clerici fuerunt, se non in re sua versari; idest bona immobilia privata auctoritate, & sine causa alienare non posse; fructus, & obventiones omnes conferre debere non solum in suimetipsorum alimenta, sed etiam in cultum sacrorum, in refectionem sacrarum ædium, in subsidium egenorum, piarumque causarum. Item in vestigium antiquæ episcopalis administrationis ecclesiastici peculii universi; quædam in peculio clericorum inferiorum reservata sunt Episcopis jura, quale est jus procurationis, quod exercetur ab Episcopis, dum Ecclesias visitant a clericis visitatis alendi; jus cathedratici, seu synodatici, quod luitur singulis annis a clericis tempore synodi in honorem cathedræ episcopalis; jus subsidii charitativi Episcopo, cum indigeat, concedendi.

Jus procurationis, & cathedratici, præsertim quod ad quantitatem attinet, plurimum

rimum pendet ex receptis diœceseon consuetudinibus. Jus subsidii charitativi pendet quoque ex consuetudinibus, si de quantitate quærat. Hodie autem cautum est, nonnisi semel a quocumque Episcopo peti, atque exigi posse.

### VIII.

Dixi, ex hac tributione factum est, ut inde emergerent ecclesiastica beneficia, qualia hodie intuemur. Hæc beneficiorum disciplina postulavit magnam sollicitudinem Ecclesiæ in certis edendis regulis, ad quas administrationem suam beneficiarii exigerent; postulavit insuper non mediocria studia interpretum, ac pragmaticorum, ut disputationes identidem emergentes enuclearent, atque dirimerent. Opportunum propterea duco, singulari titulo nonnulla subicere, quæ saltem prima rei beneficiariæ principia, & summa argumenta exhibeant.



## TITULUS X.

## DE BENEFICIIS ECCLESIASTICIS .

## I.

**B**ENEFICIUM hodie aptissime definiri potest militia quædam ecclesiastica, cujus onere suscepto quis ecclesiasticis officiis adstringatur, cujus jure quæsito ecclesiastica stipendia mereat .

Militiam in primis dico, quia jus habet cum onere conjunctum . Onus consistit in implendo ecclesiastico munere pro Ordinis qualitate : jus consistit in alimentis ex rebus beneficii hauriendis, item in administratione, & dispensatione .

## II.

Qualitates beneficiorum hæ sunt : 1. ut beneficia sint perpetua : 2. ut sint individua ; 3. ut sint singularia . Perpetua sunt duplici ex causa : primum quod beneficium semel erectum perpetuo consistat ; deinde quod clericus beneficium adeptus nec beneficio cedere, nec a beneficio removeri sine causa legitima possit . Individua sunt, quia duo non admittuntur ad eundem beneficii titulum : semel ac enim in partitionem venerunt & officia, & bona Ecclesiarum, nova partitio supervacua est, nisi publica causa postulet,

ut

ut ex uno beneficio plura fiant. Singularia sunt, quia singuli Clerici singulis beneficiis debent esse contenti, nisi adpareat, redditus unius beneficii non esse alendo uni clerico pares.

### III.

Sunt beneficia majora, sunt etiam minora. Illa episcopalia dicuntur, aut ad episcopalia prope accedentia: ista sunt, quæ inferiore loco collocantur. Sunt etiam, uti vocant, secularia, quæ clericis non in commune viventibus conferuntur, sunt regularia, quæ conceduntur aut clericis in communi viventibus, aut etiam monachis, præsertim postquam monachi sacris Ordinibus initiari cœperunt, & in cleri adjutorium in urbes, & oppida admitti. Quod monachi, & regulares voto obedientiæ erga Prælatum adstringantur, perpetua non sunt beneficia monachis Prælati sui auctoritate concessa, sed possunt ab eisdem Prælatibus libere avocari. Sunt præterea beneficia, quæ conferuntur in titulum, idest ita, ut clericus eorum causa ordinetur, & officiis ecclesiasticis addicatur: sunt quæ dantur in commendam, quando nimirum jura, & bona beneficii alicujus custodiæ commendantur. Commendationi huic occasionem dederunt ruinæ sacrarum ædium,  
aut

aut monasteriorum . Finis commendationis est, ut quæ diruta sunt, reparentur, & interea oneribus beneficii fiat satis . Si aut frustra restauratio speratur, aut restaurationem legitimæ causæ impediunt, commendæ perpetuæ sunt, & propius ad naturam beneficiorum accedunt . Certe interest, Ecclesias omnes, & beneficia, cum vacant, aliqujus curæ commendari ad tempus, quousque scilicet vacant .

## IV.

Nullum ecclesiasticum beneficium aut esse, aut dici potest, nisi erigatur aut expressa, aut saltem tacita Episcopi diocesani auctoritate . Neque enim alia ratione aut sacra officia in Ecclesia tribui, aut partiri ecclesiastici redditus possunt . In erectione considerandum semper est, an utile sit sacrum officium, quod ordinatur in beneficio, & an redditus beneficii sint ferendis oneribus pares . Quoties de dividendis, aut uniendis beneficiis agatur, res etiam est, quæ spectat Episcopi diocesani auctoritatem . In unione, vel divisione & utilitas Ecclesiæ semper spectanda est, semperque cavendum, ut redditus beneficii sint ferendis oneribus pares .



## V.

Collatio beneficii olim cohærebat ordinationi sacrorum administratorum; nemo enim ordinari poterat, nisi certis Ecclesiæ officiis adstringeretur, & de Ecclesiæ redditibus aleretur. Ergo eodem jure ad Episcopos pertinet collatio beneficiorum, quo pertinet ordinatio clericorum. Hinc collatio beneficiorum olim propria videbatur functio Ordinis Episcopalis, adeo ut nec Capitulis sede vacante, nec Prælati inferioribus quacumque præditis jurisdictione competeret. Separata collatione Ordinis a collatione beneficii, collatio beneficii cœpit jurisdictionis potestati adcenferi, totque adparere cœperunt collatores beneficiorum, quot singulari titulo jurisdictionis Episcopalis potestatem nancisci potuerunt. Pro singulari titulo fuerunt, modo tabulæ foundationum, modo præscriptio, modo consuetudo, modo privilegium. Capitula cathedralium sede vacante cœperunt inde ad eam facultatem anhelare. Sed Episcopos obstantes invenerunt. Jure cautum est, ut Capitula conferrent ea beneficia, quæ vel patronata essent, vel singulari titulo ad collationem Capituli etiam vivo Episcopo, & de Episcopi consilio pertinerent, vel pertinerent ad simultaneam Episcopi, & Capituli collationem.

*Instit. Pars II.* P nem.

nem. Multa in hac re immutaverunt singularia cathedralium statuta ab Episcopis confirmata.

Separationem collationis Ordinis a collatione beneficii induxit ordinatio titulo patrimonii facta, idest sine beneficio, quod primum a temporibus Alexandri III. obtinuit. Caveri tamen debuit, ut patrimonium sufficiens esse debeat ad clericum sustentandum; item ut ordinatio titulo patrimonii habeatur tanquam extra ordinem, idest tum demum fiat, cum utilitas Ecclesiæ postulaverit, quemadmodum Tridentini Patres decreverunt.

#### VI.

Ne Ecclesiæ, vel beneficia diutius vacent, certa in jure designata sunt tempora ordinariis collatoribus, quicumque ii sint. Nimirum semestri tempus præstitutum, non quidem continuum, sed utile, idest numerandum a die scientiæ vacationis, & intra quod collator minime fuerit a collatione impeditus. Eo elapso tempore, ad proximum superiorem ea collatio pro ea vice devolvitur.

#### VII.

Jamdü consueverunt Pontifices Maximi beneficiorum quorundam collationem sibi reservare. Prima harum reservationum origo  
ex

ex eo profecta est, quod quidam clerici pauperes essent, sine beneficio ab Episcopis ordinati, confugerent ad Romanam Sedem, mandataque Romanæ Sedis impetrarent ad Episcopos directa, quibus Episcopi monebantur primum, deinde jubebantur beneficium conferre. Hæc dicebantur *mandata de providendo*, si beneficium vacaret; si vero nullum beneficium vacaret, dicebantur *gratiæ expectativæ*, quia clericus mandato munitus tamdiu expectare debebat, quamdiu beneficium vacaret. Hujus generis mandata deinde data sunt gratia aliorum confugientium, qui scilicet bene de Ecclesia meriti erant. Tandem mandatis succedere reservationes.

Ante tempora Clementis IV. nullum extat reservationis exemplum.

### VIII.

Sunt autem duplicis generis reservationes. Primum genus dicitur reservationum specialium, cum Papa sibi certum beneficium pro certa vice vel tacite, vel expresse reservat. Tacita reservatio vocatur affectio: dicitur autem affectio, cum Papa in collatione certi beneficii manum apposuit, & collatio certis de causis effectum non habuit. Alterum genus dicitur reservationum generalium, quæ conti-

nentur aut in Pontificiis Constitutionibus, aut in Regulis Cancellariæ Romanæ. Ubi Pontificiæ hæ Constitutiones, & Regulæ Cancellariæ receptæ sunt, reservationes generales ad summa hæc capita reducuntur. Primo reservantur beneficia quædam ratione loci, videlicet quæ vacant apud Sedem Romanam, vel apud Curiam Romanam, quod contingit vel per obitum, vel per quamcumque dimissionem beneficiarii in Curia Romana. Secundo reservantur beneficia quædam ratione temporis, quæ scilicet aut vacant sede episcopali vacante, aut vacant certis anni mensibus, modo enim alternativa mensium Episcopis concessa est, modo tantum quatuor menses Episcopis conceduntur. Certe Prælati inferioribus quatuor menses tantum assignantur. In alternativa primus anni mensis assignatur Papæ, secundus Episcopo, & successive alternatim. Ubi tantum quatuor menses conceduntur, primi duo anni menses papales dicuntur, tertius Ordinariorum, & sic æquabiliter proceditur ad menses ceteros. Tertio reservantur beneficia quædam ratione dignitatis eorundem beneficiorum, qualia sunt Episcopatus, & primæ dignitates in cathedralibus, & collegiatis, item Abbatia, & Prioratus quidam conventuales. Quarto refer-

reservantur beneficia quædam ratione dignitatis illorum, qui dudum eadem possidebant, veluti si beneficium postremo possessum fuisset a Cardinalibus, Legatis Apostolicæ Sedis, aut aliis Romanæ Curie officialibus. Denique reservantur beneficia quædam ratione delicti, veluti si quis beneficio spoliatur, quod duo incompatibilia beneficia possedisset, aut si beneficium collatum sit, non servatis canonibus Tridentini Concilii.

### IX.

Quædam regulæ sunt a collatoribus beneficiorum in collatione observandæ, & 1. beneficium debet esse vacans: 2. est gratis conferendum: 3. conferendum est illi, qui legitimam ætatem nactus sit. Olim cum beneficiorum collatio esset ordinationi conjuncta, ea requirebatur ætas ad beneficium, quæ requirebatur ad Ordinem. Sejunctis collationibus cautum est, nequis admittatur ad dignitates, vel ad beneficia curam animarum habentia, nisi animum saltem vigesimum quintum attigerit. Si dignitas, vel personatus nullam animarum curam adnexam habet, nemini concedi potest, qui minor sit annis duobus supra viginti. In canonicatibus Ecclesiæ cathedralis ea ætas requiritur, quæ necessaria est ad Ordinem sacrum suscipien-

dum, qui canonicatui sit adnexus. In ceteris beneficiis satis est, si clericus decimum-quartum annum excefferit: 4. beneficium concedi tantum illi debet, qui aut insignitus jam sit, aut insigniri intra annum saltem possit eo Ordine, qui necessarius est ab obeunda beneficii munera: 5. debet beneficium adepturus esse idoneus doctrina, & moribus dignus: qua in re magis idoneus, & magis dignus minus idoneo, & minus digno præferendus est.

### X.

Nulla erat singularis forma conferendorum beneficiorum, cum beneficia ab Ordinis collatione sejuncta non erant. Facta separatione, inuenta est institutio, quæ duplex est, alia collativa tituli, alia corporalis, sive in possessionem inductio. Id inductum est exemplo ceterorum jurium in civili societate adquirendorum. Institutio collativa tituli fit per symbola, ceu impositionem pilei, traditionem annuli, aut similia. Corporalis institutio fit per ingressum in Ecclesiam beneficii, aditionem altaris, stalli occupationem, item pedum positionem in fundis beneficiariis. Utriusque institutionis rationes in scripturam redigi solent. In beneficiis parochialibus inducta est forma singularis concursus, qui ab  
Epi-

Episcopo indicitur, vocatis omnibus, qui velint beneficium parochiale adquirere, ita ut periculo a singulis facto apud examinatores synodales, magis idoneo, & digno beneficium conferatur. In quibusdam cathedralibus, aut collegiatis Ecclesiis beneficia sunt, quæ vel electione Capituli conferuntur, modo ab Episcopo confirmanda, modo etiam sine confirmatione Episcopi, juxta cujuscumque Ecclesiæ mores; vel adquiruntur optione, ita nimirum, ut uni ex canonicis liceat dimisso proprio titulo vel præbenda, vacantem titulum, vel præbendam optare.

# XI.

Jura, & onera beneficiariorum ad hæc summa capita reducuntur. Primo tenentur beneficiarii munus illud sacrum implere, quod beneficio adnexum est, ideoque residentiæ legibus obligantur. Distinguunt pragmatici beneficia simplicia a ceteris, puta parochialibus, aut dignitatem, vel canonicatum adnexum habentibus. Simplicia dicunt exempta a residentiæ legibus, cetera eisdem legibus subjacere. Qui ita opinati sunt, confuderunt leges cum legibus. Quando enim leges pœnis coercere solent eos, qui graviorum criminum rei sunt, in minoribus criminibus a pœnis indicendis abstinere, sacri canones

graves poenas indixerunt in Parochos, ceterosque curam animarum habentes, item in canonicos, si non residerent; minores beneficiarios nulla poena mulctarunt. Ubi poena expressa indicta non fuit, ibi nullam residentiae legem esse finxerunt. Tenentur praeterea beneficiarii omnes ad Psalmodiam: breviarium passim appellant.

### XII.

Secundo debent beneficiarii praedia, & jura beneficii sacra recta tueri, custodire, servare; nunquam ad eorum alienationem devenire, nisi causa gravissima intercedente, & legitimis adhibitis solennitatibus.

### XIII.

Tertio ratione habita fructuum, & obventionum beneficii, potestas beneficiariorum coercesetur intra fines administrationis, & dispensationis, ita ut beneficiarii primum honestae sui ipsorum sustentationi consulant, si indigeant; deinde Ecclesias reparent, instaurant, instruunt, ornent; denique quod superest, erogent in pias causas. Decedentibus beneficiariis, totum jus administrandi, ac dispensandi cessat, nec in heredes transfertur. Hinc ex jure communi ecclesiasticum peculium, quod mortis tempore extat, ad Ecclesiam pertinet. Hanc ob causam testamenta



menta clericorum de bonis Ecclesiæ olim penitus improbabantur . Primus Alexander III. in capite 12. de testam., postquam statuit , nomine Ecclesiæ venire successorem in beneficio, si singulare beneficium sit , & venire collegium clericorum , si beneficium sit ex iis, quæ collegium componunt, dixit, non esse consuetudinem improbandam, si clericus beneficiarius ultima voluntate quidquam in pias causas conferat . Recentioribus temporibus inuestum est jus spoliū, quo factum, ut Pontificis Romani Camera sibi vindiceret fructus Ecclesiarum a decedentibus beneficiariis relictos . At hoc jus non in omnibus provinciis æque observatur, imo & varias passum fuit vicissitudines .

Consueverunt quoque aliquando Pontifices Maximi in fructibus beneficiorum sibi reservare annatas, idest redditum unius anni. Hodie dimidia tantum annata penditur, quoties redditus beneficii excedat annum redditum 24. ducatorum, & collatio fiat a Sede Apostolica . In beneficiis unitis collegio, vel monasterio annatæ locum tenent quindennia; idest singulis annis quindecim luitur annata .

## XIV.

Non semel contingit clericum beneficium obligari ad certam luendam pensionem ex redditibus beneficii, gratia alterius, ut plurimum clerici, quandoque etiam, sed extra ordinem laici. Quoties pia causa pensionem constitui suadeat, nihil est, quod naturæ beneficiorum adversetur. Qui pensionarius est, multum a beneficiario differt, sive quod nulla onera beneficii ferat, sive quod certam, & definitam annuam quantitatem e redditibus beneficii, & de beneficiarii manu percipiat, sine ulla beneficii administratione. In impositione pensionis cavendum semper est, ut ne quæ necessaria sunt ad alendum beneficium subtrahantur. Pensio semel constituta extinguitur pensionarii morte; vel remissione. Si beneficiarius decedat, aut beneficio cadat, nihilominus in successorem in beneficio pensionis onus transmittitur.

## XV.

Cum beneficiarius moritur, ex natura sua beneficium vacat, alteri concedendum. A beneficiario vivente amittitur beneficium vel juris potestate, ceu si beneficiarius hæresis crimen admittat, aut aliud quodcumque scelus, quo anathema incurrat, vel officio judicis, cum beneficiarius tale crimen admittat,

tat, quo indignus beneficio reddatur, eaque propter sit spoliandus, vel denique facto proprio, cum beneficium dimittit. Equidem beneficia, ceu munera publica sponte dimitti nequeunt; interea tamen quædam justæ causæ subesse possunt, quibus probabilis renunciatio reddatur. Causæ istæ sunt apud superiorem proponendæ, & ab eo probandæ. Plane renunciatio vel simplex est, & absoluta; vel in certam conditionem confertur, veluti si conditio adjiciatur, qua beneficiarius pensionem sibi reservet, beneficium cum beneficio permutet, aut ita abdicet beneficium, ut beneficium certæ personæ conferatur.

#### XVI.

Recentioribus sæculis quædam instituta sunt beneficiorum species, quæ nonnisi improprie possunt beneficia nuncupari. Hujusmodi in primis sunt patrimonia clericorum. Cum plures sacris Ordinibus initiari cœpissent, quam redditus Ecclesiarum ferrent, obtinuit, ut ordinarentur, si certum sibi patrimonium constituissent. Hæc ordinatio ex dispensatione concessa est, quando Ecclesiæ gravis utilitas id postulet. Patrimonium debet esse certum, fructiferum, ad honestam sustentationem sufficiens, nec potest alienari.

#### XVII.

## XVII.

Ad beneficia quoque impropria referuntur pensiones ecclesiasticæ clerico concessæ, ut pro titulo sint sacræ ordinationis. Pensiones in hac specie vix a clericali patrimonio distant. Item impropria beneficia sunt, quæ conceduntur ad certum tempus, aut ita, ut possint a superiore quodcumque avocari. Appellantur hæc præstimonialia, seu præstimonialia portiones.

## XVIII.

Denique beneficia impropria sunt cappellaniæ, aut pia quædam legata clericorum gratia instituta. Cappellania est onus quoddam certæ Ecclesiæ, vel cappellæ cohærens, quod alicui exequendum mandatur, ut plurimum ad res aut Divinas, aut sacras ordinatum. Qui cappellaniam possidet, cappellanus vocatur. Si rei Divinæ, vel sacræ exercitio cappellano mandata sit, tum cappellanus debet esse clericus, & in eo Ordine constitutus, quem officium postulat. Si rei Divinæ, vel sacræ exercitio ita instituta est, ut per alterum, quam per cappellanum, fieri possit, etiam laici, etiam infantes, etiam scæminæ ad cappellaniæ possessionem admittuntur. Hinc distinctio cappellaniarum in ecclesiasticas, & laicales. Ecclesiasticæ nequeunt sine Episcopi aucto-

auâtoritate erigi, ſecus laicales. Pia legata clericorum gratia inſtituta etiam æertum onus habent adnexum, ad res Divinas, aut ſacras ordinatum; non tamen Eccleſiæ, aut cappellæ cohæret, ſed cohæret hereditati illius, qui onus illud inſtituit.

Inde ſequitur, cappellaniam nonniſi cum certa conſtituta dote ſeparata ab hereditate erigi, exemplo dotis, quæ conſtituitur in erectione beneficiorum; at legatum pium etiam ſine dotis ſeparatæ conſtitutione ordinari, impoſito heredibus onere certam quantitatem certis temporibus annuatim præſtandi clerico, qui Divinum, aut ſacrum opus exerceat. Huiusmodi ſunt legata pia miſſarum celebrandarum, & ſimilia,

## TITULUS XI.

### DE REBUS PIIS,

*Quæ ſunt a Divinis, & ſacris diſtinctæ,*

#### I.

**E**QUIDEM nonnullæ ſunt res piæ, quæ Divinis, ſacriſquæ cohærent. Quid enim, ſi occaſione rerum Divinarum, vel ſacerarum pii fideles quidquam elargiantur Sacerdotibus, ut inde pauperum inopiæ occurratur

ratur, aut alantur hospites, vel peregrini communionem cum Ecclesia habentes? Sic Ecclesiæ peculia creverunt, & multa erecta sunt beneficia, de quibus jam superius actum est. Ceterum aliæ sunt res piæ, quæ nec Divinis, nec sacris cohærent. His sola pieras, idest amor, & charitas in proximum formam dedit; sive ad tempus, sive in perpetuum institutio facta fuerit.

## II.

Harum rerum triplex esse potest species. Quippe possunt res piæ ita constitui, ut rei-publicæ, & societati serviant, veluti cum quis certa bona civitati, aut provinciæ donat, ut publicæ utilitati consulatur. Deinde possunt res piæ dirigi in commodum quarundam personarum certæ conditionis, ceu pauperum, peregrinorum, monachorum, ac similibus. Huc pertinet xenodochiorum, & montium pietatis erectio, de quibus actum superius est in libro 2. tit. 10. Deinque res piæ dirigi possunt in utilitatem singularem quarundam personarum, aut etiam certæ familiæ.

## III.

Adjici his possunt illa opera pietatis, in quibus exercetur quidem in proximum charitas, præcipuus tamen instituentis finis est, ut  
sibi,

sibi, & animæ suæ consulat; veluti cum quis ita hospitalibus donat, ut pauperes in hospitalibus degentes statis precibus pro donante Deum orent, cum quis in remissionem peccatorum suorum donat; cum quis loco pio donat, quæ ipse olim surripuit ab incertis personis, quibus alias subrepta restituere non valeret. Donationes istæ certum modum habent adjectum, & conveniunt cum cappellaniis, aut piis legatis, de quibus nonnulla tradidi in titulo præcedente num. 18.

#### IV.

Piorum operum executio ad eum pertinet, qui eadem pia opera instituit. Si institutio vel in certum tempus, vel in perpetuum protrahatur, & intra rei omnino privatæ fines minime contineatur, institutioni publicam auctoritatem accedere necesse est, veluti cum de xenodochio erigendo agitur. Mortuo institutore, piæ voluntatis executio vel ad heredes pertinet, vel ad eos, quos institutor specialiter designaverit. Nullis heredibus existentibus, nullo specialiter designato ab instituyente; aut etiam heredibus quidem existentibus, aut certis designatis personis, sed his curam suscipere negligentibus, qui reipublicæ præsunt, officio suo rem piam curant, & executioni demandant. Jamdiu  
legibus

legibus piorum Principum excitata fuit in has res sollicitudo Episcoporum, ut isti curam habeant piorum operum, & in eorundem executionem incumbant. Hujus generis mandata inde constituerunt ordinariam sacrorum Antistitum potestatem, quam sibi tueri solent, & quam multa Concilia, ipsum etiam Tridentinum, servaverunt. Ab Episcopali sollicitudine exempta sunt pia opera, quæ exempta esse institutor voluit, item quæ exemptis collegiis unita sunt, denique quæ Supremi Principes in suum singulare patrociniū suscepērunt, quasi in his cesset generale mandatum jam olim Episcopis factum ex legibus generalibus Imperatorum.

## *TITULUS XII.*

### DE REBUS RELIGIOSIS.

#### I.

**E**A pietatis species, quæ erga defunctos exercetur, sive cultu, sive officiis quibuscumque, proprie religio abs jureconsultis appellatur. Iterum heic adnotandum est; esse res quasdam religiosas, quæ Divinis, sacrificiis rebus conjunctæ sunt. Quid enim si pius quidam testator certa bona Ecclesiæ dederit, ut missæ sacrificium quotannis in testatoris



toris suffragium celebretur, aut ut certa Ecclesia construatur, dedicetur, & ubi opus, reparetur? Religio est, testatoris voluntatem sequi, & implere: sed missarum celebrationes, Ecclesiarum dedicationes a defuncto ordinatæ Divinæ sunt res, aut sacrae.

In hisce casibus collata bona sunt in ministerio illorum, quos testator designaverit: si nemo designatus est, sunt in ministerio rectoris Ecclesiæ, in qua res Divina, aut sacra agenda est: annua eleemosyna a testatore præstituta semper cedit dispensationi illius, qui rem Divinam, aut sacram agit: ipsa vero res Divina, vel sacra modum accipit ex auctoritate Episcopi, ad quem pertinet sacra omnia, & Divina dirigere.

## II.

Dixi in primis, religionem in defunctos exerceri cultu, eo nimirum casu, quo declaratum ab Ecclesia sit defunctorum quorundam animas jam in Cælo cum Christo regnare. Huc spectat cultus, quem exhibemus in Sanctorum reliquias, quæ propterea res religiosæ appellantur. Reliquiarum vetustissimus est in Ecclesia cultus, minime sane distinctus a cultu Sanctorum: ergo cultus in eas tantum reliquias exhibendus est, quas constat revera esse Beatorum, sive constet

*Instit. Pars II.*                      Q                      de

de Beati nomine, & singulari persona, sive non constet.

Quando non constat de singulari persona, & nomine Beati defuncti, tunc dicuntur reliquiae baptizari, dummodo alias constet illum Beatum esse, cujus reliquiae sunt. Baptismus iste, uti vulgo loquuntur, nihil aliud est, quam nominis impositio. In nominis impositione, nonnisi nomina appellativa, idest pluribus communia, usurpantur, sive græca, uti Theophyli, Theodori, sive latina, uti Pii, Felicis, Victoris, & similia. Hac ratione nulla est mendacii suspicio.

### III.

Postquam beatificationis ritus a ritu canonizationis distinctus est, non idem omnino cultus exhibetur beatificatis, & beatificatorum reliquiis, qui exhibetur canonizatis, & reliquiis canonizatorum. Ubi de beatificatis agatur, ratio cultus non adeo solennis est: modum accipit ex decreto beatificationis.

Beatificatio est quidem decretum Pontificis Maximi, quo declaratur, constare, defuncti alicujus animam cum Christo in Cœlo regnare, ita tamen ut novo judicio adhuc locus super sit, & ulteriori inquisitioni. Cum novo judicio caussa diremta est, & suprema Pontificis Maximi sententia accesserit,

rit, tum canonizatio appellatur. Hæc disciplina invaluit a sæculo decimotertio; olim Episcoporum judiciis hæc res relinquebatur.

#### IV.

Nec vendi, nec quacumque ratione adduci in commercium Sanctorum, Beatorumve reliquæ possunt. Cum certæ sacræ ædes tantis pignoribus locupletantur, eisdem exui a nemine debent. Imo decet, reliquias in sacris ædibus custodiri; nisi de reliquiis minus insignibus agatur, quæ privatim ex venia Episcopi detinentur pietatis, religionisve fovendæ causa. Insignes reliquæ dicuntur, cum agitur aut de toto defuncti corpore, vel de inspectabili corporis parte, vel etiam de ea singulari corporis parte, in qua martyr passus est.

#### V.

Dixi secundo loco, exerceri religionem in defunctos officiis. Hæc sunt generalia officia, quibus eos omnes prosequi decet, qui in pace Ecclesiæ defuncti sunt. Non amplius memoro, religiosum esse, ea exequi, quæ pia voluntate fuerint a defuncto præstituta, ad opera pietatis in proximum, ad remedia peccatorum, ad salutem animæ, præsertim si hæc cum certo cultu factorum, & Divinorum conjuncta sint. Commemorare nunc ju-

vat veluti res religiosas, loca ad sepulturam  
cadaverum parata, item funus, & funeris  
rationes.

## VI.

Olim in Ecclesia receptum erat, ut extra  
loca sacra mortuorum fidelium cadavera tu-  
mularentur. Primum in loco sacro locaban-  
tur martyrum exuviæ, item Sanctorum Con-  
fessorum. Paullatim factum est, ut prope  
altaria tumularentur cadavera Episcoporum,  
& clericorum, quorum virtutes egregiæ fuif-  
sent. Quod facile, & vulgare erat, clericos  
omnes vita functos laudare, Episcopi omnes,  
& clerici in sacris ædibus tumulari inde cœ-  
perunt. Cur non & laicis idipsum concede-  
retur, si optime de Ecclesia meriti videren-  
tur? Sensim hæc res inolevit. Primum enim  
cemeteria prope sacras ædes constructa sunt,  
deinde erecti tumuli in atriiis, in porticibus,  
in exedris ædium sacrarum. Tandem in ædi-  
bus ipsis sacris excavata sepulcra sunt, in  
quibus passim cadavera fidelium sepelirentur,  
remanentibus adhuc cemeteriis prope sacras  
ædes, veluti amplioribus, ad usum commo-  
diorem. Eam ob causam cœpit cemeteriis  
stato ritu benedici, & cemeteria eodem pene  
jure censerī debuerunt, quo ædes ipsæ sacræ,  
vel ædium sacrarum accessiones.

## VII.

## VII.

Persuasum fuit fidelibus, se magis adjuvari posse meritis Sanctorum, si eorum cadavera ad Sanctorum reliquias tumularentur; item se magis adjuvari fidelium orationibus, si eorum cadavera tumularentur in eo loco sacro, ubi frequentior erat conventus populi, & quotidianæ fierent orationes. Hinc frequentius sepeliebantur cadavera in basilicis, quas martyrum reliquiæ exornabant, in cathedralibus Ecclesiis, item in parochialibus, aut conventualibus, in quibus scilicet magnus erat frequens populi conventus, & quotidianæ orationes habebantur. Res eo devenit, ut locus sepulturæ juribus Ecclesiarum parochialium accenseretur, ita ut hodie jure ordinario quis debeat in parochiali Ecclesia tumulari.

Dico jure ordinario; ut indicem exceptionem adversus regulam, ea in specie, qua quis extra parochialem Ecclesiam sepulturam elegerit. Electio duplex est, expressa, & tacita. Expressa est, quæ facta demonstratur a defuncto, etiam actu minus solenni, dummodo certo, & dummodo ab eo, qui consensus capax sit. Tacita est, cum in certa familia jus sit sepulcri familiaris, aut hereditarii; etenim cum unusquisque præ-

Q 3

sumatur

sumatur, velle se tumulari in sepulchro majorum, tacite videtur in eo tumulo sibi sepulturam elegisse.

### VIII.

Funus etiam in veteri Ecclesia fiebat cantu psalmodiarum; neque enim videbatur mors fidelium luctibus, & luctuum significatione excipienda. Potius gratulandum erat cum defunctis, quod ad æternam felicitatem transivissent. Hæc psalmodia perpetuo in usu fuit, & etiamnum est. Cum locus sepulturæ ordinarius designari cœpit in ædibus sacris parochialibus, tum etiam funus, & funeris rationes juribus parochialibus adscribi debuerunt. Elevatio cadaveris ritu sacro in defuncti domo facienda inter jura mere parochialia relata est: eadem ratione parochorum esse debuit funus ducere usque ad ædes sacras; in quibus cadaver est tumulandum. Si tumuletur in parochiali Ecclesia, Parochi est ceteras funeris partes persequi. Si tumuletur in alia Ecclesia, quæ parochiali Ecclesiæ obnoxia non sit, ceteras funeris partes in hac Ecclesia persequuntur ejusdem Ecclesiæ administrari.

### IX.

Consueverunt occasione funeris quædam fieri aut Ecclesiis, aut clericis oblationes.

Si

Si defunctus supremo elogio quædam certis Ecclesiis reliquisset, certam portionem, ut plurimum quartam, sibi quandoque vindicabat Episcopus, in vectigium generalis administrationis, quam quisque Episcopus olim habebat in rebus omnibus Ecclesiarum. Hæc quarta episcopalis hodie fere exolevit. Si defuncti heredes aut sponte, aut ex dispositione defuncti, oblationes contulerint occasione funeris in Ecclesiam electam a parochiali distinctam, vel in clericos Ecclesiæ electæ, harum oblationum quartam portionem debent heredes Parocho tribuere. Hæc quarta parochialis modum accipit ex consuetudinibus regionum; licet enim ut plurimum quarta portio sit, unde quartæ nomen accepit, alicubi tamen tertia est, alicubi dimidium.

### TITULUS XIII.

*De juribus quibusdam singularibus in rebus  
Divinis, sacris, piis, ac religiosis.*

#### I.

**J**URA omnia rebus Divinis, aut sacris, piis, aut religiosis cohærentia, ad duo summa capita rediguntur. Siquidem alia sunt jura realia, quæ rebus ipsis inhærent;

Q 4

alia

alia personalia, quæ in personis consistunt, & ad easdem res referuntur.

Utraque jura incorporalia sunt: naturam, & indolem induunt rerum, vel quibus cohærent, vel ad quas referuntur. Proindeque nullo modo in commercio esse possant.

### II.

Jus profecto reale est immunitas, quæ duplex est, modo localis, modo realis. Localis dicitur, quæ concessa fuit ædibus sacris, aut locis religiosis, qualia sunt cemeteria, aut locis, quæ sunt ædium sacrarum adminicula, quales sunt ædes episcopales, aut parochiales sacris ædibus cohærentes. Consistit hæc immunitas in eo, quod rei criminum ab eisdem locis non abstrahantur. Realis dicitur immunitas, quæ prædiis Ecclesiarum competit, ita concessa, ut communibus reipublicæ oneribus minime subsint.

### III.

Localis immunitatis Imperatorum constitutionibus æque ac sacris canonibus tributæ hæ causæ fuerunt. Prima, quod in Judaica Republica certæ civitates refugiorum divinitus designatæ fuerint, ad quas confugientes homicidæ tuti essent. Pro civitatibus refugii congruum visum fuit inter Christianos, sacra loca, & sacris cohærentia designare.

Alte-



Altera causa fuit intercessio Episcoporum, qui cum reos ad Ecclesiam confugientes poenitentiis publicis subjicerent, tum rogabant, ut eam ob rem a vindicta publica eximerentur. Postrema causa fuit, ut honos quidam in loca sacra, & sacris coherencia servaretur, ne in iis hostili pene more in reos ageretur. Sensim hæc immunitas amplificata fuit eo usque, ut rei abuterentur. Suasit inde publica utilitas, ut certis finibus coerceretur, mutua consensione utriusque potestatis. Hanc ob rem maxime hodie observandi sunt aut mores provinciarum, aut inita concordata.

#### IV.

Realis immunitas iterum Imperatorum constitutionibus æque ac sacris canonibus tributa fundamentum habuit in eo, quod deceret, sacras ædes sine diminutione fructuum commode instrui, & ornari ex collatis prædiis, item ministros Ecclesiæ sine diminutione fructuum prædialium sustentari, præsertim quia quod superesset, erat in pauperes, piasque ceteras causas erogandum. Cum Ecclesiæ, ecclesiasticique administri valde locupletati successione temporum fuerunt, tum late protensa immunitas visa fuit gravis illis, qui soli onera publica ferre deberent. Hinc recentioribus sæculis debuit eadem immuni-

tas certis limitibus circumscribi. Qua iterum in re mores Provinciarum, & publice inita concordata attendi necessarium est.

## V.

Ut nunc de juribus personalibus loquar, vix opus est commemorare jura generalia, quibus christiana communio constat. His juribus gaudent fideles omnes pro modo suo, & juxta ordinem, ac gradum, in quo collocantur. Hinc alia dicitur communio clericalis, alia laica. Clericalis distinguitur in tot gradus, quot gradibus ecclesiastica hierarchia consistit. Eam ob rem alia est communio episcopalis, alia presbyteralis, alia diaconalis, alia administratorum inferiorum. Vi clericalis communionis unusquisque Episcopus jura explicat in res Divinas, sacras, pias, religiosas, quæ episcopali gradui tributa fuerunt. Æquabiliter jura explicat unusquisque presbyter, quæ presbyterorum ordini tributa sunt. Æquabiliter diaconus, aut clericus quicumque inferior. Laica communio diversa quoque est, quæ fidelibus pœnitentibus conceditur, ab ea, ad quam admittuntur fideles, aut nunquam in pœnitentium stationes ejecti, aut post pœnitentiam reconciliati. Pœnitentes minora jura explicant, quam ceteri.

Ex

Ex his liquet, clericos aliquando ejici in pœnam criminis in laicam communionem, quod nihil aliud est, quam exui juribus clericæ communionis propriis; imo & quosdam de clero ejici aliquando de gradu suo majore in inferiorem, utut adhuc in clero; quod nihil aliud est, quam exui juribus sui majoris ordinis singularibus.

Fuit apud veteres quædam communionis species, quæ peregrina dicebatur. Erat autem communio, quæ advenis concedebatur, quotiescumque non constaret ex formatis epistolis Episcoporum, in quonam clericorum, vel laicorum gradu constituti essent. Hi peregrini in loca secreta recipiebantur, nimirum ab Ecclesia segregata, non denegaris necessariis subsidiis, donec qui, qualesque essent, constaret.

## VI.

Præter hæc generalia christianæ communionis jura, sunt quædam jura singularia, quæ in res sacras, sacrive cohærentes, item in res pias ac religiosas, competunt aut certo personarum generi, aut certis personis. Quod singularia jura sint, non facile præsumuntur, sed qui ea allegat, demonstrare debet ea sibi competere. Hujusmodi sunt jura electionum, item jura patronatus, aut quæ  
prope

prope ad patronatum accedunt, qualia sunt jura advocatiæ, vel custodiæ.

Duplicem ob causam singularia dici quædam jura possunt; primo, si sint singulari titulo præter jus commune quæsitæ: hoc casu verum est, quod modo notabam, demonstrandum esse titulum ab eo, qui allegat; deinde si competant quidem jure communi, sed certo personarum generi: hoc casu non opus est tituli demonstratione. Ipsa generalis juris constitutio titulum præbet; satis est, ut qui allegat, jus sibi competere, demonstret, se esse de eo personarum genere, cui jus commune favet.

## VII.

Jus electionis competere solet collegiis, aut universitatibus, siue agatur de eligendo collegii, aut universitatis Præsidente, siue agatur de eligendis iis, qui collegium, universitatemve componunt, siue collegium, aut universitas coëat causa Divinorum, aut sacrorum, siue coëat causa rerum piarum, aut religiosarum. Electio ordinaria fit aut suffragiorum diremptione, aut compromisso. Sic collegium Cardinalium eligit Pontificem Maximum. Sic jure communi electio Episcopi ad Capitulum cathedralis Ecclesiæ pertinet. Sic quandoque canonici a canonicorum collegio

gio eliguntur. Olim etiam totius cleri suffragio eligebantur ii, qui in clerum essent adsciscendi, imo & totus populus convenire solebat, ut electio cleri comprobaretur. Sic monachi suum Præpositum eligunt, ceterosque monasterii administratos, ac suffragia ferunt in receptione fratrum. Sic denique universitates, ad quas rerum aut piarum, aut religiosarum cura pertinet, suos Præsides eligunt, administratos, ac curatores universos.

### VIII.

Jus patronatus est jus quoddam singulare in certis honoribus, commodisque consistens, cui certa etiam onera cohærent, iis concessum, qui Ecclesias fundaverunt, dotaverunt, vel restauraverunt, & illis, qui ab eisdem causam habent. Qui hoc jure patronatus gaudent, patroni vocantur. Commodum patronia concessum in eo situm est, quod patronis indigentibus Ecclesia occurrere debet. Honores patronis concessi, modo plures, modo pauciores pro ratione temporum demonstrantur. Antiquissimus honor est, quo fundatores sua nomina sacris ædibus inscribebant: præter nomina datum est pingere familiaria insignia, cum hæc in usu esse coeperunt. Alter honos dicebatur apud veteres *jus professionis* in eo consistens, quod patrono primus  
locus

locus in Ecclesia, & in ecclesiasticis officiis inter laicos assignaretur. Hinc profluxit honor sedis in Ecclesia dignioris, honor sepulturæ in eadem Ecclesia distinctæ, honor thuris, & aquæ, & panis benedicti, & similes. Inter honores magis spectabiles hodie habetur jus præsentandi clericos in beneficio patronato instituendos. Onus patronorum est Ecclesiam, ubi opus sit, restaurare.

Aliud est juspatronatus in Ecclesia, aliud in beneficio; licet enim sæpe & Ecclesia, & beneficium erigantur, quo casu qui erigit & in Ecclesia, & in beneficio patronatum nanciscitur; quandoque tamen aut Ecclesia sine beneficio, aut beneficium sine Ecclesia erigitur. His in casibus qui tantum Ecclesiam erigit, patronus tantum Ecclesiæ; qui tantum beneficium erigit, patronus tantum beneficii est. Ubi tantum in Ecclesia juspatronatus acquiritur, locum habent honores superius memorati, non vero jus præsentationis. Ubi tantum in beneficio juspatronatus acquiritur, locum habet jus præsentandi, non vero ceteri honores in Ecclesia.

Siquis non Ecclesiam, sed cappellam in Ecclesia erexerit, eosdem honores in cappella nanciscitur, quos nancisceretur in Ecclesia, si Ecclesiam ædificavisset.

## IX.

Jus præsentandi ad beneficium patronatum olim ita habebatur, ac si esset commendatio quædam a patrono facta apud Episcopum, qui tamen patrono præsentanti morem gere-  
re tenebatur, dummodo præsentatus dignus alias, atque idoneus comprobaretur. Recen-  
tioribus sæculis præsentatio certam formam accepit. Tum enim fieri dicitur, cum patro-  
nus præsentem coram collatore beneficii con-  
stituit eum, quem optat. Si tantum designat  
eum, quem institui desiderat, tunc simplex  
nominatio dicitur, nondum autem præsentatio. Nihil refert, an per se patronus præ-  
senteret, an per procuratorem. Etiam qui præ-  
sentatur, potest se apud instituentem per pro-  
curatorem sistere, dummodo instituens con-  
sentiatur. Præsentatio, imo & nominatio tum  
demum fieri potest, cum beneficium vacat.  
Certa quoque tempora jure sunt definita, in-  
tra quæ præsentatio fiat, post quæ libera sit  
collatoris ordinarii facultas: neque enim suffi-  
cit, intra tempus legitimum nominationem  
fieri, nisi nominatus insuper præsenderetur.

## X

Adquiritur jus patronatus foundatione Eccle-  
siæ, vel beneficii, dummodo fundatio sit un-  
decumque perfecta. Qui Ecclesiam tantum  
dedit,

dirat, aut adjuvat, is benefactor, non patronus Ecclesiæ dicitur; nisi agatur de Ecclesiæ dirutæ restauratione, aut de beneficii redotatione, aut de tali dotis augmento, quod insigne sit; tunc enim auctoritate prælatorum Ecclesiæ, adhuc potest juspatronatus adquiri. Etiam præscriptio modus legitimus est acquirendi patronatus. Imo & aliquando patronatus ex privilegio acquirebatur. Hodie hæ causæ patronatus acquirendi modum acceperunt ex Concilio Tridentino, quo cautum est, ne adeo facile aut Ecclesiæ, aut beneficia patronatui subiciantur.

#### XI.

Variæ sunt juspatronatus partitiones. In primis aliud ecclesiasticum, sive clericorum est, aliud laicum, sive laicorum. Ecclesiasticum dicitur, quod competit ratione tituli ecclesiastici, & titulo ecclesiastico cohæret, ita ut de possessore tituli transeat in quoscunque ejusdem tituli successores. Ita contingit, si parochio alicui juspatronatus competat causa tituli parochialis. Laicum dicitur, quod competat vel ratione foundationis ex bonis patrimonialibus factæ, vel ratione hereditatis, vel ratione familiæ, vel ex alia causa, quæ inter ecclesiasticos titulos non connumeretur. Secundo aliud est hereditarium,



rium, quod in heredes quoscunque, aliud familiare, vel gentilitium, quod in eos, qui de certa familia, vel gente sint, transfertur. Tertio aliud simplex est, aliud reale. Reale dicitur, quod certæ rei cohæret, puta fundo, villæ, castro, & spectat ad quoscunque rei possessores. Quod rei adnexum non est, simplex dicitur.

## XII.

Certæ sunt causæ, quibus juspatronatus amittitur. Et primo, si Ecclesia destruarur, nec reparetur, aut si beneficium supprimatur. Secundo, si patronus, cui libera sit facultas, libertatem Ecclesiæ donet. Tertio designata sunt in jure certa crimina, quorum reus jurepatronatus exuitur.

## XIII.

Non solum juspatronatus locum habet in rebus sacris, seu sacris ædibus, aut in rebus, quæ Divinis cohærent, seu beneficiis; verum etiam in locis piis, aut religiosis.

## XIV.

Ab jurepatronatus distinguitur advocatia; quamquam hæc ad juspatronatus prope accedere videatur. Media ætate consueverunt Ecclesiæ certos advocatos designare, in quorum clientelam se se reciperent defensionis causa. Quandoque advocatia concedebatur

*Instit. Pars II.*                      R                      per-

personis, ita, ut iis defunctis liberum foret Ecclesiæ alium sibi advocatum adscribere; quandoque concedebatur familiæ ita, ut de parente in filios, ac nepotes devolveretur; quandoque concedebatur, veluti jus hereditarium, ad quod heredes quicumque admittebantur. Jura advocatis competentia ad certos census referebantur, item ad commeatus, ad alimenta, & similia.

## XV.

Denique commemorare juvat jus custodiæ: *guardiam* barbare appellaverunt. Hujus juris occasio fuit, quod cum Ecclesiæ, vel beneficia vacarent, multi in bona ecclesiastica irruerent, atque ea occuparent. Ut occupantibus obsisteretur, selegit Ecclesia quosdam viros, de certa gente, aut familia potentiores, qui curam haberent bonâ vacantia custodiendi. Hisce custodibus certi honores dati, aliquando etiam concessa custodiæ, & defensionis præmia. Hodie hæc jura exoleverunt. Integra remanserunt jura supremorum Principum, de quorum pietate, ac religione maxime fidit Ecclesia: hanc ob causam commendabilis adhuc superest Regum sollicitudo in custodiendis bonis vacantibus Ecclesiarum, aut beneficiorum, præsertim si de Ecclesiis, vel beneficiis majoribus agatur.

LIBER

## LIBER V.

De criminibus, & modis, quibus rei  
criminum in Ecclesia coërcentur.

## TITULUS I.

*Quid, & quotuplex sit crimen, & quomodo  
in iudicium deferatur.*

## I.



UODCUMQUE factum, dictum, vel  
concupitum, vel etiam præter-  
missum adversus legem æternam  
Dei, delictum est, non tamen om-  
ne delictum criminis nomine ve-  
nit. Tum crimen dicitur, cum certa pœna  
legibus indicta est, qua reipublicæ satisfiat.

Nomine legis æternæ Dei intelligitur  
non solum lex quæcumque a Deo ipso ho-  
minibus data, sed etiam lex, aut præceptum  
hominum legitima potestate præditorum juxta  
Divinam ordinationem vel in Ecclesia, vel  
in Republica præpositorum.

## II.

Quando monebat Apostolus fideles omnes,  
ut in hoc sæculo viverent *sobrie, juste, ac  
piè*, visus est delicta omnia, ac crimina tri-  
buisse in tres species, quasi alia sint, quæ

R 2

contra

contra nosmetipsos, idest contra *sobrietatem*, alia sint, quæ contra proximum, idest contra *justitiam*, alia sint, quæ contra Deum, idest contra *pietatem* admittimus. Altera delictorum, & criminum partitio illa est, qua traditur, alia esse gravia, alia leviora, quod fere ex rei, quæ admittitur, qualitate metimur; neque enim omnia peccata paria sunt, uti olim tradiderunt Stoici, ac Stoicorum sectatores Novatiani. Alia etiam crimina sunt, quæ specie, seu qualitate; alia quæ tantum numero intra eandem speciem distinguuntur. Clarius ac nitidius ita partiri crimina possumus, ut alia recenseamus, quæ contra Deum directo admittuntur; alia, quæ contra res Deo sacras; alia item, quæ communia sunt & laicis, & clericis; alia, quæ sunt singularia clericorum: quippe singulares sunt leges clericis propositæ, & quæ vitam vere clericalem instituunt.

### III.

Vulgaris est partitio criminum, qua alia ordinaria dicuntur, alia extraordinaria. Ordinaria dicuntur, in quibus pœna specialiter a lege præstituta est: extraordinaria, in quibus generaliter quidem a lege mandatur, ut pœna a reo luatur, pœna tamen non est a lege specialiter definita. In criminibus ex-

traor-

iraordinariis pœnæ definitio tota pender a prudentis judicis arbitrio : in ordinariis judex debet legis definitionem exequi .

Ex doctrina Innocentii III. in cap. 21. de accus. judex aliquando potest pœnam legitimam in criminibus ordinariis moderari; quando scilicet non ab accusatione judicium cœperit, & agatur de pœna, quæ non ipso jure incurratur. Secus, si judicium cœperit ab accusatione, aut si sententia judicis tantum opus sit, ut declaretur, quidnam, aut quodnam pœnæ genus reus incurrerit ex juris potestate etiam sine hominis facto.

#### IV.

Quatuor modis crimina in judicium deferri possunt, idest, accusatione, denuncia-  
tione, exceptione, inquisitione. Accusatio est modus omnium antiquissimus: exceptio origine sua accusationes, & accusandi jura exæquat; sed in ea, non tam quod publice, quam privatim interest, quisque persequitur. Denunciatio, & inquisitio valde affines sunt, quia denunciatio sine inquisitione irrita fieret.

#### V.

Itaque accusatio est delatio criminis in judicio cum nominis inscriptione. Ergo accusatorem nomen suum inscribere necesse est. Quod exequitur actor in judicio civili, id

exequitur accusator in judicio criminali .  
 Tantum actor in judicio civili persequitur ,  
 quod sua interest : accusator in judicio cri-  
 minali personam læsæ reipublicæ sustinet ,  
 & quod publice interest , persequitur . De-  
 bet accusator semel instituta accusatione ju-  
 dicio usque ad sententiam persequi , secus  
 calumniæ crimen incurrit . In accusando po-  
 pularis causa agitur , unicuique de populo  
 competens : qui primus ad accusandum acce-  
 dit , ceteros jure præventionis excludit . Sunt  
 quidam , qui moribus , aut lege ab accusan-  
 do rejiciuntur . Accusatoris est crimen pro-  
 bare : si non probaverit , aut potiore jure  
 si reus innocentiam suam demonstraverit ,  
 jure communi , & ordinario accusator pu-  
 niendus est poena talionis , idest eo poenæ  
 genere , qua accusando voluit plecti accu-  
 satum .

## V I.

Exceptione crimen in judicium defertur ab  
 eo , qui accusatus est , si hic velit accusato-  
 rem abs judicio repellere . Ergo qui crimen  
 excipit , non vindictam publicam intendit ,  
 non personam reipublicæ sustinet : tantum  
 persequitur , quod sua interest , & cum cri-  
 men contra accusatorem objicit , tum petit  
 abs judice , ut accusator a limine judicii  
 ejiciatur .

## VII.

## VII.

Denunciatio partim cum accusatione convenit, partim ab accusatione distinguitur. In eo convenit, quod denunciatio sit delatio criminis apud judicem facta a certa persona: item in eo, quod a denunciatione iudicium incipit. In eo vero distinguitur, quod denunciator nec nomen suum inscribit, nec tenetur iudicium sustinere instar actoris, nec agit ad publicam vindictam, sed ad rei correctionem. Iudex accepta denunciatione ex officio causam dirimit, & definit, ac si ab inquisitione iudicium incipiat.

Si reus postulet, tenetur denunciator nomen suum in curia Ordinarii inscribere, saltem secreto, ut quo casu appareat gravis in denunciante calumnia, tum petente reo denunciatus ipse puniatur.

## VIII.

Inquisitio fit abs iudice ex officio, sive præcedente, uti modo notabam, privati alicujus denunciatione, sive præeunte admissi criminis fama. Cum in hac iudicii specie deficiat accusator, nec sit qui sustineat partes actoris, moribus receptum est, ut auctoritate publica constituatur, qui iudicium adversus reum sustineat. Hunc appellant promotorem fisci, seu promotorem fiscales. Cum

hic ex officio agat, atque agere debeat, nulli poenæ obnoxius est, etiamsi in probatione deficiat. Satis eum excusat agendi necessitas: nisi tamen calumnia sit manifesta. Inquisitio duplex est, generalis, quæ fit ab Episcopo, dum diœcesim visitat, & inquit in reos corrigendos; ac specialis, quæ fit extra causam visitationis instante fiscali promotore, certo delato crimine, & criminis reo. In generali inquisitione Episcopus procedit potius more patrisfamilias; in speciali vere judicem agit.

## *TITULUS II.*

### DE FORMA, ET ORDINE JUDICIORUM CRIMINALIUM.

#### I.

**S**ICUT in ceteris bene multis, ita & in forma, atque ordine judiciorum criminalium varia pro varietate temporum fuisse deprehenditur ecclesiastica disciplina. Suos habuit mores, suasque leges ætas antejustiniana; suos mores, suasque leges habuerunt sequentes ætates usque ad sæculum duodecimum, post quod decretales Pontificum Maximorum normam judiciis præbere potuerunt; suos denique mores, suasque leges habuerunt



buerunt recentiora tempora ; ut omittam dicere , etiam singulares fuisse , atque etiamnum esse variarum provinciarum consuetudines .

Hinc hodie hæc in re non tam inquirendum est , quid scripti juris codicibus contineatur , quam quid invexerint mores publica auctoritate comprobati .

## II.

Olim ab apostolica ætate usque ad Justinianum Principem , seu ad sæculum sextum , planior erat , atque expeditior in Ecclesia criminalium judiciorum forma . Crimina a criminibus distinguebantur : in hac distinctione quærebat , an crimina talia essent , quæ legibus publicis coercita poenis essent , ceu reipublicæ perniciofa : an talia essent , quæ tantum ex sententia canonum poenis , aut poenitentiis publicis coercerentur ; item an graviora essent , an leviora . Item rei a reis secernebantur : in hac parte quærebat , an qui crimen admisissent , clerici essent , an laici . Non æqualis erat in omnibus speciebus ratio procedendi .

Erant etiam crimina quædam , adversus quæ & publicis legibus poena dicta erat , & canonibus aut poena ecclesiastica fuerat imposita , aut publica poenitentia , ceu in homicidio , in perjurio , in adulterio , in blasphemia , & similibus .

## VIII.

## III.

Etiamſi leviora crimina eſſent, atque etiam extra pœnam legibus publicis obeundam: tum ſeu admiſſa eſſent a clericis, ſeu a laicis, mutua charitas unumquemque fidelem ſuadebat, ut reum corripere, quæ appellabatur fraterna correctio. Si reus nihilominus perſicax in delinquendo conſiſteret, qui corripuit, denunciabat reum apud Episcopum, qui auctoritate ſua gravius reum admonebat; & ſi hic contumax inde fuiſſet, Episcopus aut pœnitentia publica eum damnabat, aut cenſuris terrebat pro modo contumaciæ.

Hæc denunciatio, quæ dicitur evangelica, admodum diſtat ab illa denunciatione judiciali, de qua mentionem feci in præcedente titulo num. 7. & 8., & quæ locum facit hodie inquisitioni ſpeciali.

Huic denunciationi proxima eſt alia denunciationis ſpecies, quæ canonica appellatur, & locum habet, ubi avertendum eſt delictum necdum admiſſum, quod admitteri timeretur; veluti cum quis impedimenta denunciat futuri matrimonii, aut futuræ ordinationis clericorum, ut matrimonium, & ordinatio, quæ alias illegitime fierent, non admitantur.

Harum

Harum denunciationum, five de evangelica, five de canonica agatur, præcipuus finis est, & semper fuit fraterna correctio, atque emendatio; quando e converso post denunciationem judicalem adhuc monere reum potest publica vindicta.

#### IV.

Cum graviora crimina essent, sed ex iis, quæ canonibus tantum ecclesiasticis poena coercerentur; tum excitabatur Episcoporum sollicitudo, ut juxta canonum sententiam aut ad indicendas poenitentias publicas, aut censuras, aut poenas ecclesiasticas deveniretur, five clerici rei essent, five laici. Cum e converso graviora crimina essent, quibus dicta foret publicis legibus poena, ceu reipublicæ perniciosus; tum judicia de hoc criminum genere magistratibus publicis relinquebantur, five rei clerici essent, five laici. Tantum Episcopi apud Principes, magistratusve publicos intercedebant, ut poenas sanguinis non inferrent, finerentque potius, ut reus ad Ecclesiam conversus, præsertim si jam ad Ecclesiam confugisset, poenitentia publica diu peragenda in Ecclesia expiaretur, eaque ratione reipublicæ æque, ac Ecclesiæ satisficeret.

Si talia erant crimina, contra quæ leges publicæ æque ac canones ecclesiastici pœnam dixissent, hinc Episcopus ad pœnam canonicam inferendam progrediebatur: illinc publici magistratus, quod sui muneris erat, implebant, nisi Episcopus intercessisset, & non inanis intercessio fuisset.

Ubi iudicio Episcopi causa dirimebatur, hoc discrimen intercedebat inter clericum, & laicum reos, quod laicus aut anathemate, aut censura damnaretur, aut in publicam pœnitentium stationem ejiceretur; clericus deponeretur a gradu, imo & penitus ab Ecclesia ejiceretur, si crimen atrocissimum esset; nunquam publicæ pœnitentiæ addiceretur sententia episcopali. Tantum admittebatur ad pœnitentiam publicam clericus, si postquam anathematizatus esset, & omnino ab Ecclesia ejectus, pœnitentiam devote poposcisset, qua tamen in specie nunquam in clericalem ordinem restituebatur.

#### V.

Præterea ante Justiniani tempora, vix adparet usus procedendi per specialem Episcoporum inquisitionem. Facilius constare potest de usu inquisitionis generalis, in qua tamen Episcopus non iudicem agebat, sed providum patrem. Accusatio erat modus ordina-

dinarius, quo crimina apud Episcopum deferrentur. Ceterum accusatus poterat adversus accusatorem se se alterius gravis criminis exceptione tueri, idest accusatorem ab accusando repellere. Re enim vera nonnisi viri probi, & de calumnia haud suspecti admittebantur. Si de presbyteri accusatione ageretur, nonnisi cum magna circumspectione accusatio admittebatur, videlicet accusator, etiam antequam criminis probationes ederet, in ipso accusationis actu, duos, aut tres testes adducere debebat.

Id consonat cum præcepto Paulli Apostoli, qui in epistola 1. cap. 5. ita Timotheum monèbat: *adversus presbyterum accusationem noli recipere, nisi sub duobus, aut tribus testibus.*

## VI.

Hæc accusatio, si de clericis Episcopo inferioribus ageretur fiebat apud Episcopum, in conventu cleri totius. Si reus de Episcopali judicio quereretur, apud Superiorem, ut plurimum in Synodo provinciali judicium retractabatur. Ubi vero de Episcopo ipso ageretur, in provinciali Concilio causa proponebatur, e cujus Concilii definitione totum negotium pendebat.

## VII.

## VII.

Reus accusatus in iudicium vocabatur, si citatus non compareret, etiam tertio vocabatur, edicto proposito peremptorio, juxta modum agendi in civilibus causis. Si nec tertio vocatus se in iudicio sisteret, contra ipsum, ceu contumacem, procedebatur. Si comparuisset, ejus exceptiones recipiebantur, siue quibus accusatorem ab iudicio repelleret, siue quibus suam innocentiam demonstraret. Hæc simpliciter, & veluti summario iudicio peragebantur. Interveniebant notarii, qui & libellum accusationis, & defensiones rei, & testium monumenta scripto commendabant. Ubi crimen probatum esset aut monumentis ab accusatore prolatis, quibus reus convinceretur, aut ipsa rei confessione, contra reum juxta canones sententia proferebatur. Ubi accusator in probatione deficeret, & de rei innocentia constaret, reus absolvebatur, & accusator plectebatur talione, idest eadem pœna, quam voluit de accusato sumendam. Si res dubia adhuc esset, cogebatur reus, ut se se jurejurando purgaret apud Sanctorum Martyrum reliquias. Cum reus jurejurando testatus fuisset innocentiam suam, tanquam pro innocente sententia pronuntiabatur.

## VIII.

## VIII.

Interea si clerici quemquam accusare vel-  
lent de publico crimine, monebantur, ne id  
facerent Episcopo inconsulto, imo potius, ut  
crimen Episcopo denunciarent, spe concepta,  
futurum, ut Episcopus pii parentis more &  
reo consuleret, & reipublicæ utilitati prospici-  
ceret, reum ipsum emendando, & certæ pœ-  
nitentiæ juxta canones subjiciendo.

## IX.

A temporibus Justiniani Imperatoris visa  
est disciplina paullisper immutari. Quippe  
idem Imperator, postquam in nov. 83. sta-  
tuisset quidem crimina a clericis admissa a  
Præsidibus provinciarum cognosci oportere,  
sed extra ordinem, idest, ut ipse ait, *non  
transcendente lite duorum mensium spatium, &  
ad sacrorum canonum præscriptum*; deinde in  
novella 123. cap. 8. decrevit, se non permit-  
tere citra imperialem jussionem Episcopum pro  
qualibet causa, etiam criminali, ad civilem  
judicem, vel militarem producere, aut exhi-  
bere invitum; & in cap. 21. ejusdem novellæ  
generaliter de causis clericorum, & monacho-  
rum ita statuit: *si crimen fuerit, quod adversus  
quamlibet memoratarum personarum, clericorum,  
monachorum, diaconissarum, monastiarum,  
ascetiarum inferatur: siquidem apud Episcopum  
aliquis*

junctorum . In primis raro fiebant conventus clericorum apud Episcopum , minus quoque frequentia erant Concilia provincialia . Ergo in causis criminalibus Episcoporum raro eveniebat , ut judicium fieret . In causis clericorum inferiorum , soli Episcopi sine cleri conventu non semel judicium sustinebant , reosque deponebant . Hinc querelæ graves , ac communes . Secundo a temporibus Justiniani res Græco-Romani Imperii in pessum ire cœperunt in occidentali Ecclesia : publicorum magistratum a Græcis Imperatoribus præpositorum potestas contemtui habebatur . Principes hostes Imperii Episcoporum gratiam sibi conciliantes , multum Episcopis deferebant , ac sæpe numero Episcopos in consortium publici regiminis admittebant . Hinc major evasit , ac liberior potestas Episcoporum in criminalibus causis præsertim clericorum , sive quod Imperatorii magistratus præsto non essent , sive quod hostes Imperii in occidente dominantes multa Episcopis indulgebant . Interea prodiit collectio decretalium Isidori Mercatoris . Nulla pene decretalis hujus generis est , quæ non agat de rationibus judiciorum criminalium . Accusationes non Episcoporum modo , sed & minorum clericorum coërcitæ . Probationes cri-

*Instit. Pars II.*                      S                      minum



minum difficiles redditæ: elevata provinciarum Conciliorum auctoritas: Episcoporum dejectio inter causas majores relata, proindeque Romano Pontifici reservata. Ubi Imperium in frustra discissum est, passim Episcopi una cum missis, sive delegatis Principum oppida, & urbes lustrabant, judicia quæque etiam criminalia indiscriminatim exercebant; inquisitio generalis in reos certis formulis instituta est. Insuper cum Gothi, Vandali, Longobardi, atque hujus generis homines Europæ dominantes multos suos ritus judiciales invexissent, ritus iidem etiam in judiciis ecclesiasticis recepti sunt. Inter istos ritus fuit purgatio reorum vulgaris, quæ locum habebat, ubi reus accusatus in suspicionem criminis adduceretur, nec satis crimen probatum esset, ubi testes testibus repugnarent, ubi accusator de calumnia suspectus esset: fiebat autem per ferrum candens, per aquam fervidam, per aquam frigidam, & similia, imo etiam monomachia, sive duello. Qui illæsus a discrimine exiret, innocens habebatur; contra eum, qui in discrimine victus fuisset, sententia proferebatur. Episcopi, ac Sacerdotes sacris officiis hanc vulgarem purificationem auspicabantur. Deum tentantes, & pene Divina miracula expectantes. Certe hæc ratio

ratio non in omnibus Ecclesiis peræque probabatur, imo alicubi, præsertim auctoritate Maximorum Pontificum, damnata est. Præterea jura feudorum inducta, in quibus fides vassallorum in conspectu parium curiæ jurejurando spondebatur, adhibitis etiam pluribus jurisjurandi sociis, qui conjuratores dicebantur, occasionem præbuerunt novo purgationis generi, quo scilicet qui suspectus erat, aut de crimine reus, aut de calumnia accusator, aut testis, jurejurando suam innocentiam testabatur, adhibitis conjuratoribus numero plurimis. Hanc appellaverunt purgationem canonicam, propterea quod fuerit canonibus Antistitum confirmata præ purgatione vulgari. Denique ad instituenda judicia publica Episcoporum in causis criminalibus clericorum plurimum valuit constitutio Friderici Imperatoris, quæ legitur in authentica *statuimus* cod. de Episc. & cleric., & quæ statutum est, neminem posse etiam in criminali causa ecclesiasticam personam trahere ad sæculare judicium.

Utut hæc constitutio edita fuerit, ac promulgata, non tamen peræque inter varios illius ætatis Imperii casus observata moribus est in omni criminum genere: eam ob rem, qui de foro episcopali tunc scri-

psulerunt, disputationibus potius rem discutiēbant, quam certis doctrinis. Gratianus ipse canonum collector, & scholarum parens sæculo duodecimo ita digessit hujus generis quaestiones in caussa 11. qu. 1., ut vix quid ipse sentiret, proposuerit.

Notandum est, etiam inter hæc temporum adjuncta, desisse propemodum ordinariam disciplinam publicarum poenitentiarum. Istæ passim vel eleemosynis redimebantur; vel peregrinatione, aut suscepta contra infideles militia commutabantur. Eam ob rem episcopale forum in criminalibus causis per raro eo tendebat, ut publicis poenitentiis rei cum effectu addicerentur. Tantum exercebant Episcopi judicia criminalia, cum ad poenas legitimas deveniendum esset, aut ad censuras adversus contumaces.

## XI.

In hoc rerum statu deventum est ad ea tempora, quibus editæ sunt decretalium collectiones sub finem sæculi duodecimi, & recentiore ætate. Coeperat tunc studium civilis Romanæ prudentiæ jungi studiis ecclesiasticæ disciplinæ. Fora ipsa publica novam formam acceperant ex moribus plurium nationum. Jurisdictio episcopalis aucta plurimum fuerat. Ergo forum ecclesiasticum instar

star fori publici institutum, fori, inquam publici, quod partim dirigebatur legibus Romanorum, partim moribus variarum nationum. Tum fuit recepta specialis inquisitio, tum instituti promotores fiscales, qui accusatoris vice fungerentur, eamque ob rem accusatio omnis pene exolevit: tantum admissa denunciatio, quæ inquisitioni speciali viam strueret. Quando Synodorum infrequens erat conventus, soli Episcopi sæpe iudicis partes sustinebant juxta mores jamdiu receptos, conquerentibus ceteroqui clericis universis. Juxta decretales Isidorianas causæ criminales Episcoporum ad Pontificem Maximum referebantur. Episcopi plures loca construere cœperunt ad reorum custodiam; inde opus habuerunt apparitoribus, & ministris curiæ. Ut verbo dicam, episcopale forum instar fori publici esse cœpit. Interea quando plures clerici conquerebantur, rescriptis Maximorum Pontificum multa exacta sunt ad veterum canonum disciplinam: hæc rescripta collectionibus decretalium inserta sunt, & in jus commune abiverunt. In Conciliis sequentibus, præsertim in Tridentino, plura etiam salubriter decreta, ac composita. Denique ut publica utilitas cum clericorum honore, & Ecclesiarum decore, cum moribus etiam diu

firmatis, ac privilegiis clericalibus conciliaretur, ac componeretur, initæ sunt pactiões consensione utriusque potestatis, siue ratione certorum criminum, in quibus clerici adhuc iudiciis publicis subijciantur, siue ratione formæ in iudiciis episcopalibus observandæ; præsertim pœnæ inferendæ. Ubi publicæ pactiões non expresse intercesserunt, consuetudines diu receptæ plurimum valent. Ergo hodie res hæc universa aut moribus, aut concordatis regitur, ac pendet.

### TITULUS III.

#### DE CRIMINIBUS

*Direcō contra Deum admissis.*

##### I.

**E**ST in omni criminum genere contra Divinas leges delinquatur, quædam tamen, eademque atrocissima crimina sunt, quibus directo Divina ipsa majestas violatur. Hujus generis sunt spreta Christi religio, hæresis, dæmonis invocatio, blasphemia, spreta vel jurisjurandi, vel voti religio.

##### II.

Spernere dicuntur Christi religionem vel qui idolatriæ serviunt, vel qui judaicam adhuc

huc superstitionem sequuntur; magis autem quicumque post Baptismum susceptum, fidem penitus deserunt, & apostatæ dicuntur, quasi fidei desertores.

### III.

Hæretici dicuntur quotquot præcipua adhuc Christianæ fidei fundamenta retinentes, in aliquibus tamen, vel etiam in uno dogmate ab Ecclesia dissentiunt. Pro dissentiente habetur, etiam qui de dogmate dubitat. Ergo hæresis est denegatus assensus erga fidei dogmata. Dogma fidei tum est, cum certa propositio a Deo revelata est, & tanquam revelata ab Ecclesia proponitur. Revelatio deducitur ex verbo Dei aut scripto, aut tradito. Propositio semper hæretica est, ubi dogmati fidei adversatur. Qui propositionem pronuntiavit dogmati fidei repugnantem, tum demum hæreticus est, cum pronunciaverit sciens prudens, eam Ecclesiæ definitionibus adversari. Hæreticorum alii sunt manifesti, alii occulti, seu qui exterius quidem fidem profitentur, sed interiore animi affectione non consentiunt. Qui exterius fidei adversatur, extra Ecclesiam semetipsum dejicit: qui exterius fidem profiteretur, mente non consentit, adhuc in Ecclesia est, quamquam pro membro Ecclesiæ mortuo sit habendus.

Hæreticis prope accedunt Schismatici, isti sunt, qui non fide, sed obedientia tenus, se ab Ecclesia dividunt, idest profiterentur, se Prælati Ecclesiæ obtemperare ullo modo nolle. Prope, inquam, accedunt hæreticis; etenim hæresis etiam rei essent, si putarent, Ecclesiam dividi posse.

## I V.

Atrox quoque flagitium illorum est, qui ad dæmones convertuntur, eorundemque opem petunt. Hujus generis sunt arioli, auspices, aruspices, magi, sortilegi, & alii hujus generis.

## V.

Blasphæmi dicuntur, quotquot aut Deo, aut Christo, aut redemptionis nostræ mysteriis, veluti cruci, ac sacramentis, aut etiam Deiparæ, aut Beatis ceteris maledicunt, vel conviciantur. Si in maledicto, aut convicio quidquam pronuncietur, quod dogmati fidei adversetur, tunc blasphemia dicitur hæreticalis.

## V I.

Denique Divinam majestatem directo lædunt aut jurisjurandi, aut voti violatores. Jusjurandum est invocatio Divini nominis, quasi in testimonium veritatis illius rei, quam quisque adfirmet, aut neget. Divinum no-

men

men invocari dicitur, non solum si expresse id fiat, & specialiter, sed etiam si fiat per invocationem Divinorum symbolorum, veluti si quis juret per cœlum, per crucem, per evangelia, & similia. Qui falsum jurat, perjurus dicitur, & perjurii crimen admittere. Cavendum in jurejurando est, nequis temere, idest sine gravi causâ juret. Jusjurandum duplex a Pragmaticis recensetur, assertorium, & promissorium. Assertorium versatur in re aut secuta, aut præsentē. Promissorium est, cum quis jurat, se quidquam facturum, vel daturum. In assertorio statim perjurium incurritur, si falsum est, quod jurejurando firmatum fuit. In promissorio perjurium incurritur, aut statim, si quis jurat, sine animo implendi promissum, aut postea, si quis non impleat, quod spondit. In promissorio specialiter cavendum est, ne id promittatur, quod bonis moribus, aut legibus repugnet: irrita enim sunt hujus generis juramenta eodem modo, quo irritæ sunt rerum turpium, aut damnatarum promissiones.

#### VII.

Votum est promissio facta Deo rei alicujus honestioris æque ac utilioris, ad quam ceteroqui præstandam nec lege, nec singulari præcepto quis obligatur. Reddenda esse  
 Altissimo



Altissimo vota nostra, ipsæ sacræ literæ clamant, & naturalis ratio abunde docet. Sunt vota quædam, quæ magis solennia in Ecclesia recensentur, quale est votum continentiae, quod quis elicit aut occasione sacræ ordinationis, aut causâ monasticæ professionis. Hinc si quis hæc vota contemnat, atque abjiciat, dicitur apostasiæ crimen incurrere,

## TITULUS IV.

### DE CRIMINIBUS

*Admissis contra res Deo sacras.*

#### I.

**Q**UÆ adversus res Deo sacras crimina admittuntur, ea ad quatuor veluti summa, ac præcipua capita referri possunt, videlicet ad sacrilegium, ad simoniam, ad spreum cultum Sanctorum, atque ad spreum cultum Sacramentorum, aut etiam sacramentalium.

#### II.

Legibus Quiritium sacrilegium dictum est furtum rerum sacrarum: a sacris rebus legendis, seu averrendis ethymologia nominis derivatur. Ergo proprie nisi quis res sacras furto subriperit, sacrilegus non dicitur ratione

ne

ne habita civilium pœnatum, quibus subji-  
ciatur. Ceterum & in ipsis Romanorum le-  
gibus quandoque sacrilegii nomen improprie  
sumebatur, ad concitandum horrorem cujus-  
dam criminis, veluti cum adulteri appellati  
sunt *sacrilegi nuptiarum*. Canonum cultores  
latius extenderunt sacrilegii nomen, ac tra-  
diderunt, quamcumque sacræ rei violationem  
sacrilegium esse. Hinc triplex esse sacrilegii  
genus dixerunt, reale, locale, & personale;  
reale, cum res Deo sacra surriperetur; imo &  
hic addiderunt, sacrilegium esse, siue res sacra  
de loco sacro, siue res sacra de loco non sa-  
cro, siue res non sacra de loco sacro eripe-  
retur; locale, cum injuria inferretur locis sa-  
cris, vel religiosis, ceu immunitatem sacrarum  
ædium, religiosorumve locorum violando;  
denique personale, cum personis Deo sacris,  
aut religiosis injuria inferretur, ceu clericum,  
monachumve cædendo, percutiendo, sancti-  
monialem corrumpendo, & similibus.

De sacrilegio personali extat fami-  
geratus canon *siquis suadente* 29. cau. 17.  
qu. 4., ubi anathemate plectuntur, quicum-  
que adversus clericos, vel monachos impias  
manus intulerint. Exinde clerici dicti sunt  
duplex privilegium habere. Siquidem cum  
jam privilegium fori episcopalis obrinuissent,  
aliud

aliud privilegium habere visi sunt ex eo, quod sanctior haberi cœperit eorum persona, magis magisque ab injuriis communita. Hoc appellaverunt *privilegium canonis*.

### III.

Simonia definitur studiosa voluntas emendi, vendendive res sacras, aut res religiosas, aut res sive sacris, sive religiosis cohærentes. A Simone Mago apostolica olim S. Petri censura damnato, quod Spiritum Sanctum, & dona S. Spiritus emere voluisset, nomen derivatum est. Triplex est causa, cur simoniæ vitium turpissimum sit. Prima est, quod nonnisi impie res sacræ, aut religiosæ, hisve cohærentes, rebus temporalibus sive pretio pendantur. Secunda est, quod qui eas res vendit, putet se posse ita versari in rebus sacris aut religiosis, ac si profana quæque tractaret. Tertia est, quod qui venditurus est res sacras aut religiosas, putet, se dominum esse, quando simplex est curator, ac dispensator, qui ex mandato Dei accepit: *gratis accepistis, gratis date*.

Hinc liquet, simoniæ crimina non esse paria, sed alia aliis graviora. Sunt enim quædam, in quibus triplex simoniæ turpitudine modo commemorata deprehenditur; sunt, in quibus una vel altera turpitudinis causa deest.

Quo

Quo plures sunt turpitudinis causæ, eo gravius crimen esse, facile constat.

Disputant cultores canonum, an quædam sint simoniæ species, quæ tantum jure positivo ecclesiastico improbentur. Nisi tale proponatur factum, quod purum sit omnibus modo commemoratis turpitudinis causis, certe illud omne factum, in quo vel una ex eisdem causis inesse videatur, crimen semper damnatum aut ex ipsa rei natura, aut certe Divinis legibus agnoscetur.

#### IV.

Simonia alia mentalis est, alia realis. Mentalis locum habet, ubi spiritualibus rebus cohærent certa commoda temporalia, & quidem legitime; interea tamen qui spiritualia exercet, ideo exercet, ut temporalia commoda consequatur: veluti si concionator ideo munus suum exequeretur, ut certa stipendia lucretur; si Sacerdos ideo missam celebret, ut eleemosynam nanciscatur, & similia. Cum eleemosyna certa ad vitæ sustentationem sacris ministris jure concedatur, siquod vitium est in sacro ministro, eleemosynam ipsam quasi pretium officii recipiente illud mente concipitur, ad mentis secreto retinetur, ideoque extra pœnam in externo foro hoc vitium est. Simonia realis ea est, quæ  
fit

fit pactionibus rerum alias indebitarum, sive id fiat expresse, sive tacite, veluti cum sacrorum administer moratur de industria sacra ministeria, quousque quidquam a suscipiente recipiat; sive id fiat contracta fiducia, futurum, ut quandoque qui ministrat, certa commoda nanciscatur, veluti cum quis beneficium confert, fide recepta, ut beneficiarius post certum tempus alterius gratia beneficium resignet. Hanc appellant simoniam confidentialem.

## V.

Ex parte rei, quæ venditur, aut emitur, nihil refert, an sint res sacræ, veluti Sacramenta, ac sacramentalia; an sit res religiosa, veluti monastica professio, aut sepultura; an sint res temporales cohærentes sacris, aut religiosis, veluti præbendæ in beneficiis, jura alimentorum in monasteriis. Simon ipse Magus a Petro damnatus non tam emere voluit Spiritum Sanctum, & Divina charismata, quam occasionem, qua inde certa temporalia commoda consequeretur; noverat enim, in Apostolos largas oblationes effundi piorum fidelium charitate occasione Divinorum.

## VI.

Ex parte rei, quæ pretii locum tenet; nihil refert, an spiritualia spiritualibus pensentur;

ferunt; neque enim fieri potest rerum itarum mercatura. Hinc vel ipsa beneficiorum permutatio, quoties non exigatur ad unam Ecclesiarum utilitatem, & fiat temporalis commodi causa, simoniaca est. Item nihil refert, an qui emit pecuniam donet, vel quidquid pretio æstimabile, an obsequio sibi delinatur, concilietque sacrum administrum; an commendationibus potentum, vel amicorum sibi comparet sacra, ac religiosa, vel his cohærentia.

Hoc est, quod veteres Patres agebant, triplicem esse simoniam, aliam a manu, idest ubi pecunia, aliam a lingua, idest ubi commendatio, aliam ab obsequio, idest ubi certum obsequium intercedit, atque his de causis sacra, religiosa, vel his cohærentia impetrantur.

## VII.

Spretus cultus Sanctorum grave crimen est, quod ab eo admittitur, vel qui debitum Sanctis, Sanctorumve reliquiis, aut imaginibus denegat, vel qui Sanctorum invocationem inanem putat, aut prædicat.

## VIII.

Spreus cultus Sacramentorum gravissimum crimen est, quod in iis omnibus casibus admittitur, in quibus in Sacramenta injuria inferitur,

fertur, ut exempla proferam, qui iterum Sacramentum Baptismi, vel Confirmationis, vel Ordinis scientes prudentes conferunt, hæc Sacramenta contemnunt. Qui Eucharistiam non jejunos, non stans in locis, ac temporibus, aut conficit, aut ministrat, aut recipit, de spreto hujus Sacramenti cultu damnatur. Idipsum de ceteris Sacramentis dicendum est. Similiter damnandus est, qui spernit sacramentalia ab Ecclesia instituta exemplo Sacramentorum.

## *TITULUS V.*

### DE CRIMINIBUS SINGULARIBUS CLERICORUM.

#### I.

**S**UÆ sunt singulares leges clericis propositæ, certis etiam pœnis adjectis contra eos, qui non obtemperent. Quippe decuit clericalem vitam ita institui, ut a ceterorum rationibus secernatur. Præcipua clericorum munera sunt, curam habere sacrorum, ministrare Divinis, populum docere, atque ad Divina præparare. Ergo tales leges dicendæ clericis erant, quæ his exequendis muneribus magis congruerent.

#### II.

## II.

Huc refertur primo lex residentię in Ecclesia, cui vi suę ordinationis clerici adscripti sunt. Ubi certis de causis clerici interfit abesse, veniam a Prælato suo impetrare ipse debet: nec aliter in alia Ecclesia recipiendus est, nisi a suo Episcopo commendetur. Has commendatitias epistolas, veteres appellaverunt epistolas *formatas*, ex eo forte, quod nonnisi certa forma, ac ritu eę epistolę exararentur.

## III.

Dirigenda quoque fuerunt clericorum studia, ut scilicet clerici in ea præcipue studia incumberent, quę rerum Divinarum, & ecclesiasticarum doctrinam parerent, non alienis studiis avocarentur. Inter cetera cautum est, ne clerici aut medicam, aut chirurgicam artem profiterentur.

## IV.

Decuit eisdem de causis, avocare clericos a ceteris operosis sæcularibus negotiis, quę mentem a cura sacrorum avertunt. Hinc cautum, ne in judiciis sæcularibus versarentur, ne mercaturę incumberent, ne curatores essent alieni patrimonii. Ne prætextus parandorum alimentorum allegarentur, satis fuit clericis

*Insti. Pars II.* T con-



consultum aut collatione beneficiorum, aut patrimoniorum constitutione.

V.

Etiam in iis, quæ ad recreationem animi faciunt, certus præstitutus est modus. Cumque in Divinis agendis mysteriis certus præstitutus jam ab antiquissima ætate habitus indumentorum fuerit, tum deinde curaverunt Antistites, ut in civili vestitu certus decor servaretur; nimirum clerici universi non quidem sordide, sed modeste incederent, atque ita, uti virum decet prudentem, temperatum, ac sobrium, qui aliis esse exemplo potest. Hinc capillorum attonsis, hinc humilis vestium color, hinc earundem vestium figura ad modestiam composita.

Non potuerunt hæc singula definiri generali lege, & perpetuo duratura. Hinc multum in hac parte tribuitur prudenti Episcoporum arbitrio, qui moderari singula debent pro indole provinciarum, ac temporum qualitate. Cum omnia ad generales modestiæ regulas exigantur, tum satis erit Ecclesiæ canonibus factum.

DE CETERIS CRIMINIBUS UNICUIQUE  
COMMUNIBUS.

## I.

**N**ON omnia persequor hoc in loco crimina, quæ legibus publicis in civili societate damnantur, sed ea tantum, quæ singularem in jure ecclesiastico pœnam constitutam habuerunt. Antiquissimis canonibus, præsertim pœnentialibus, adversus duo præcipue crimina animadvertebatur, in primis injustas, & turpes virorum, & fœminarum conjunctiones, deinde homicidia.

## II.

Præprimis gravissimis pœnitiis publice plectebantur adulteri, velut ii, qui gravem Sacramento conjugii injuriam intulerunt. Et quamquam jure Quiritium adulterium diceretur dumtaxat a nupta committi, Patres tamen Ecclesiæ parem vindictam sumendam de maritis voluerunt, gnari æque a maritis, ac ab uxoribus conjugii fidem adulterio violari; imo addiderunt, gravius esse crimen viri, quod vir exemplo præire uxori debeat. Stuprum etiam obnoxium fuit gravibus pœnitiis, præsertim si admitteretur ab iis, qui voto continentiae sese Deo obstrinxissent.

Abominabilis insuper habitus fuit, & publice damnatus incestus inter cognatos, & affines, quæcumque esset cognatio, sive naturalis, sive civilis, sive spiritalis. Si quandoque concubinatus extra pœnam in Ecclesia fuit, id referendum est ad ea tempora, quibus concubinatus nihil aliud erat, quam verum conjugium ad juris naturalis simplicitatem exactum, omiſſis juris positivi solennitatibus. Ubi concubinatus in abusum degeneravit, & sub concubinatus specie iniri cœperunt pudendæ conjunctiones, tum non sine pœna esse debere statutum est, quod & Patres Tridentini Concilii confirmaverunt.

Concubinatus apud veteres erat distinctus ab incestu, quod concubina nec affinis, nec cognata esse poterat ei, cui jungebatur. Distinctus erat a pellicatu, quod concubina non jungeretur illi, qui jam maritus alterius esset: distinctus erat ab adulterio, quod concubina alteri nupta non esset: denique distinctus erat a stupro, quod in concubinatu data esset fides perpetuæ, & individuæ consuetudinis. At enim quod concubinatus extra legis auxilium esset, multi eo abuti cœperunt. Hinc ejus conjunctionis & justa, & æqua damnatio.

## III.

Veteres pœnitentiales libri in eo consonant omnes, quod diuturna æque ac severa pœnitentia publica adversus homicidas indiceretur. Cum apud Romanos ludi erant instituti, quibus etiam cum vitæ periculo juvenis exercebatur, colluctatione, pancratio, pugillatu, venationibus ferarum in circo, Antistites Ecclesiæ curaverunt apud Christianos Imperatores, ut iidem ludi penitus abolerentur. Cum deinde succedentibus sæculis usus invaluisset singularis certaminis, quod monomachiam, sive duellum appellaverunt, Ecclesia & censuris reos terruit, & pœnitentis damnavit.

## IV.

Postquam frequentiores ex universis diocesis exhiberi cœperunt Romano Pontifici preces, atque inde plura rescripta, privilegia, atque indulta obtineri, non desuerunt qui falsas Pontificias epistolas fingerent, easdemque sui commodi consequendi causa prodicerent, vel simile falsi crimen admitterent. Id falsi crimen debuit gravibus pœnis coerceri, unde plura decreta prodierunt contra falsarum Pontificis Maximi epistolarum editores. Falsi crimen in hac re bifariam admitti dicitur; nimirum vel falsas literas cu-

T 3

dendo

dendo, vel veras quidem literas obtinendo, sed aut enarrata falsitate, aut reticita veritate, quando alias Pontifex Maximus, si veritatem novisset, non fuisset rescripturus. Ubi falsitas narrata fuerit, rescriptum obreptitium dicitur, ubi veritas reticita, subreptitium: utrumque sane nullius roboris, cum voluntate Pontificis sit destitutum.

Si jam olim contra editores falsarum epistolarum graves poenae constitutae fuissent, aut certae adhibitae cautiones, quibus germana monumenta ab apocryphis secernerentur, nec impune impostores prodidissent tot falsa decretalium monumenta, quot prodita novimus, uti in priore parte traditum est, nec intueremur recentioribus saeculis adeo deturpam fuisse ecclesiasticam disciplinam, quemadmodum deturpari potuit ex falsis monumentis, quae ex errore minus accurata, minusve prudens, atque erudita aetas recepit.

#### V.

Adversus latrones publicos multi etiam antiqui poenitentiales codices certas poenas statuerunt. Sed nec fures occulti sine certa poena fuerunt. Olim in monasteriis, & subinde in collegiis clericorum si furto subrepta res quaedam esset, & persona furis ignoraretur, omnes de monasterio, vel collegio susce-  
ptione

ptione sacræ Eucharistiæ se se purgabant , suamque innocentiam præsentē Numine testabantur . Recentioribus sæculis etiam ob furtum in civitate , vel in oppido admis- sum , si persona furis ignoretur , nec modis judiciariis probari crimen , aut detegi reus possit , receptum est , ut monitoria publica edantur auctoritate Prælatorum . Hæc moni- toria sunt edicta publica , quibus monetur quicumque furatus est , vel quicumque res furtivas detinet , ut res ipsas domino resti- tuat ; si non restituerit , sententiam excommu- nicationis incurrat . Sæpe etiam monentur qui- cumque aut furis notitiam habeant , aut con- scii sint rerum furtivarum , ut quod noverint Ecclesiæ pandant , sub eadem excommunica- tionis pœna . Quando in his monitoriis , de excommunicatione agitur , certum est , ea- dem non esse edenda , nisi sobrie , & magnâ cum circumspectione .

#### V I.

Crimini furti , & rerum quocumque modo subreptarum proxime accedit crimen usuræ . Definitur usura *accessio sortis debitæ ex causâ temporis* . Ergo quicumque creditor exigit a suo debitore plusquam sorte continetur , id- que ex sola temporis mora , is usurarius est . Nihil plane refert , de quonam debiti genere

T 4

agatur,

agatur, five ex contractu, five ex alia causa proficiscatur. Quod præcipue in discussione hujus criminis spectatur, est, utrum sola causa temporis exigatur quidquam sorte amplius: nam si aliæ causæ subessent, & quidem justæ, sine usuræ vitio quidquam amplius præter sortem exigatur.

-Aliæ causæ, & quidem justæ recensentur, primo lucrum cessans, veluti cum quis causa mutui dandi rem fructiferam vendat, & pretium rei fructiferæ mutuo donet, tunc enim petere a mutuatario poterit, fructuum, quos amittit, pensionem. Secundo damnum emergens, veluti cum quis mutuo tradit pecuniam, quam erat in fundum fructiferum impensurus. Tertio periculum pecuniæ, quod creditor in se suscipiat, quemadmodum contingit in pecunia trajectitia, seu nautico scenore.

## VII.

Quidquid in contrarium adlaboraverint recentiores non pauci, præsertim ex hæreticis, certum est, Sanctos Ecclesiæ Patres deestatos fuisse usuras, tanquam crimen valde reipublicæ perniciosum. Patrum sententiam & Conciliorum canones, & decreta Maximorum Pontificum confirmaverunt. Ipsi etiam Philosophi in usuris magnam reipublicæ perniciem

niciem agnoverunt. Ex his omnibus causis etiam suis legibus Principes usurarium crimen certis poenis persecuti sunt.

### VIII.

Ingeniosa fuerunt avarorum hominum studia, quibus si non reipsa, saltem specie tenus viderentur usuram non admittere, certos contractus ineundo, certis etiam adjectis pactationibus, quibus aliquid amplius supra sortem exigere prætextu aliarum causarum, quando nonnisi causam temporis haberent. Hæc usurarum pallia sæpe ac sæpius opportunum fuit expressa lege damnari. Sæculo Ecclesiæ decimoquinto magnæ concitatae fuerunt disputationes de certa contractus specie, quam *censum* appellaverunt. Ita contrahi coëptum est, ut quis certa data pecuniæ quantitate emeret sibi annuam pensionem a debitore solvendam super fructibus alicujus prædii debitoris, donec debitor pecuniam restitueret. Postquam Martinus V., alique subsequentes Pontifices decretis suis intercesserunt, tandem Pius V. anno 1564. famigerata sua constitutione contractum illum ab usuræ nota exemptum declaravit, dummodo certæ conditiones servarentur. Præcipuæ conditiones sunt, ut pecunia tempore contractus tota bona fide numeretur: ut nunquam liceat creditori



ditori pecuniam ab invito debitore repetere, liceat autem quocumque tempore debitori pecuniam luere creditori etiam invito: ut census imponatur super re immobili, & fructifera, qua pereunte omnis obligatio cesser. Contractus ita celebratus *census consignativus* hodie appellatur, ut distingnatur ab aliis censuum speciebus, quos passim invenire consuevit hominum novas contractuum formas quærentium industria.

## TITULUS VII.

*De modis, quibus rei criminum in Ecclesia  
coërcentur, & primum generatim.*

### I.

**T**RES generales modi sunt, quibus Ecclesia in reos criminum animadvertit, videlicet poenitentia, censura, & poena. In his exercendis Ecclesia non tam crimen considerat, quam rei adfectiones. In consideratione criminis, maxime expedit, ut levioribus remediis adversus leviora, gravioribus adversus graviora crimina prospiciatur. Cum considerantur reorum adfectiones, atrocius, & durius agitur adversus contumaces, eove etiam magis, si vix super sit poenitentiae, atque emendationis spes; lenius agitur cum  
iis,

iis, qui de admisso crimine dolent, & vitæ emendationem pollicentur.

Hinc Ecclesia dicitur esse loco piæ matris erga fideles quasi filios, quorum curam suscipit, sollicita, ut bonis moribus sint ornati; si deliquerint, ut emendentur, castigatione quadam reddantur attentiores in posterum; si pugnaces extiterint, ut terreantur; si denique desperata res sit, ut abjiciantur, ne totus fidelium cœtus pravis exemplis facile corrumpatur.

Ordo iste coërcendorum reorum est Ecclesiæ singularis: siquidem Ecclesia hoc proprium habet, ut non solum curam gerat universitatis, sed etiam singulorum, quorum animas unasquasque dirigere debet ad Deum, cui in hac vita serviatur, & perpetuo post hanc vitam ex Dei clementia adhæreatur.

## II.

Prior coërcendorum reorum gradus est pœnitentia, cui quis subicitur, cum eandem devoto, demissoque animo ab Ecclesia petat. Equidem remittitur apud Deum quodcumque crimen, quotiescumque vere, & ex animo peccator de crimine doleat, & veniam a Summo Numine imploret. Patet ad obtinendam peccatorum remissionem Sacramentum Pœnitentiæ a Christo institutum, quod per

per Ecclesiæ administros Sacerdotes dispensatur. Verum adhuc manent in animo peccatorum reliquiæ, idest praviæ affectiones, quibus quodammodo peccator ægrotat, quæ sane nonnisi summo labore delentur; eamque ob rem Pœnitentia a Sanctis Patribus laboriosus Baptismus dicta est.

### III.

Alter reorum coërcendorum modus est censura. Hic adhibetur ab Ecclesia in gravioribus delictis, ubi reus contumax sit, non quidem ut reus puniatur, sed ut terreatur, & metu pœnarum eo adducatur, quo veniam supplex, & demisso animo ab Ecclesia imploret. Ergo ubi contumacia est, & quousque contumacia perseverat, sententia Ecclesiæ, qua reus terretur, censura est. Si reus inde concutiat, censuram Ecclesia revocat, & confugientem reum pœnitentia expiat, & opportuno tempore ad reconciliationem admittit. Etiam si reus devoto animo ad Ecclesiam confugiens a censura necdum fuerit absolutus certis de causis, quia scilicet Ecclesia velit magis magisque explorare demissionem, & ceteras adfectiones rei; tunc censura quodammodo desinit esse censura, & vim quandam habere incipit pœnitentiæ indictæ, adeo ut cum reus deinde a censura absol-

absolvitur, tum illius initæ pœnitentiæ ratio habeatur.

#### IV.

Postremus reorum coërcendorum modus est pœna. Hic adhibetur ab Ecclesia in criminibus, quotiescumque reus adeo pugnax est in crimine, ut quamcumque emendationis spem Ecclesia, quoad per homines conjicere licet, abjecerit. Finis ergo pœnæ indicendæ non est rei emendatio, ac correctio, uti contingit in pœnitentia, ac censura; sed est cura totius universitatis fidelium, qui magis averruntur a similibus perpetrandis criminibus formidine pœnarum, quibus etiam prospicitur ejectione rei criminis, ne contagione corrumpantur.

#### V.

Memorati tres coërcendorum criminum modi certum ordinem habent. Scilicet ita tribui ex prudentia debent, ut nunquam ad secundum, idest ad censuras procedatur, nisi quo casu primo modo non sit locus, nunquam procedatur ad tertium, idest ad pœnas, nisi quo casu aut primo, aut secundo modo prospici nequeat. Quid enim, si reus statim pœnitens ad Ecclesiam accedat, crimen fateatur, veniam imploret, & satisfacere sponte velit? Tum supervacanea est censurarum

rarum indictio. Juvat insuper superfedere a pœnis, quod totidem bonis exemplis fidelium societas ex pœnitentis operibus instrui possit, quot dudum detrimenta passa fuerat. Quid si spes bona affulgeat emendatum iri criminum reos, si solæ censuræ inferantur, & a pœnis abstinenceatur? Nonne tunc juvât pœnas suspendere, & solis censuris reum concutere ad bonum ipsius rei, imo & ad majorem Ecclesiæ utilitatem?

Sunt istæ, ceu regulæ generales, a quibus tamen veluti probata quadam exceptione receditur duobus in casibus. Primus casus est, cum de certis criminibus agatur vere atrocissimis, in quibus expedire videatur, ut nulla ejus ordinis ratio servetur, & statim deveniatur aut ad censuras, aut ad pœnas. Nihilominus tamen in hac specie si reus pœnitentia motus statim veniam imploret, facilem adhuc se Ecclesia præbet pro pœnitentis affectionibus. Alter casus est, cum pœna non tam infertur ad coërcitionem rei, quam ad consulendum decori sacrorum; tum enim quæcumque sint rei adfectiones, statim ad pœnam devenitur. Ut exemplum proferam: pœna homicidii est, qua clericus homicida a sacrorum ministerio arceatur. Hac pœna non solum eo tenditur, ut reus damnetur,

tur, sed etiam eo, ut honor habeatur sacris, quorum administri debent esse impolluti. Hac in specie quæcumque sit rei pœnitentia, nihilominus pœna irregularitatis locum habet.

#### V I.

Cum remittitur pœnitentia, hæc remissio dicitur indulgentia, relaxatio, absolutio; cum remittitur censura, hæc remissio æque dicitur relaxatio, aut absolutio; cum vero remittitur pœna, proprie dicitur dispensatio, seu restitutio.

Quandoque etiam rei a pœna absolventur, seu pœna reis indicta relaxatur sine dispensatione, ea nimirum in specie, quæ pœna continet in se etiam censuram, & censuræ effectus. Id contingit in pœna anathematis. Anathema etiam in se continet excommunicationem, & effectus excommunicationis, quæ censura est. Ubi reus anathematizatus simplex ad Ecclesiam accedit, adhuc videtur excommunicationis censura ligari, ideoque rite ab excommunicatione absolvitur.

#### V I I.

Rei criminum proprie dicuntur pœnitentiis expiari, censuris coërceri, pœnis puniri. Siquidem pœnitentiarum finis expiatio est admissi criminis, finis censurarum est concussio rei, & coërcitio, ne in deteriora ruat, finis pœnarum est rei damnatio. *TIT.*

## TITULUS VIII.

## DE PŒNITENTIIS

*Quibus rei criminum expiantur.*

## I.

**A**mplius heic non loquor de Sacramento Pœnitentiæ, aut de satisfactione pœnitentis, quam exhibere debet occasione Sacramenti. De his actum superius fuit in libro 4. tit. 5. Loquor de pœnitentiarum indictione, quæ publice fit in foro externo ad expiationem reorum, qui ob crimina publice admissa & Deo, & Ecclesiæ satisfacere debent. Hujus generis pœnitentiæ vel communes sunt, vel singulares. Communes sunt, quæ ab omnibus ex lege Ecclesiæ suscipiuntur ob peccata populi, qualia sunt jejunia, aut supplicationes, aut cetera pietatis opera, certis statis anni diebus, ceu quadragesimæ, adventus, aliisque. Singulares sunt, quæ ex præcepto Prælati indicuntur singularibus personis ob singularia admissa crimina. De his singularibus pœnitiis hoc in titulo agitur.

## II.

Pœnitentia publica nonnisi ob crimen publicum indicitur. Non indicitur autem nisi volenti, consentienti, & demisso animo postulanti;

lanti; quamquam reus eam velle, in eam consentire, & eam demisso animo petere debeat, si velit Ecclesiæ reconciliari; quoniam satisfactio in genere suo Divinis legibus præscripta est, in specie autem ab Ecclesia pro criminum qualitate mandatur. Qui pœnitentiæ sese non subicit, impiorum numero habetur, & potest censuris terreri, ut pœnitentiam postulet, imo etiam pœnis, si gravior sit pertinacia.

### III.

Et si unicuique liberum sit sese sponte subicere pœnitentiæ publicæ; a nemine tamen pœnitentia publica indici potest, nisi ab eo, qui jurisdictionem ecclesiasticam habeat in foro externo; quamquam qui pœnitentiam exequitur, etiam in foro interno satisfaciatur, cum animum peccatorum reliquiis expiet.

### IV.

Olim erant tertæ pœnitentium stationes, per quas veluti per gradus ad reconciliationem deveniebatur, scilicet lugentium, sive flentium, inde audientium, post hoc substrorum, denique consistentium. De his jam egi in lib. 4. tit. 5. num. 11. Erant etiam ediri quidam codices pœnitentiales, qui pro qualitate criminum definiebant numerum annorum, quibus esset in eisdem stationibus

*Instit. Pars II.* V COR-



consistendum. Hodie ratio, quantitas, & qualitas publicæ pœnitentiæ tota pendet ex arbitrio Prælati.

# V.

Pœnitentium publicorum reconciliatio etiam spectat, & semper spectavit ad eos, qui jurisdictione in foro externo gaudent. Hæc reconciliatio olim fiebat per manus impositionem. Hodie satis est pœnitentiam impostam implevisse, ut quisque reconciliatus intelligatur. Species reconciliationis olim erat indulgentiarum concessio. Indulgentiæ erant dispensationes quædam pœnitentiæ publicæ, quibus nimirum pœnitentibus applicabantur per ecclesiasticam potestatem merita Christi, & Sanctorum; atque hac applicatione ita habebantur pœnitentes, ac si facto proprio satisfecissent. Hæc satisfactio in foro etiam interno proderat, quoties pœnitentes ea præditi essent affectione, ut perfectæ charitatis vinculo, quoad fieri per eos posset, Deo jungerentur. Hodie hæc indulgentiarum conferendarum potestas etiam exercetur, licet publicarum pœnitentiarum rationes, ac pœnitentium stationes fere exoleverint. Indulgentiæ adhuc conferuntur ab iis, qui jurisdictione in foro externo pollent: profunt etiam in foro interno gratia illorum, qui, quoad valent, curant,

ut

ut peccatorum reliquias auferant: eamque ob rem ut plurimum dum indulgentiæ conceduntur, ceterorum piorum operum executio mandatur. Indulgentiarum aliæ plenariæ sunt, aliæ ad tempus: plenariis tota pœnitentia remittitur, ceteris nonnisi pars quædam. Plenariarum indulgentiarum concessio hodie Pontifici Maximo reservatur. Species indulgentiæ plenariæ est jubilæum, quod singulis viginti quinque annis a Pontifice Maximo concedi solet. Episcopis relictum est, ut quadraginta dierum indulgentias ordinario jure concedant; certis tamen temporibus datum est, ut etiam plenarias impertiantur.

Hodie cum dicitur concedi indulgentias quadraginta, vel centum dierum, item septem annorum, & similes, intelligimus quoddam adhuc servari vestigium veteris disciplinæ, juxta quam certa erant definita tempora pro delictorum qualitate, intra quæ pœnitentes publici stationes suas absolvere debebant. Ergo hodie qui quadraginta, vel centum dierum, qui septem annorum indulgentiam obtinent, habentur ac si per quadraginta, vel centum dies, aut per septem annos pœnitentiam publicam juxta veterem Ecclesiæ disciplinam exegissent.

# TITULUS IX.

## DE CENSURIS,

*Quibus rei criminum coërcentur.*

### I.

**E**RANT in Romanâ republica instituta censorum officia, eademque distincta ab officiis magistratuum. Quippe magistratus merum imperium exercebant in reos criminum legibus damnatorum: si quidquam contra bonos mores agebatur apud cives, quod esset extra poenam legum, alias autem id emendari, corrigive oporteret, hoc negotium censoribus commendabatur. Inde factum est, ut cum in Ecclesia crimen aliquod certæ poenæ non subjaceret, sed emendatione indigeret, modus emendandi appellaretur censura, cujus nomine intelligimus Ecclesiæ sententiam contra reum criminis latam, qua reo eidem interea omnium, vel quorundam christianæ communionis jurium exercitio, vel usu interdicitur, ut terreatur, ac concitetur, spe concepta futurum, ut resipiscat, veniam postulet, & delictum emendet.

### II.

Cum dixi, censuram esse sententiam Ecclesiæ, indicare volui, nihil referre, an censura

fura feratur ab Ecclesia generali lege, an a Prælato singulari præcepto, an abs judice caussa cognita. Cum generalis lex censuram indicit, tunc censura dicitur abs jure lata; cum censura indicitur præcepto Prælati, vel judicis sententia, tunc censura dicitur lata ab homine. Lege, vel præcepto indicitur censura etiam ante crimen admissum, quam is incurrat, cum crimen admiserit: sententia judicis nunquam censura indicitur, nisi crimen admissum sit, & contradicto judicio comprobatum.

Duplici modo censura indicitur, lege, vel præcepto; primum ut statim, & ipso jure incurratur ab eo, qui legi, vel præcepto non paret; deinde ut non statim ex delicto incurratur, sed mandetur judici, ut secuto delicto censuram dicat adversus reum. In priore specie censura dicitur latæ sententiæ, in posteriore specie dicitur ferendæ sententiæ.

### III.

Contra reum criminis censura fertur; ergo qui nullum crimen admisit; nec doli capax est, non potest ulla censura notari. Porro crimen debet esse grave, & censuræ qualitati respondens; item debet esse manifestum; siquidem contra crimina occulta ecclesiastica fori externi potestas non progreditur.

Effectus censuræ demonstravi, quando asserui, ex censura reo interea interdici vel omnium, vel quorundam christianæ communionis jurium exercitatione. Hinc deducitur, primo, censuram in re spirituali versari, qualis est christiana communio. Secundo, censuram duplicis generis esse, unam totalem, quæ omnibus privat christianæ communionis juribus, alteram partialem, quæ tantum privat parte eorundem jurium; tertio jure optimo apud veteres censuras omnes appellatas fuisse nomine excommunicationis; quid enim aliud hoc nomen significat, quam denegatam communionem?

Equidem inde factum est, veteres plures canones obscuritatem quandam induxisse; cum enim nomine excommunicationis censuræ omnes venirent; alias autem variæ essent censurarum species; nonnisi magno labore hodie dijudicari potest, quæ & qualis excommunicationis species certis præcis canonibus dicta fuerit. Hoc judicium fieri a viris eruditis potest in conspectu contextus eorundem canonum, ex quo intelligi adhuc potest, qualis fuisset veterum Antistitum sententia. Aucta etiam fuit difficultas ex eo, quod non semel excommunicationis nomen usur-

usurpatum fuerit ad significandam ejectionem delinquentium in stationes, & gradus poenitentium; quia isti demisse patiebantur, se certa communionis christianæ specie privari: sed iterum heic studiis suis intercedere possunt viri eruditi, ut germanam canonum interpretationem consequantur.

Igitur tot sunt censurarum partialium species, quot sunt species christianæ communionis. Communio vel clerica est, vel laica. Communionis clericæ species tot sunt, quot gradus clericorum: communionis laicæ species tot sunt, quot laicorum stationes. Inde fit, ut censura notetur Episcopus, cum communione episcopali, Presbyter, cum presbyterali, Diaconus, cum diaconali, ceteri clerici, cum communione suo ordini competente interdiciantur. Sic etiam laici censuram notantur, cum statione sua interdiciantur.

In eo etiam censuræ effectus designatur, cum dicitur *interea interdici*; neque enim censuræ effectus perpetuus est, sed tamdiu durat, quamdiu censura notatus contumax, pertinaxque moratur. Spes conversionis causam censuris omnibus præbet. Item designatur singularis censuræ effectus, cum dicitur interdici *exercitatione* jurium christianæ communionis; neque enim censura notatus ipso

christianæ communionis jure privatur, sed tantum prohibetur, ne jus communionis exerceat, exemplo illius, qui relegatione, seu exilio in civili republica plectatur: quippe hic jura civitatis non amittit; facto tamen habetur, ac si civis non esset, suspensis omnibus civium officiis.

# V.

Recentior ætas majoris perspicuitatis causa tres censurarum species distinxit, videlicet excommunicationem, suspensionem, & interdictum. Excommunicationem specialiter dixerunt, qua quis interdicatur, ne christianæ generalis communionis jura exerceat. Si in totum quis christianæ communionis juri-  
bus interdicatur, majorem excommunicationem appellaverunt. Si tantum quis interd-  
catur a Sacramentorum participatione, & ne eligi ad beneficia possit, appellaverunt ex-  
communicationem minorem. Suspendio cleri-  
corum propria est, nimirum ex ea clerici  
interdicuntur ab iis, quæ clericam commu-  
nionem constituunt. Et quando communio  
clerica tribus constat, ordinis ministerio, of-  
ficio, & beneficio, suspensio partialis esse  
potest, si uno, aut altero ex iis tribus inte-  
rea clericum arceat. Si ab omnibus cleri-  
cum amoveat, suspensio totalis est. Interdi-  
ctum

Etum dicitur censura, qua dispensatio Sacramentorum, celebratio publica Divinorum officiorum, & usus sepulturæ ecclesiasticæ interdicitur. Hæc censura quandoque personalis est, quæ in certas tantum personas, quandoque localis, quæ ratione certorum locorum; quandoque mixta, quæ ratione certarum personarum, & certorum locorum indicitur. Item modo generalis est, omnes personas complectens de civitate, vel de provincia, aut omnes Ecclesias de civitate, vel provincia; modo particularis in certas personas, vel in certa tantum loca sacra concepta.

In interdicto multæ olim controversiæ concitatae fuerunt, ut inquireretur, quænam sacra fieri possent, & quæ Sacramenta administrari; præsertim ubi in certa loca interdictum conceptum esset. Has controversias decreto suo definivit Bonifacius VIII. in cap. *alma Mater* de sent. excom. in 6., neque enim rebus omnibus sacris, officiisque interdicitur hujus censuræ indictione.

## VI.

Finis censurarum est concussio rei, & concitatio, ut territus aversione jurium christianæ communionis tandem resipiscat, veniam postulet, ac delictum emendet. Si reus minime



nime terreatur, & perversa in censura consistat, tunc Ecclesia ad ulteriora progreditur, videlicet post minorem censuram, infligit majorem: si nec major sufficiat, tunc ad poenas progreditur.

Qui per annum in excommunicatione majore contumax perseverat, nec veniam postulat, is dicitur in excommunicatione infordeſcens, atque ex canonum ſententia hæreticis æquiparatur.

### VII.

Cum censura notatus veniam ab Ecclesia postulat, tum absolvitur a censura, impositis certis poenitentibus, quandoque etiam certis ſatisfaciendi oneribus, cum de illata injuria agitur, niſi ante abſolutionem & poenitentiam egerit, & ſatisfecerit. Sæpe abſolutio conceditur, ſub conditione, ut ajunt, reincidentiæ; quod contingit, ſi onus ſatisfaciendi imponatur tempore abſolutionis; tunc enim ita reus absolvitur, ut iterum incidat in censuram, ſi onus impositum non impleverit.

### VIII.

Abſolutio in foro externo conceſſa, etiam afficit forum internum, eodem modo, quo ipſa cenſuræ indiſtio. Non e converſo abſolutio tantum in foro interno conceſſa etiam ad forum

rum externum prærogatur. In foro interno a censuris absolvunt quicumque possunt a peccatis absolvere, nisi absolutio sit reservata: in foro externo absolvunt, qui jurisdictioni in foro externo præsumt; qua etiam in specie notandum est, censurarum quarundam absolutiones Prælati superioribus reservari.

Hinc alia censurarum partitio designatur, quarum quædam reservatæ sunt, quædam non reservatæ. Ex reservatis quædam sunt reservatæ Episcopis, quædam Patriarchis, quædam Pontifici Maximo.

Ubi mortis periculum urget, omnis cessat reservatio, & quicumque Sacerdos a censura absolvit, imposito tamen onere absolutis, ut cum periculum evaserint, tum se sustinent penes eum, cui est absolutio reservata.

#### IX.

Quandoque fiunt absolutiones ad cautelam, quando scilicet disceptatur, an censura iuste lata fuerit. Finge quemquam iudicio Episcopi fuisse excommunicatum, & a sententia Episcopi Metropolitanum appellavisse: hac in specie Metropolitanus appellantem ad cautelam absolveret, conditione recepta, ut veniam inde ab Episcopo petat, cum adpareat, iustam fuisse Episcopi sententiam.

Ideo

Ideo absolutione in hac specie opus est, quia sententia censuræ lata minime suspenditur appellatione: siquidem in censuris sententia ipsa statim executionem habet, imo executio a sententia minime distinguitur.

## X.

Quicumque in certa diœcesi censura notatus est, eadem censurâ notatus est respectu Ecclesiæ universæ. Oritur id ex ipsa censurarum indole, quia in istis versatur ratio christianæ denegatæ communionis: christiana autem communio individua est in tota Ecclesia, ubique eadem, ubique una, eodem jure, quo ubique eadem, ubique una est Ecclesia universa.

## XI.

Ex eodem constantissimo principio profluit, neminem posse censura notari, nisi qui gaudeat jure communionis christianæ, nec posse quemquam certa censuræ specie coërceri, nisi ea communionis christianæ specie potiat, quæ censuræ illius qualitati respondet. Ergo Judæi, ac Pagani censura notari non possunt. Ergo laici homines suspensionis censuræ minime subjiciuntur. Universitates, collegia, corpora iis censurarum generibus subjacent, quibus privari eadem possunt certo jure sibi competente, ceu jure eligendi, & similibus.

TIT.

TITULUS X.  
DE PŒNIS,

*Quibus rei criminum puniuntur.*

I.

**S**UPREMUS coërcendorum reorum gradus est poëna: hæc etiam in invitos proferatur: tum demum autem dicitur, cum nec poënitentiis sese rei subjiciunt, nec censuræ terror satis reos concutit, nisi de iis poënis agatur, quarum indictione non tam fit, ut rei damnentur, quam fit, ut Divinarum, sacrarumque rerum decori prospiciatur, quemadmodum superius observandum fuit titulo 7. num. 5.

II.

Hinc liquet, quid dicendum sit de certis poënarum generibus, quas apud veteres in more fuisse constat. Sæpe in scholis clericorum, atque in Ecclesiis pueruli rei delictorum flagellis ex sententia Episcopi coërcerantur. Hæc plane erat poënitentiæ potius cujusdam species: ad summum non egrediebatur fines aut familiaris parentum in liberos, aut scholasticæ præceptorum in adolescentes disciplinæ. Idipsum dicendum est de simili poëna, quam in monachos ferebant Ab-  
bates

bates in cœnobiis. Idipsum dicendum est de altera poenæ specie, qua cuiuspiam reo criminis indicebatur, ut ad certa loca sacra, seu ad insignes basilicas, aut majores Ecclesias sese conferret, & piam peregrinationem susciperet. Quibusdam in canonibus exilium dicebatur; ceterum erat certus poenitentiae modus. Præterea in monasteriis, & in ædibus episcopalibus ad cathedrales Ecclesias erectis, erant quædam loca, quæ modo *diacônica*, modo *cathecumata* apud veteres dicebantur, secreta a ceterorum qua monachorum, qua canonicorum stationibus, in quæ rei criminum velut a ceterorum consortio segregati amandabantur ad certum tempus. Et quidem id non excedebat poenitentiae fines. Certum est succedentibus sæculis inde originem habuisse carceres episcopales, quibus nunc Episcopi sunt, cum ampliorem jurisdictionem explicaverunt, modo ad custodiam, modo ad poenam reorum. Denique sæpe contigit media Ecclesiæ ætate, ut rei quorundam graviorum criminum ad monasteria mitterentur, in quibus aut ad certum tempus, aut perpetuo vitam agerent inter varias poenitentium exercitationes. In quibusdam canonibus hæc appellabatur improprie deportatio: ceterum fines veræ poenitentiae

rentiæ non excedebat. Huic simile erat, quod dicebatur de monachis, vel sanctimonialibus criminum reis, cum de uno monasterio in aliud monasterium asperioris regulæ causa agendæ pœnitentiæ etiam perpetuæ transferrentur.

### III.

Quæ propriæ pœnæ & semper in Ecclesia fuerunt, & hodie manent, ad has reducuntur. Videlicet anathema, depositio, irregularitates veram & germanam habent pœnarum indolem in Ecclesia. Anathema commune est omnibus, depositio est propria clericorum, irregularitas & clericis æque, & laicis universis indicitur.

Cum Ecclesia has pœnas indixerit, nihilominus tamen reus criminis pertinax est, & Ecclesiam turbat, nihil aliud Ecclesiæ superest, quam ut Principum, & publicorum magistratum potestatem roget, ut reus puniatur, quemadmodum ait Summus Pontifex in cap. 10. de judiciis.

### IV.

Anathema est pœna præ omnibus atrocissima, & in Ecclesia summa. Eam ob rem appellatur excommunicatio mortalis, ut distinguatur a censura excommunicationis, quæ medicinalis appellatur. Anathema excommu-  
nicatio

nicatio est ad interitum; censura excommunicationis est excommunicatio ad emendationem, atque ad salutem. Tum ergo ad anathema devenitur, cum omnia vincula dissolvuntur, cum reus adeo pervicax est, ut nulla spes esse emendationis videatur. Indicitur anathema in hæreticos universos, & in eos, qui claves Ecclesiæ omnino contemnunt, & sunt in excommunicationis censura pervicaces, quales dicuntur qui per annum in ea censura sine mœrore constiterunt, ac propterea dicuntur infordefcentes in excommunicatione. Itaque anathema est separatio rei alicujus gravissimi criminis a corpore Ecclesiæ. Dico separationem; neque enim tantum ab exercitatione jurium christianæ communionis reus suspenditur, sed omnino eisdem juribus universis privatur, non secus ac qui in jure civili deportationis sententiam ferebat, dicebatur jura omnia civitatis prorsus amisisse.

Hanc ob rem anathematizati, si deinde ad Ecclesiam demisso animo revertantur, recipiuntur quidem, & reconcilianur Ecclesiæ absolutione criminum, & censurarum, quæ anathemati insunt; verum ut quædam jura semel amissa recuperent, non absolutio sufficit, sed dispensatione, & restitutione opus habent. Sic qui juspatronatus habebat, si  
post

post anathema ad Ecclesiam convertatur, non sola absolutione censurarum, & criminum juspatronatus semel amissum recuperat. Si iterum juspatronatus obtinere velit, restitutione indiget, & nova concessione. Id ipsum dicas de clerico anathematizato, & deinde converso, si beneficium ecclesiasticum habuisset.

# V.

Depositio est pœna, quæ adversus clericos, cujuscumque gradus sint, graviorum criminum reos indicitur. Definitor ejectio de ecclesiastico gradu; atque ob hanc rem etiam degradatio appellatur. Ita differt depositio a suspensionis censura, quemadmodum differt anathema a censura excommunicationis. Videlicet clericus depositus omnino privatur juribus suo gradui, & ordini competentibus: suspensus autem tantum privatur exercitatione eorundem jurium, & usu, donec a censura absolvatur. Ceterum suspensionis exemplo etiam depositio vel gravior, vel levior est. Siquidem depositio modo totalis est, qua clericus omnino cadit a clero, & in stationem laicorum redigitur, amittit officia quæcumque, præcipue sacri ordinis, item beneficia, quæ possidebat: modo partialis est, quando clericus deponitur a majore tantum

*Instit. Pars II.* X *ordine*



ordine ita, ut in minorem clericorum ordinem transferatur, veluti si Episcopus inter presbyteros, vel diaconos dejiciatur; aut quando clericus deponitur ab ordine, & ministerio, retento tamen beneficio ecclesiastico, quod possidebat. Depositio majorum clericorum olim in Conciliis fiebat, præsertim provincialibus. Recentioribus sæculis depositio Episcoporum reservata est Pontifici Maximo. Ubi de ceteris clericis agatur, certæ solennitates præstitutæ sunt, quibus tandem forma præbita est in Tridentino Concilio. Depositionis causæ quædam sunt canonibus expresse definitæ, quædam arbitrio judicis relinquuntur. Nulla tamen est depositio, quam quisque incurrat juris potestate, semper a facto hominis pender.

#### VI.

Duæ jamdiu agnoscuntur depositionis species: aliam depositionem verbalem vocant, aliam formalem, sive solennem, & hæc proprie degradatio in specie dicitur. Verbalis depositio tantum fit pronuntiatione sententiæ. In depositione formali plures intercedunt solennitates in Pontificali præscriptæ. Harum summa est, ut Pontificali auctoritate exuatur publice reus insignibus suo ordini competentibus ita, ut post hæc reus tradatur sæculari curiæ puniendus.

#### VII.

## VII.

Depositione secuta, si verbalis sit, raro depositus restituitur; si formalis, nunquam; nisi quo casu adpareat, quemquam injuste fuisse damnatum: tum vero acta rescinduntur, & ademta ordinis insignia publice, & solenniter restituuntur, juxta formam in Pontificali præstitutam.

## VIII.

Denique poenis ecclesiasticis ad censetur irregularitas, cujus nomine intelligitur sententia canonum, qua quis arcetur a ministerio suscepti ordinis, & si necdum ordinem susceperit, ab ordine suscipiendo removetur. Non sane, quod hæc sententia canonum eo semper tendat, ut reum alicujus criminis puniat, sed quod etiam hac ratione reos certorum criminum plectat. Scilicet quædam, & numero plurimæ species sunt, in quibus quis aut arcetur a suscipiendis ordinibus, aut ne in susceptis ministret, prohibetur, eam ob causam, quod decori sacrorum ministeriorum prospiciendum sit. Hinc furiosus, mutus, surdus, ac cæcus non ordinatur, & si ordinatus fuerit, a ministerio abstrahitur, non ob crimen, sed propterea quod deceat, sancta ab hoc personarum genere non tractari.

Hac ratione suspensio, utut inter censuras connumeretur, proptereaue reis criminum coërcendis indicatur, quandoque tamen indicitur sine criminis causa, & ideo, ut consulatur decori rerum sacrarum, cum suspenditur ab officio, qui laborat temporali infirmitate, qua sacra officia decore peragere nequeat: quo casu suspensio non est vere censura.

### IX.

Irregularitatis nomen non est valde antiquum: antiqua tamen est juris sententia, qua certæ personæ aut ab ordinis suscepti ministerio, aut ab ordine suscipiendo arcebantur. Vereres ad hanc notam exprimendam variis formulis utebantur, ex. gr. declarantes, quemquam repelli a ministerio, aut ad ministerium non admitti. Duo potissimum ad naturam irregularitatis intelligendam sunt observanda. Primum est, irregularitatem ex juris scripti sententia imminere, nec opus esse judicis facto, ut quis irregularis fiat: hinc irregularitas distinguitur a depositione, qua in parte irregularitas arcebat ordinatorum ab ordinis ministerio, siquidem depositio non fit, nisi judicis facto. Alterum est, irregularitatem oriri ex iis causis, quæ obicem ordini ponunt, non uti Sacramentum est,

est, sed uti ordo est, videlicet uti ordo postulat nonnisi dignos, & undecumque idoneos admitti; hinc irregularitas distinguitur a ceteris animi notis, ob quas quis debet a Sacramentis ceteris aut abstinere, aut removeri.

### X.

Ergo irregularitas abs jure indicitur aut causa criminis, tum vero poena proprie est, aut causa certi defectus, quo quis minus idoneus ad sacra ministeria existimatur, tum vero dicitur impedimentum. Quacumque de causa inferatur, nonnisi aut cessante defectu, quod temporale sit, aut dispensatione aboletur. Dispensatio tum locum habere potest, cum dispensatione secuta adhuc decore ac digne sacra dispensari ministeria possint. Dispensandi potestas ordinario jure penes Episcopos est. At multi sunt casus, in quibus reservationes Pontificiae intercesserunt. Hos late Pragmatici enumerant.

### XI.

Cum ex crimine, seu criminis causa irregularitas infertur, certa regula est, nullum crimen irregularitati causam præbere, nisi contra quod hæc poena speciali jure indicta fuerit. Hujusmodi sunt crimen hæresis, vel apostasiæ, iteratio Sacramenti Baptismatis, simonia, violatio censuræ, homicidium vo-

luntarium, & quomodocumque culpabile, quod etiam ad mutilationem voluntariam, & culpabilem extenditur.

Homicidium culpabile dicitur, etiam quod casu sequitur, si casum culpa præcesserit, veluti si quis hominem casu occiderit eorum armorum genere, quorum usus lege prohibeatur.

An qui abortum procuraverit, habeatur in hac parte, ac si homicida esset, est in scholarum disputatione.

## XII.

Cum defectum irregularitati causam præbere dicimus, non de ea specie agitur, qua arceatur quis a sacris ordinibus ex eo, quod natura incapax sit, aut ex eo, quod sacra ordinatio facta ex Divina institutione prorsus in irritum caderet.

Ob priorem causam fœminæ dici nequeunt irregulares, quia natura incapaces Sacramenti Ordinis; ob posteriorem causam neque irregulares sunt, qui necdum Baptismum susceperunt, quia Divino jure irrita prorsus est ordinatio illius, qui Baptismum necdum suscepit.

## XIII.

Potius irregularitati causam præbent defectus, qui utut naturâ contingunt, attramen  
aut

aut temporales sunt, aut inopinato accidunt, aut ex accidenti. Hujus generis sunt defectus ætatis, judicii infirmitas, vitium corporis singulare, & similia. Qua in specie regula est generalis, eos omnes irregulares dici, qui tali vel animi, vel corporis vitio laborant, quo nequeant ministeria ordinis exequi; etiamsi in jure nulla sit specialis sanctio, qua dicantur irregulares.

Defectus istius generis sunt, in quibus irregularitas statim cessat defectu cessante; in quibus, si defectus manet, nulla datur dispensatio; si defectus cessat, nec dispensatio petitur.

#### XIV.

Alii denique defectus sunt, qui nec naturæ vitio, nec fato cuidam emergenti tribuuntur, sed tales habentur ex juris dispositione. In his regula est nullum esse defectum, qui det causam irregularitati, nisi qui in jure specialiter exprimitur. Hujus generis sunt defectus natalium, defectus famæ, defectus libertatis, defectus Sacramenti, & defectus lenitatis.

Defectum natalium habere dicuntur, qui sunt nati aut extra matrimonii causam, aut ex nuptiis injustis, & illegitimi sunt.

Defe-

Defectum famæ habere dicuntur, quicumque infamia laborant seu juris, seu facti.

Defectum libertatis habere dicuntur servi, item ratiociniis adhuc reddendis obnoxii: adduntur his mariti, qui sine consensu uxoris ad sacros ordines se promoveri desiderent.

Defectum Sacramenti habere dicuntur clynici, qui Baptisma distulerunt in tempus infirmitatis; neophyti, qui recens baptizati necdum sunt in Christi fide plene eruditi, item bigami, qui aut secundas nuptias contraxerunt, aut viduam uxorem duxerunt.

Defectum lenitatis dicuntur habere quotquot etiam iuste hominem occiderint, aut mutilaverint, vel occidi, aut mutilari mandaverint, item occisioni, aut mutilationi vel causam, vel auxilium præbuerint. Ex hac causa irregulares dicuntur, qui sententiam dixerint in causa capitali, qui hanc sententiam dicentem adjuvaverint, atque ejusdem sententiæ executores.

Qui homicidium, aut mutilationem admiserunt aut inevitabili fato, aut ex necessitate, cum alias se defendere nequiverint, irregulares ex ea causa non fiunt, tum demum tales exituri, si culpam quandam admiserint. Hinc laici quicumque aut medicam,  
aut

aut chirurgicam artem profitentes, urendo, secando nullam contrahunt irregularitatem, si nullam culpam admiserint, ex qua ægrotus aut mortuus fuerit, aut tabem insanabilem contraxerit: alias vero contra laicos medicam, aut chirurgicam artem profitentes nulla jure indicta irregularitas est. Si de clericis chirurgicam artem profitentibus agatur, etsi juxta leges artis urant, aut secant, irregulares fiunt, quia hanc artem exercere canonibus prohibentur, ideoque aut secando, aut urendo culpam admittunt. Potiore jure irregulares essent, si illorum culpa homicidium, aut tabes insanabilis sequeretur in exercitatione vel medicæ, vel chirurgicæ artis; cum etiam laicis in hac specie irregularitas immineat.

### CONCLUSIO.

**Q**UÆ hucusque per omnes fere Juris Ecclesiastici partes pervagatus ita exprimere conatus sum, ut cum brevitati consulerem, tum etiam nihil officerem perspicuitati, videntur sane mihi exhibere posse & prima Juris Ecclesiastici elementa, & summa ejusdem juris dogmata. Si quædam proposui, quæ forte paullo subtilia videantur, curavi, ut ea non sine simplicitate digererem, quo fieret, ut etiam juniorum intelligentiæ accom-



commodata prodirent. Si multas, & pene innumeras rerum imagines congeffi, dedi etiam operam, ut eas certus ordo distingueret, ac sua veluti in sede tributas collocaret, ne rudiorum animi turbarentur. Erunt forte, qui me de effusa maiore rerum copia infimulabunt, ultra quam initio pollicitus fuerim; sed erunt etiam forte, qui de nimia brevitate, & de stylo nimis preffo conquerentur. Plus æquo sibi blandirentur Scriptores, si putarent, se omnibus posse placere. Ego certe profiteor, me in posteriore parte delectatum fuisse brevitate dicendi; non adeo e converso angustos servasse limites differendi in priorē. Nimirum rem utilem aggredi volui iis, qui primum pedem in ecclesiasticæ prudentiæ vestibulo ponunt, & sacræ disciplinæ studiis initiari desiderant. Rerum jejunis non sunt initio jejuna tradenda, & cruda, præsertim quæ ad prima elementa pertinent, quæ sane alto animo reposuisse juvat, cum ad ulteriora quisque progreditur. In his opportunus est & philosophiæ, & prudentiæ solidioris usus, quo animus assuescat & veritati, & utilitati. Ita ergo in priorē parte me gessi, ut eadem elementa late panderem, discuterem, & aperte, imo etiam enucleate proponerem, gnarus hæc argumenta tyronibus

bus magis, quam provectis congruere. Cum ad alteram partem progressus sum, ibi orationem magis contraxi, ne gravis essem, & tyrōnes obruerem; eo consilio, ut jacerem semina disciplinæ, quæ quisque cum progredieretur, magis magisque foveret, & quotidianis adjectis incrementis augeret. Hoc ipso consilio temperavi ab iis, quæ incidere solent in disputationes scholasticorum; item ab iis, quæ ex varia variarum gentium, & provinciarum indole variam etiam disciplinam constituunt; ne ad singularia quæcumque propemodum innumera descenderem. Juris Ecclesiastici studiosos rogo, ut labores hosce meos, qualescumque sint, æqui boni faciant: ac candide profiteor, parem mihi futuram jucunditatem, sive cum noverim, ea, quæ persecutus sum, saltem in parte utilia quibusdam esse potuisse, sive cum noverim, quædam aut emendata, aut rejecta fuisse a viris prudentibus, quibus exploratum fuerit, ea aut a veritate, aut a prudentia esse aliena; neque enim aliud animo versavi, quam & veritati studere, & publicæ utilitati pro virili parte servire.

*Finis Institut. Juris Ecclesiast.*  
*edit. anno MDCCLXIX.*

**IMPRIMATUR.**

**F. Joannes Dominicus Piselli Ord. Prædic.  
S. Th. M. Vicarius Generalis S. Officii  
Taurini.**

**V. Belgranus e Famulasco P. & R.**

*V. Se ne permette la Stampa .*

**GALLI per S. E. il Signor Conte Caissotti  
di S. Vittoria Gran Cancelliere .**

ANT 13117019







